




6
28-F
65



~~6-7-D-2~~

~~6-7-D-12~~

~~6-28-71~~



V I T Æ
ILLUSTRIUM VIRORUM

SEMINARII PATAVINI

AUCTORE



JO: BAPTISTA FERRARI

IN EODEM SEMINARIO

STUDIORUM PRÆFECTO:



1799.



P A T A V I I

TYPIS SEMINARII

SUPERIORUM PERMISSU.



*Clarorum Virorum facta mōresque posteris tradere
antiquitus usitatum.*

Tacit. init. Vitæ Jul. Agric.

*Cogita quantum nobis exempla bona prosint .
Scies magnorum Virorum , non minus præ-
sentia , esse utilem memoriam .*

Senec. Epist. CII. in fin.

ILL.^{MO} ATQUE REV.^{MO} MARCHIONI
FRANCISCO SCIPIONI
 DE DONDIS AB HOROLOGIO
 J. U. D. CANONICO PATAVINO
 PROTONOTARIO APOSTOLICO
 DE NUMERO PARTICIPANTIUM
 ET IN EPISCOPATU PATAVINO
 SEDE EPISCOPALI VACANTE
VICARIO GENER. CAPIT.



JO. BAPTISTA FERRARI

F.

EN Tibi opus, PRESUL ILL.^{MS}
 atque REV.^{MS}, quod edi in lucem
 jussisti ad Patavini Seminarii decus
 augendum. Utinam tuo consilio
 * ij respon-

respondeat labor a me susceptus !
 Certe tuum sibi spondet patrocini-
 um, cum sit altera quasi pars il-
 lius Opusculi, quod proxime elapso
 anno tuo nomine ornatum prodiit.
 Accedit etiam, quod horum stu-
 diorum genere & tu delectaris ma-
 xime; & quod ex illustribus istis
 Viris non pauci sunt, qui orti in
 hac ipsa urbe se jactant cives tuos.
 Fave igitur Operi, quod ad Te spe-
 ctat. Patavinus ipse, Patavinos ci-
 ves amplectere, & bonum Semina-
 rii, cui præs, semper in majus
 promove. Vale.

ADOLESCENTIBUS
PATAVINI SEMINARI
ALUMNIS

JOANNES BAPTISTA FERRARI

F.

*S*olitos fuisse quosdam me
audisse memini, Majorum suorum
virtute præstantium imagines re-
ligiose servare domi, & ad eas

* iij

invi-

*invisendas suos identidem filios
 ducere. Putabant enim illarum
 tantum aspectu ad similia capes-
 senda eos excitari posse validius,
 quam longa & accurata oratione.
 Eodem & ipse consilio ductus,
 nonnullorum, qui præ ceteris hunc
 locum ornavunt, Vitas, totidem
 quasi tabulas, vestris oculis, Ado-
 lescentes, subjicio. Ego eas scri-
 psi, usus in multis opera Andreæ
 Coi, in exterioribus hujus Semi-
 narii Scholis Rhetoricæ Præcepto-
 ris, hominis in memoriis colligen-
 dis industrii. In has diligenter in-
 spicite: quæ fuerint hujusmodi
 Virorum studia, qui mores, tacite
 vobiscum ipsi perpendite, ac vos*

cum

cum iis comparate. Hoc vobis nobilissimum quasi calcar ad premenda illorum vestigia fore polliceor. Si enim adeo movent vel muta clarorum hominum simulacra, quanto magis illorum gesta litterarum monumentis expressa! Hinc ille :

Inspicere, tanquam in speculum, in vitas omnium jubeo.

Terent. Adelph. III. 3. 62.

*Id si præstabitis, & morum disciplina, (quod interesse summo-
pere vestra debet) vigeat; nec
unquam bonarum Artium, præci-
pue Eloquentiæ, quam veluti he-
redi-*

*reditariam ab iis accepimus, flos
exarescet. Ne vos pigeat ad u-
trumque eniti, & Seminarii glo-
riam tueri. Valete.*

AUCTOR OPERIS

AD LECTOREM.

Obscriptam publice jamdiu fidem exsalvo. Habes, Lector, in altero hoc Opusculo quorundam Virorum acta, qui Seminarii Patavini nomen ornarunt. Non omnes iisdem artibus delectati sunt: excelluit tamen quilibet in ea, quam exercuit, facultate. Ac si minus pari, certe digni sunt omnes laude consimili.

Non deerant sane, quos aliunde mihi sumerem, Viri illustres, & nostris Adolescentibus ad imitandum proponerem; sed propius nos isti afficiunt: excitare autem multo vehementius solent exempla domestica, quam externa. Hæc porro ab iis tantummodo mihi adsciscenda putavi, qui desierunt inter nos agere vita functi. Invidiosum enim esset de illis scribere, qui vivunt adhuc; nec absolutam possemus habere historiam. Adde, quod rebus gestis
lon-

*longe majorem auctoritatem nescio quomodo
mors conciliat.*

Majus ab exsequiis nomen in ora venit.

Propert. l. III. eleg. I. v. 24.

*Erit fortasse qui doleat præteritum
fuisse quempiam ex his, qui potiore, quam
quidam alii, de quibus narro, & ampliore
laude floruerit. De illis scripsi, quorum facta
mibi explorata sunt, & cognita; de aliis
etiam paratus dicere, ubi plenius mibi illo-
rum moves ac studia innotescant, & necessa-
rium tempus & otium suppetet. De quibus
vero pauca tantum contigit mibi colligere,
de his non sileo: quæ comperi, in adnotatione
subjicio, ne & illa pereant. Interim oro,
ut hæc, quæ tibi exhibeo, admittas huma-
niter & benevole: sic enim ad inceptum
libentius persequendum mibi incitamentum
præbebis. Vale.*



I N D E X.

<u>Vita Michaelis Verii</u>	<u>Pag.</u>	1.
<u>M. Antonii Ferratii</u>		12.
<u>Sebastiani Melchiorii</u>		14. not. b.
<u>Francisci Canalis</u>		26.
<u>Jo: Baptista Canalis</u>		30. not. 2.
<u>Ferdinandi Porretti</u>		31. not. a.
<u>Jacobi Jacobetti</u>		33.
<u>Petri Antonii Coppo</u>		37. not. a.
<u>Jacobi Facciolati</u>		42.
<u>Andrea Bassani</u>		69. not. b.
<u>Sebastiani Franzoni</u>		78.
<u>Andrea Brigentii</u>		79. not. b.
<u>Josephi Pasini</u>		95.
<u>M. Antonii Trivellati</u>		108.
		<u>Ægi-</u>

<u>Ægidii Forcellini</u>	<u>Pag. 120.</u>
<u>Antonii Sandini</u>	<u>130.</u>
<u>Vincentii Fuga</u>	<u>131. not. 2.</u>
<u>Antonii Zanolini</u>	<u>142.</u>
<u>Josephi Rinaldi</u>	<u>151.</u>
<u>Clementis Sibillini</u>	<u>162.</u>



V I T A

MICHAELIS VERII.



IN Vicetinis montibus non longe ab oppido Marosticensi Planetiæ occurrunt, rusticus quidem, sed tamen illustris locus, quod eximios Professores duos ediderit publico Patavino Gymnasio, Michaellem Verium, & Josephum Toaldum, utrumque antea in Seminario Patavino educatum, utrumque ibidem præceptoris officio functum. Pauca nunc de Verio: cujus familia eo se recepisse jam pridem dicitur ex Florentina Republica turbulentis motibus & dissensionibus acta.

Hic ortum habuit Michael III. Idus Octobris anno quarto & quinquagesimo sæculi superioris; qui postea in Seminarium exceptus, primo scilicet ac septuagesimo ejusdem sæculi Cal. Januarii, a Rhetoricæ primordiis studio-

a

dio-

diorum cursum est orsus. Eo anno ingressus est Seminarium Verius, quo Seminarium ipsum in ampliorem locum a B. Gregorio Barbadico translatum est, eo scilicet ubi idem in præsens cernitur; ut propterea recensendus sit inter Seminarii hujus primitias Verius.

Quod ad ejus institutionem pertinet, nihil præterea habeo, quod dicam. Neque enim exstant monumenta. Quis tamen fuerit jam tum, possumus ex ejus ipsius præstantia non temere, divinando conjicere. Non exigua ille a natura fortitus fuerat ad litteras adjumenta. Erat illi subtile ingenium, acutum, vehemens, amplissima vis memoriæ ac tenacissima, præfervida imaginandi facultas, tum ardor sciendi plurimus, robusta præterea corporis habitudo, & ferendo labori par, qui necessario impendi debet in studia. Quibus præsidiiis is evassisset multo illustrior, nisi incidisset in tempora scientiis ac litteris non valde prospera. Neque enim exigua sunt ad res hujusmodi momenta temporum; in utramque partem non minimum eadem conferunt.

Ea itaque ætate scholas publicas privatasque tenebat Scholastica Philosophia, quæ licet in multis solida, neque tenebris tamen caret, neque nodis. Erat hæc in deliciis Verio, quippe qui in differendo acutus, habebat hinc, quo ingenium suum exerceret. Hoc tantum ineunte sæculo excepta Patavium est recens-

centior Philosophia, cum Verius annum ageret circiter quinquagesimum. Difficile autem omnino erat, cum opiniones repente exuere, quas jamdiu imbiberat, & aliis jamdiu inculcaverat. Turpe homines putant *quæ*

Imberbes didicere, senes perdenda fateri (a).

Quidquid tamen fuerit, adhuc tamen plurimum Verius claruit, scholasticis in primis disputationibus. Tanta enim erat differentis vis & *ἐνέπρετα*, ut nemo posset stare contra. Se nosse aiebat prorsus neminem eruditissimus Antonius de Comitibus, qui solidius quam is, teneret principia Logicæ Aristotelicæ, & interior pervaderet illius recessus.

Aliarum quoque scientiarum sibi præsidia Michael adscivit. Studio se dederat Geometriæ, cum exquirere modum cœpit redigendi circuli aream ad dimensionem quadrati. Atque id revera sibi admirabili plane modo patet factum putabat, quod invenire potuit nemo adhuc ex Mathematicis. Enimvero labuntur aliquando & homines magni, ubi præcipue indulgent ingenio suo. Facile siquidem credimus, quod optamus. Astrorum etiam scientiæ

a 2

stu-

(a) Horat. Lib. II. Epistol. I. v. 55.

studiosus Verius plures brumales noctes evigilavit sub dio, notandi cupidus maximas *Polaris* sideris digressiones ad verum meridiani temporis punctum constituendum.

Idem se dicavit insuper studiis chemicis & an. MDCCXXVI. duas edidit dissertationes, alteram quidem logicam, alteram vero chemicam (a). Illud enim sermone hominum percrebuerat, Cathedram iis temporibus erectum iri in publico Patavino Lyceo, unde Chimica docerentur. Hoc ille munus se assecuturum sperabat. Irrita spes evanuit. Paucis enim tantum ab hinc annis institutum est, quod is cupiebat.

Non tamen propterea destitit ab artis Chemicæ studio. Totus in illo erat. In ejus cubiculis ubique clibani. In ipsam Posteriorum Analyticorum interpretationem, quod erat (ut mox videbimus) publicæ scholæ pensum in hoc Patavino Gymnasio, talia quædam inferebat. Et quoniam a Chemicis brevis & facilis transitus ad *Alchimiam*, in hanc non suam tantum impendit operam & pecuniam, sed & domesticam suppellectilem.

Magnum aliquid moliebatur, nec dubitabat,

(a) Facciolatus, Fasti Gymnasii Patavini Tom. II. pag. 299.

tabat, quin id esset sibi cessurum prospere .
Hæc in ejus animo spes infederat, quam Physica Scholasticorum, cui vel maxime addictus Verius, quodammodo alebat & corroborabat suis doctrinis, iis præsertim, quæ de intima elementorum transmutatione. Nec recentiores Physicos pari poterat, quorum contraria dogmata . Gassendus atque Cartesius nomina minus grata . Hos appellabat *Titans Philosophiæ*, sed hæc temporis potius vitia, quam hominis; quæ licet obsuerint non parum Verio, adhuc tamen floruit, ut antea diximus, & inter alios sui ordinis valde eminuit.

Certe Seminarii alumnos multa cum laude docuit plures annos cum Philosophiam atque Mathesim, tum Sacram Theologiam . Collegii primum Theologici, post etiam Medici jus obtinuit; atque illud quidem implevit suis discipulis, quod antea tenebant soli propemodum Coenobitæ . Optime versatus erat in doctrina Patrum . Aristotelis autem opera & S. Thomæ & funditus noverat, & accurate didicerat .

Exstat præterea systema physicum ab eo ex principiis quidem veterum, sed nova temperatione conflatum . Illud autem pro certo habebat, terram moveri, & habitari planetas . Quod vero ad Theologica spectat, Angelos nescio quo subtili corpore donatos esse affirmabat . Nitebatur id cum Sacrarum Scriptu-

rarum, tum veterum Patrum auctoritate fulcire.

Quæ hætenus enarravi, contulere plurimum ad ejus nomen augendum. Ipsum vero latius adhuc propagarunt, quæ mox dicam. Anno itaque MDCCXVIII. a Seminario traductus est in publicum Patavinum Gymnasium. Ibi Logicam professus est conductus trecentorum florenorum stipendio, quibus post annos tredecim additi sunt centum viginti (a).

Publico bono intentus *scholasticam juventutem ad organum scientiarum omnium instituit* (b): appellatus a Pappadopolo *Professor clarissimus, philosophus acutissimus* (c): a Facciolato *Professor longe celeberrimus* (d). Utque erat eruditæ linguarum peritissimus, quælibet vel difficilia explicabat facile, perspicue, concinne. Erat contorta & acris illius oratio, & ad persuadendum idonea. Quid ejus facundia posset in veritate tuenda, patuit ex eo vel maxime, quod anno MDCCXXII. scripsit Sacri Theologorum Collegii jussu.

Quærebatur tunc in Romana Curia de vir-

(a) Facciolatus, Fast. Gymn. Pat. Tom. II. pag. 299.

(b) Pappadopolus in Historia Gymnas. Patavini ad an. 1718. pag. 187.

(c) Ibidem.

(d) Loco cit. pag. 299.

virtutibus Sebastiani Fratris ab Apparitio ex
Minoritis, cognomento Pyrausta. „ In quo (ita
„ rem narrat Faceiolatus (a)) cum aliquid
„ incidisset non satis planum atque explica-
„ tum, adhibita est in consilium præter Sor-
„ bonicam & Salmaticensem, Universitas Pa-
„ tavina.

„ Vixerat Pyrausta usque ad annum se-
„ xagesimum summa vitæ integritate atque
„ innocentia. Id ætatis cum esset, puellam
„ uxorem duxit, sed ita tamen, ut servato,
„ si fieri posset, virginalis continentiae propo-
„ sito, cultos potius & pater, quam maritus,
„ vi- sociam atque adjutricem haberet; ea-
„ que intra annum defuncta, alteram statim
„ eadem conditione sibi adjunxit. Cum utra-
„ que continentissime egit, & cum secundam
„ quoque cito amisisset, Religioni se addixit,
„ obiitque sanctitatis fama, & miraculis cla-
„ rus.

„ In dubium vocabatur, num duo hæc
„ connubia ex christianæ prudentiæ legibus
„ inita dici possent ad virtutem heroicam
„ exercendam.

„ Rem (b) scriptis examinarunt Profes-

2 - 4

„ so-

(a) Synagmate IX, pag. 116.

(b) Fasti Gymnasii Patav. Tom. II, ad an. 1722, pag. 245.

„ fores tres, Frater Hyacinthus Serry, Frater
 „ Nicolaus Buico, & Michael Verius; sed
 „ cum in diversa abiissent, Collegium in Ve-
 „ rii verba, qui factum probaverat, & ad
 „ summæ virtutis fastigium evexerat, senten-
 „ tiam tulit „.

Hæc Facciolatus: ex quibus insignis laus
 redundat in Verium. Gravissimam etenim rem
 expedit, & difficilem prorsus dijudicatu. Ma-
 gnum fuisset, eundem rem tantam vincere, si
 solus sine comparatione scripsisset. Etiam „Ca-
 „ tulus (ut animadvertit Tullius (a)) talis
 „ erat, ut cum ipsum tantum audires, non
 „ modo contentus esses, sed melius non quæ-
 „ reris: cum vero quosdam audires, qui tum
 „ erant præstantes, videretur inferior „. Neque
 mirum. Difficultatem auget comparatio.

Jam vero scripsit Verius cum viris do-
 ctrina, ingenio, eruditione præstantibus. Cum
 his illi in hac causa quasi quædam contentio
 fuit, & evasit illis superior. Quanti tandem
 istud habendum est? Prævaluit sententia Ve-
 rii, tum quidem Theologorum suffragiis, no-
 vissime autem Ecclesiæ ipsius, quæ falli ne-
 quit, oraculo comprobata (b). Erat eadem &
 an-

(a) De Claris Orator. c. XXXV.

(b) Est enim Sebastianus Beatorum Fastis adscriptus.

antea quidem firmissima, utpote quæ solidis fundamentis innixa; vocari tamen adhuc in dubium poterat: nunc omnem sustulit sententia lata tumultum (a).

Si hoc unum de tanto viro, nec aliud præterea quidquam cognitum haberemus, esset id ad excitandam in eum admirationem satis, & ad commendandum vel ultimæ posteritati ejus nomen. Sed non desunt & aliæ laudes.

Præter systema physicum, de quo antea, scripsit quoque alia latino sermone, & italo cum ligata numeris, tum soluta; ea delectatus Poesi, quæ plurimas præ se ferret imagines, aliquando non sine audacia, ex sæculi scilicet superioris ingenio.

Inter Academicos Recuperatos allectus fuit. Synodalis etiam *Examinatoris* munus sustinuit, & B. Gregorii Barbadici sanctitatem rite testatus est in judicio Patavii Ecclesiæ jussu instituto.

Ubi scholarum census Patavini Seminarii more haberetur, ex officio examinabat alumnos gravioribus disciplinis addictos. Fruebatur simplici, ut ajunt, Beneficio, & Sacerdotio auctus fuit in Cathedrali Æde Patavina,

(a) Pulcherrimam dissertationem suam Verius edidit. Ejus exemplum in Seminarii Patavini Bibliotheca servatur cum aliis ejusdem scriptis.

na, quod postea dimisit, ut Parœciæ S. Martini regimen Patavii iniret, ad id electus xv. Cal. Decemb. an. MDCLXXXVI. quo post abdicato, in Seminarium regressus est.

Musico instrumento delectabatur hilari ingenio vir, ut se reficeret a gravioribus curis. Erat pulcra canitie decorus, studiosus munditiæ non odiosæ, non exquisitæ nimis, modico vestis cultu, & gravi incessu verendus, statura ac forma ad dignitatem apposita.

Ad octavum ac septuagesimum ætatis annum pervenerat, usus semper admodum prospera valetudine inter tot litterarios labores. Maluit tamen desinere, quam deficere. Quare cum honestam missionem obtinuisset an. MDCCXXXII., reliquum vitæ tempus privatus egit. Venditis aliis libris, sibi retinuit tantum quosdam, & quidem optimos, de re chimica.

Quæ scripsi, fere omnia debere me ingenue fateor celeberrimo Professori Toaldo, qui hæc jampridem memoriæ prodidit (a). Nihil mihi suppetit, quod peculiariter narrem de Verii moribus. Quamquam ex his, quæ fuerit ejus indoles, satis constat. Triennio post defecit vi. Idus Februarias, unum & octoginta circ-

(a) Vid. *Saggio Meteorologico ec. Part. II. art. 16. pag. 156.* Patavinæ edition. an. 1770.

circiter annos natus. Sepultus Patavii jacet in Sacello S. Antonii Patavini ad Ecclesiam S. Mariæ de Columbinis. In sepulcri titulo dicebatur & Florentinus, & Patricius, & Comes. At hic evanuit, renovato Sacelli illius pavimento. Sed de hoc satis; reliquos ordiamur.





V I T A

M. ANTONII FERRATII.

XII. Cal. Martias an. MDCLXI. natus est M. Antonius Ferratius Vastagnæ, Patavinæ Diœcesis pago in agro Vicetino sub montibus ad ripam Medoaci sito. Primam habuit institutionem in Collegio Trestensi (a), unde pridie Cal. Novemb. An. MDCLXXIV. in Seminarium translatus est a B. Gregorio Barbadico tunc Episcopo Patavino. Ac primis statim Rhetoricæ rudimentis imbuitur, gradatim postea promovendus ad alia, de quibus audiamus, quid ipse narret. Exstat enim adhuc ipsius Ora-

(a) Vide Caput XIV. Opusculi *De singulari B. Gregorii Barbadici studio & amore in Seminarium Patavinum*, edit. an. 1798. typis ejusd. Seminarii.

Oratio ad Hebraicam linguam, in qua commemorat de suis studiis. Ejus verba transcribam.

„ In medio (inquit ille) studiorum meorum cursu, ætatis anno vigesimo secundo, cum jam mihi in litteris scientiisque satis profecisse videbar, quod proficere cuperem; abstrahor, nescio qua mente, a dulcissima præceptorum consuetudine, & a quotidianis hujus sacre palæstræ exercitationibus delor. Visum enim est Eminentissimo nostro, cujus voluntati par est ut meam ipse conformem, me, vix posito tirocinio, primipilum facere, & veræ sapientiæ tantum non plane ignorantem ad ea præcipue studia destinare, quæ porro qui profitentur, divinæ sophiæ professores dici solent. Hastenus Ferratius.

In dissertatione vero, quam typis edidit anno MDCXCI., ita loquitur: „ Assertiones justus exponere, quo facilius palam omnibus fierent, quos in sacra lingua progressus fecissem (a); quamvis tribus abhinc annis
„ ad

(a) De eo libro magnifice Cardinalis Hieronymus Casanata veterum linguarum noticia insignis. Id colligimus ex quadam B. Gregorii Barbadii epistola manu scripta, & ab eodem Roma III. Cal. Octobris an. 1691. ad M. Ferratium missa. En ejus verba. *Dovete avere obbligazione all' Eminentissimo Casanata per la stima, che ha mostrata del libro, e la diligenza, con cui l'ha letto, facendomene un lungo discorso sopra le materie contenute in esso.*

„ ad longe diversa studia animum applicuif-
 „ sem „ &c. Quibus verbis indicat (ut opi-
 nor) se ad studiorum Seminarii Patavini re-
 gimen fuisse euectum : quod sane accidit cir-
 ca annum MDCLXXXVIII., ut constat etiam ex
 epistola B. Gregorii Barbadici ad Magliabec-
 chium (a) .

Ex hoc uno apparet, quantus Ferratius
 fuerit . Adhuc enim adolescens visus est eidem
 B. Gregorio dignus, qui Nicolsono viro do-
 ctissimo subrogaretur; quo tempore vel maxi-
 me Seminarii studia florebant . Ejus doctrinæ
 & ingenii majus proferri nequit testimonium .
 Quamquam & hoc amplissimum . Adolescens
 exercuit cum laude munus, quod antea oblatum
 fuerat Josepho Averanio, viro & multæ doctrinæ,
 & magni nominis . Is autem illud recusaverat,
 quod a Cosimo III. Magno Etruriæ Duce
 electus esset ad instituendum disciplina Juris
 Joannem Gastonem filium . Quam quidem
 provinciam brevi M. Antonius tenuit . Eun-
 dem enim anno MDCXCII. electum fuisse in Ca-
 nonicum Montis Silicis ex eo conjicio, quod
 ad exitum hujus anni studiis publice in Se-
 minario proluserit Sebastianus Melchiorius (b)
 Rhe-

(a) Claror. Venetor. ad Ant. Magliab. Epist. Tom. II., ex
 iis B. Gregorii Card. Barbadici Epist. XXIII.

(b) Sebastianus Melchiorius eloquentiæ laude clarissimus .
 Ortum habuit ex honesta gente Crispani, loco haud ignobili,
 in

Rhetoricæ tunc Præceptor: quem biennio post ejusdem Seminarii studiis præfuisse intelligo ex quadam ejus ipsius Oratione per typos edita. Interim ad Superos abiit Barbadicus; cum hoc repente falso perccebit, reditum in Seminarium Ferratum.

„Hinc

in Agro Tarvisiano, prope montes, Bassanensis Civitatis ad orientem sito. Anno 1671., ætatis 14. a B. Gregorio Barbadico in Seminarium admissus est, ubi institutus, amceniores litteras postea docuit ejusdem Seminarii alumnos, inter hos celeberrimum Facciolatum, ut ipse affirmat in *Fastis* (*Tom. I. Par. I. pag. 61.*); tum studiis præfuit. Mox accitus in Publicum Patavinum Gymnasium tradidit Græcam & Latinam Humanitatem. „ Duabus recitatis atque editis pulcherrimis Orationibus, spon- „ te sua se abdicavit, valetudinem causatus. Exstant Orationes „ aliz ab eo scriptæ cum Seminarii studiis præfesset, in qui- „ bus ad exquisitam latini sermonis lautitiam vix quippiam „ desideratur, „ (*Facciolat. ibid.*), Exstant etiz & aliz duz, altera quidem in funere B. Gregorii Barbadici; altera vero Sebastiano Venerio ex Patavina Præfectura abeunte. Natalis Læsthesius multæ celebritatis orator (& ipse jamdiu inter Seminarii Patavini alumnos & præceptores) in Epistola quam præmittit suis Gratulationibus editis ejusdem Seminarii typis anno 1767., Melchiorium *principem omnium* vocat, qui in Seminario florere eloquentia. Idem Melchiorius dicitur collegisse aliquot præceptiones de contexenda periodo, quæ discendæ nostris proponuntur in scholis. Quædam præterea ab eodem scripta, non tamen edita, Seminarii continet Bibliotheca.

Quod spectat ad ejus mores, hoc unum dicam, quod instar est elogii cujuslibet disertissimi; eum nimirum B. Gregorio fuisse maxime acceptum. Cum Patavio se recepisset, in patriam sibi uni vixit sine cura ulla gloriæ suæ, & sine obre- fatione alienæ (*Facciolat. loc. cit.*) usque ad annum 1728. Moritur Cal. Januarii. Qua die annus initium sumpsit, Sebastianus finem vivendi fecit. Nepotem habuit sui cognominem, & similem laude vitæ, qui Patavino in Seminario institutus ibidem docuit. In Collectione quadam Epistolarum, tribus circiter abhinc annis Venetiis edita, sunt quædam sermones italico ab eo conscripti.

„ Hinc rumor (sic ille in quibusdam
 „ suis literis mss.) hinc rumor, & falsa et-
 „ iam amicorum opinio de meo in Semina-
 „ rium reditu. Quid enim ego me negotiis
 „ immiscerem? An honos, gratia, auctoritas
 „ allicerent? Horum omnium satietas me te-
 „ net, quorum dum adolescentia vigeret, non
 „ mediocris erat cupiditas. An ex rebus bene
 „ gerendis gloriam quærerem? Et illud no-
 „ men inane: incertus præterea exitus deter-
 „ rebat. An utilitatem, quæ magnam apud
 „ nostrum ordinem habere vim solet, secta-
 „ rer? Nullam esse constabat. Talia vero cum
 „ studiis præessem, ac tanta feci obrinuique,
 „ quanta & qualia sperare vix possum.„ Huc
 „ usque M. Antonius, qui cum plura reliquerit
 „ eruditionis suæ monumenta, in multam cele-
 „ britatem evasit apud viros etiam in primis
 „ litteratos. Recensebo eadem post exitum hu-
 „ jus Vitæ, ne intercipiatur historia.

Lipsienses Acad. quibus anno m^occxxxv.
 oblatae fuerunt M. Tullii Ciceronis Orationes
 cum argumentis, animadversionibus & analysi
 M. Antonii Ferratii, eidem gratiam haben-
 dam judicant, quod hujusmodi laborem ad
 juventutis oratoriae artis studiosæ utilitatem
 suscepit (a). Ad id illi auctor fuerat, ut
 ipse

(a) In supplem. ad Nova Acta Eruditor. Tom. I. sect. VI.
 pag. 247. an. 1735.

ipse fatetur in Præfatione, B. Gregorius Barbadicus, Princeps ad optima quæque natus.

Res erat ardua, & molestiæ plena, quam alii quidam attigerant, sed leviter admodum (ut ei videbatur), & exitu non satis prospero. Ad audendum tamen ipsi fuerunt incitamento tum primi labores ab ipso insumpti in explicandas Titi Livii conciones, non sine aliqua (ut ipse modestè affirmat) approbatione; tum facilius obtinendæ, utpote in re difficili, veniæ spes. Sic itaque rem orditur.

Totius Orationis ordinem singillatim exhibet in Synopsi, unde expeditior fit cujuslibet quoque partis intelligentia. Tum Oratoris aperit artificium, quod sæpius latet; certe non tam facile se se prodit, præsertim adolescentibus, quorum gratia Ferratius scribit. Quæ sit optima narrandi ratio, ac refellendi; quæ argumentorum sedes, efficacia, ac vis; quæ cum singulis usurpanda demonstrat Ciceronis exemplo. Ita explicat demum omnia, evolvit, illustrat, ut Orationem cognoscere vel discipuli funditus possint.

Quoniam vero apud auctores obscuriora quædam occurrunt, adnotationes adjecit ad eorum illustrationem. Hæc autem sunt, quæ ceteri *Commentatores*, aut incerti quid sentirent, omiserant; aut non assecuti Oratoris sen-

b

ten-

tentiam, perperam fuerant interpretati. Quam brevissime vero attigit in adnotationibus, quæ fufius explanaverat in Epistolis Criticis, ne, quod est in proverbio, cantata recineret.

His porro Epistolis, quibus continentur selectæ de Romana Republica Quæstiones, tam multa & utilia complexus est, ut nihil propemodum quæri possit ad absolutam Tullianarum Orationum, & ad non exiguam etiam Romanæ Reipublicæ, & eorum temporum cognitionem.

Non alienis ille vestigiis hæret serviliter, ut pedissequus; non aliis temere suffragatur. Interpretes etiam eruditissimos carpit, ubi opus sit; ipsos quoque veteris historiæ auctores ingenua libertate castigat amantissimus veritatis.

Neque Oratorum tantum, Poetarum quoque latinorum Principem illustravit, suo tamen suppresso nomine. „Singulos ejusdem libros in capita cum eorum summa divisit, „ idem institutum tenens in omnibus, ut interrupta identidem lectio animos reficiat ac „ recreet. Celebres quasque Æneidos conciones expendit, easque Rhetoricis exercitationibus illustravit. Tres denique addidit „ uberrimos indices, quorum primus descriptiones continet; secundus comparationes; tertius dicta omnia memorabilia, quibus quasi „ quibusdam gemmis Maro opus suum illustrat „

„strat,, (a). Adeo ille alienæ utilitatis studiosus!

Idem laudis & gloriæ, ut ipse de se fatetur, appetentissimus; sed ejus, quam neque extorserit ambitus, neque fucus corruperit. Non asper justis monitoribus, sed amicus; laboris patiens, ingenio sagax, solida litteratura ornatus, multiplici rerum cognitione conspicuus, reconditæ in primis antiquitatis notitia.

Ac licet ille tam multa legerit, tam dissimilia, tam varia, non propterea multiplex, ut ita dicam, ejus stilus est, non varius atque dissimilis; sed unus, constans, æquabilis: quod enimvero difficile. Hunc enim in diversa trahit dissimilium scriptorum lectio. Neque latine tantum & plane loquitur; sed etiam, ubi postulat res, ornate; ut patet ex laudatione in funere B. Gregorii Barbadii Episcopi Patavini (b).

Ad ipsum non solum ut ad amicum, sed etiam ut ad censorem omnino idoneum, antequam

b 2

(a) Vide Epistolam ad Lectorem, præpositam Op. Virgilii edit. Patav. an. 1695.

(b) Vide Academiam habitam in funere Eminentissimi & Reverendissimi Gregorii Cardinalis Barbadii Episcopi Patavini ab alumnis Seminarii anno 1697., & ejusdem Seminarii typis excusam.

quam prodiret, misit Juvenalem (a) a se ita-
la veste ornatum, & omnigena eruditione
Comes Camillus de Silvestris, litterarum ama-
toribus carum nomen, M. Antonio studiorum
affinitate conjunctus.

Venio nunc ad mores, de quibus ea di-
cam, quorum pleraque ipsum testem omnino
integrum de se affirmasse video in judicio de
B. Gregorii sanctitate Patavii ab Ecclesia in-
dicto. Erat ille natura difficilis, iracundus,
biliosus; solitus multa conqueri de cibo, de
potu, de quotidiano convictu. Dictitabat Se-
minario opus esse novis regulis, novo studio-
rum ordine, nova methodo; & hæc, ipso et-
iam B. Gregorio audiente, cujus sententiis,
opinionibus, decretis solebat audacter contrai-
re de industria, fere semper ab eo dissen-
tiens. Majorem sibi sapientiam arrogabat.

Eum aliquando M. Antonius adortus est
in cubiculo, vehementi & concitato sermone.
Se plurimum laborasse tot annos doluit, te-
statur se nihil acturum posthac. Cui Vir Bea-
tus: „Nunc me orare finito,,. Ita a molesto in-

(a) Id refert Comes Hieronymus Canonicus de Silvestris,
Camilli Nepos, vir & ipse admodum eruditus, in annotatione
ad Epistolam quandam italam Jacobi Facciolati, cui, ut Ferra-
tio, idem Camillus expendendam miserat nondum editam suam
illam Juvenalis versionem.

Interpellatore se expediit. Discedentem mox revocavit Cardinalis, nescio quid illi præcipiens. Tunc ille: „Adhuc mihi quælibet de-
„ trectanti jubes? Nolo quidquam„. — „Va-
„ de (inquit Barbadicus): habeo tibi ne-
„ gantem majorem fidem, quam alii cuilibet
„ mihi omnia pollicenti„. Noverat enim is ingenium hominis ex impetu magis, quam considerate loquentis, suo tamen egregie fungentis munere.

Ac propterea in ipsum contulit aliquando simplex, uti ajunt, *Beneficium*, & hoc pingue; gravatum tamen tenuis cujusdam, ita loquuntur, *Pensionis* onere. Hac ille cupiebat munerari bene merentis cujusdam magistri industriam. Tum M. Antonius: „Si mihi non vis
„ ipsum tradere omnino immune, tibi illud
„ habeas, Eminentissime„. — „Uti vis, (re-
„ spondit Episcopus) quale illud postulas, tale damus„; & insolentiam hominis beneficio rependit, quod illi erat familiare.

Quin perhumaniter (ut M. Antonius ipse testatur) eidem Gregorius sic: „Duo tibi
„ dicam, spero, non injucunda: & diu vives,
„ & opibus abundabis„. His auditis (Ferratius ait) ridere cœpi. Quod enim ad vitam longiorem spectat, non affinium tantum & amicorum, sed medicorum quoque erat contraria opinio. Et tamen (addit ipse) quod ille mihi jamdiu portendit, impletum est. Ego

scilicet ætate provectus utor valetudine valde prospera, & ditescō præ multis aliis ejusdem atque ego fortis (a). Sic ille, jam senior & melior factus, de Barbadico, cui antea fuerat multo molestissimus.

Fuerunt enim, qui tunc putarent, Gregorium eo præcipue detinere in Seminario Ferratum, ut esset sibi assidua exercendæ patientiæ occasio. Is enim eum appetebat quotidiano prope convicio, dictus propterea ejus malleus. Quoties vero idem in se reversus adibat Cardinalem, ut aliquam sui excusationem afferret, ab eodem semper benignissime excipiebatur.

Ex præceptoribus nescio quis quadam die Cardinalem ipsum convenit de Ferratio multa conquestus: (suis enim hic præterea fociis molestiam exhibebat.) Cui Cardinalis: „ Perfer, inquit: hunc & ego patienter perfero. Deus ipsum esse nobiscum jubet, ut „ per illum exerceamur. Ingenio valet, emendabitur „. Probavit exitus vaticinium. Adeo scilicet eundem postea poenituit suæ hujus juvenilis audaciæ, ut eam damnaverit publicis monumentis, & ea narraverit, quæ essent omnino ignota, nisi eadem ipse dixisset, quippe quæ uni illi cognita.

Quid

(a) Acta Beatificationis Gregorii Card. Barbadici Tom. IV. Summar. pag. 409. Vide etiam pag. 347. & seqq.

Quid alii sentiant de hoc, ignoro. Mihi certe id unum tanti est, ut exclamem:

Scire piget post tale decus, quid fecerit ante (a).

Semetipsum traducere apud ultimos etiam posteros non erubuit, ut B. Gregorii laudi interserviret; quamquam id non miror. *Iustus enim est accusator sui* (b). Tum quæcumque eidem se se offerret occasio, de Barbadico magnifice. Eum virum prædicat *de Cælo delapsus* (c), *divinitus concessum* (d). Eum nominare non poterat, nec intueri illius imaginem sine animi motu. Hanc amplexari, hanc osculari solebat magno pietatis sensu.

Non exiguum præterea in illo paratum fuit aliorum egestati præsidium. Mos illi erat numerare pecuniam nepoti suo, ut pauperibus ægrotantibus mederetur gratis. Nonnihil etiam contulit ad decus Archipresbyteralis Ecclesiæ Collegiæ, quæ in Montefilice, quam sacra auxit suppellectile. Præibat omnibus eximio pietatis studio. In suo canonicali obeundo munere plane diligens, assiduus in Confessionibus excipiendis, promovendæ pietati in-

b 4

ten-

(a) Martialis lib. 8. Epigram. 30.

(b) Proverb. 18. v. 17.

(c) In Epist. ad Eminentissimum Cardin. M. Ant. Barbadicum priori Epistolarum parti præmissa.

(d) In funebri laudatione.

tentus. Auctor idem fuisse creditur cujusdam libelli jampridem editi, cujus hic est titulus: *Lettere di spirito*. Neque enim suum in illo nomen inscripsit præ modestia.

Vitam quidem egit & aliis utilem, sed remotam a conventu hominum & frequentia; probam, integram, incorruptam, communi judicio & consensione probatam. Laudari quilibet putabatur abunde, si diceretur uti is conscientiae suae moderatore Ferratio. Tanta erat illius virtutis opinio!

Qua cum diu omnibus præluxisset, III. Cal. Majas an. MDCCXLVIII. exitum vitae habuit, octavum & octogesimum ætatis annum ingressus. Latent forsitan alia multa ejusdem præclara gesta, diuturnitate temporis obruta. Quæ tamen diximus, multum conferunt ad illustrandam illius memoriam. Nec esse debet, eo quod juveniliter is erraverit, minus grata. Errare enim est hominis; sed quæ imprudenter erraveris emendare, sapientis.



M. ANTONII FERRATII OPERA EDITA.

Dissertationes Criticæ in linguam Hebraicam. Patavii typis Seminarii an. 1691. in 8.

Exercitationes Rhetoricæ in Orationes Titi Livii, sæpius editæ iisdem typis in 12.

M. Tullii Ciceronis Orationes cum argumentis, animadversionibus, & analysi M. Ant. Ferratii, tom. 4. iisdem typis an. 1729. in 8.

Eæ-

Eædem cum synopsi & analysi M. Ant. Ferratii, lisdem typis an. 1773. in 8.

Laudatio, & Epigrammata duo latina, in libro qui inscribitur, Academia habita in funere Eminentiss. & Reverendiss. Gregorii Cardinalis Barbadici Episcopi Patavini ab alumnis Seminarii an. 1697., lisdem typis in 4.

Epistolarum pars prior, sive de Romana Rep. selectæ Quæstiones M. Ant. Cardinali Barbadico dicatæ. Patavii per Joan. Baptistam Cæsarum an. 1699. in 8.

Epistolarum libri sex, in quibus omnia fere, quæ in Orationibus M. Tullii dubia occurrunt, illustrantur: quibus etiam pars illa prior continetur. Venetiis per Jo. Baptistam Albritium an. 1738. in 4.

Quæstio de Provinciis Romanorum, an. 1693.

EJUSDEM OPERA INEDITA.

Multæ Latinæ Epistolæ, Dissertationes, plura Epigrammata Latina & Itala, & alia Græca, Latina, Itala lingua scripta, quæ præferunt hunc titulum:

Ex plurimis tum ineuntis, tum jam vigentis juventutis lucubrationibus M. Antonii Ferratii pauca quædam, quæ supersunt.

Hæc in Seminarii Patavini Bibliotheca servantur.





V I T A

FRANCISCI CANALIS.

Quod antea optabam, nunc aggredior dicere pauca quædam, quæ mihi comperta sunt, de studiis ac moribus Francisci Canalis. In agro Vicetino septentrionem versus occurrit Marostica, oppidum non ignobile, ad montium radices positum. Ibi ex ingenua stirpe Canalis prodiit an. MDCLXIII. die quarta Octobris D. Francisco sacra, unde forsitan ejus nomen.

Primis litterarum rudimentis imbutus est in Collegio Trestensi (a); translatus postea in Sc-

(a) Vide Cap. XIV. Opusculi *De singulari B. Gregorii Barbarici studio & amore in Seminarium Patavinum*, typis editi ejusd. Seminarii an. 1798.

Seminarium Patavinum die 26. Maji anni MDCLXXX. Ad septimum supra decimum ætatis annum pervenerat, cum esset adhuc Grammaticæ studio implicitus. Verum quo serius cœpit, eo gloriosius studiorum cursum absolvit. Amoenioribus enim & severioribus disciplinis excultus, inter præceptores Seminarii hujus excipitur a B. Gregorio Barbadico veræ virtutis acerrimo æstimator ac iudice.

Enimvero multa Franciscus, novit, sed excelluit in primis multiplici cognitione linguarum. Præter Italiam, & Latinam, Græcam etiam callebat, Hispanam, Gallicam: tenebat insuper antiquissimas Orientis linguas, Hebraicam, Syriacam, Chaldaicam, Arabicam, quas idem postea Seminarii alumni tradidit plures annos. Ad easdem sibi acquirendas optimo in primis duce usus fuerat Timotheo Agnellino Mardini Archiepiscopo (a), quem B. Gregorius jusserat Seminarii Clericos hujusmodi eruditione instituere (b).

Neque solum tot linguarum, tamque inter se dissimilium, noticia Franciscus valuit, sed

(a) Vide Opusc. cit. Cap. V.

(b) Eundem etiam præfecerat Barbadicus Typographiæ in iis, quæ ad Orientales linguas spectabant, ob eximiam ejus in illis peritiam, quàm testantur ab ipso editi plures libri, uti constat ex XL. Opusculi ejusdem Capite.

sed multa quoque librorum scientia. Eident plurimum debet Seminarii Bibliotheca, cui præfuit, aucta ejus cura multis præcipue Codicibus mss., aliisque non paucis voluminibus, iisdemque exquisitis, antiquissimis, rarissimis, quæ *incredibili animi ardore & ingenti sumptu collegerat* optimarum litterarum vir studiosissimus Comes Alphonsus Alvarottus (a). Quamquam in hoc (ut verum fatear) præcipua laus Facciolati (b). Aliquot præterea de suis etiam libris in eandem Bibliothecam Canalis contulit.

Cui illud valde honorificum, quod eum litterati viri sæpius adierint, quod magni fecerint, quod se plurimum profecisse ex ejus consuetudine fassi fuerint. Hoc certe de se, ac de Alvarotto candide testatur Cajetanus Vulpus celeberrimi Professoris Joannis Antonii Fra-

(a) Jo: Ant. Vulpus in libris Carminum & Opusculorum editis anno 1725. pag. 243., 244. Hoc idem refert in adnotatione, quam præmittit Carmini Lyrico Hieronymi Fracastorii, edit. secundæ, pag. 169.

(b) Is enim qua auctoritate valebat apud Card. Cornelium Episcopum Patavinum, facile ab illo obtinuit, ut posset eos libros acquirere Seminarii bono & publico. De re hac sic in sua quadam Epistola clarissimus Zenus (Tom. III. Epist. pag. 186. edit. Ven. 1785.): *Ho inteso il bell'acquisto che ha fatto il Seminario della Libreria del fu Conte Alvarotti; e mille volte ho benedetta e lodata la grand' anima di cotesto Eminentissimo Vescovo Cornaro, al quale non ha sofferto il cuore di lasciar uscire un sì fatto tesoro dalla nostra Italia.* Similis habet pag. 169. editionis ejusdem.

Frater, ipsum Franciscum alloquens in Epistola præmissa Dialogo Venerabilis Cacciaguerræ, quem cum Scardeonii quodam Opusculo eidem dicavit anno hujus sæculi quadragesimo: unde multa ad illustrandam tanti viri memoriam sumpsi. De eodem cum laude meminit eruditissimus Zenus in libro, qui inscribitur, *Dissertazioni Vossiane* (a), & alibi, ubi nimirum de Viris Litteratis Italiæ (b). Neque sine aliquo admirationis sensu Forcellinus eum nominabat.

Nec artium pulcherrimarum gustu, ut dicitur, Franciscus caruit. Quod ostendunt tabulæ Seminario ab eodem liberaliter dono datæ.

Plures discipulos idem habuit, qui in proximis diffitisque regionibus, qua editis libris, qua Virorum Principum benignitate fruentes, præclara in luce versati sunt; omnium præconio digni, quod aliis cum doctrina, tum pietate ac religione præfulserint.

Poetica quædam exstant, scripta non una lingua, quæ Canalis nomen præportant. Exstant, inquam, in Academia habita in funere Gregorii Cardinalis Barbadici ab alumnis Semi-

(a) Tom. II. pag. 129.

(b) Giornale de' Letterati d' Ital, tom. XVIII. pag. 413.

minarii Patavini, & typis ejusdem edita anno MDCCXVII. In Cathedrali Æde hujus urbis anno MDCCIV. Franciscus obtinuit Sacerdotium, dimissum a Joanne Baptista fratre (a) electo in Canonicum Archipresbyteralis Ecclesiæ Collegiatæ, quæ in Montefilice. Fuit idem pietate insignis: ob hanc in deliciis habitus a B. Gregorio Barbadico, unde eam didicerat. Neque majus illius probitatis argumentum ullum afferri potest, neque pulcrius. Haberet hinc, in quo se jactaret ac triumpharet oratio.

(a) Natus hic est Molvenæ, non longe ab oppido Marò-Riceni, anno 1658., III. Cal. Majas. A Collegio Trecentensi, ubi fuerat grammatica institutione præcultus, in Seminarium Patavinum transfertur Non. Novemb. anni 1672., humanioribus litteris imbuendus. Postea a B. Gregorio Barbadico in Oblatorum Congregationem adscribitur, quod illi verti debet magnæ laudi. In hanc enim admitterebantur tantummodo qui aliis præstarent non minus litteris, & ingenio, quam veræ pietatis studio. Quin ipsum aliquandiu esse voluit Vir Beatus inter suos aulicos ac domesticos, qui viri eximii; sacris redditibus non semel auxit, inter magistros Seminarii hujus excepit, eique tradendæ Ecclesiasticæ Historiæ munus commisit, Geographiæ peritissimo. Debenus ipsi tum generalem mundi totius, tum singularum quatuor ejusdem partium seorsum exhibitam descriptionem per typos Seminarii Patavini an. 1691. & 1692.: tum alias tabulas ad veterem Geographiam pertinentes, & insertas libro ita inscripto: *Tabula Geographica, quibus universa Geographia Petus continetur, a multis Auctoribus collecta, typis edita Seminarii Pat. an. 1699. in fol.*

Electus tandem hic, ut diximus, in Canonicum Archipresbyteralis Ecclesiæ, quæ in Montefilice, se abdicavit Sacerdotio, quo in Cathedrali Æde Patavina potitus fuerat. Ubi & quando obierit, mihi nondum compertum est,

tio. Id leviter indicasse satis habet historia, simplici rerum narratione contenta.

Delectabatur Cānalis frequenti sacrarum Scripturarum lēctione, & Operum SS. Patrum, ac recentiorum etiam sanctorum hominum, S. Teresiæ, Aloysii Granatæ, S. Francisci Salesii. Hæc ille legebat nativa lingua conscripta. Legebat etiam sæpe sanctorum hominum vitas, ex quibus facile omnino hauriebat solidæ virtutis decus ac religionis, se totum ad eorum exempla instituens. Quæ enim in his legebat, non referebat ad inanem eruditionem, sed putabat legem vitæ. Hinc illud cujuslibet virtutis studium, præsertim vero modestiæ, quæ in illo prorsus eminuit.

Franciscus doctrina, quæ in paucissimis est, excellens, cum paucissimis gloriæ dividens, viris litteratis cognitus, a viris litteratis ornatus, celari studet, & ignorari. In Monialium Confessionibus excipiendis, in iis regendis & instituendis postremum transigit suæ vitæ tempus.

Eum interim nervorum morbus aggreditur cum singultu, gravissimeque afflictatum paucis diebus e vivis eripit. XII. Cal. Augusti anno MDCCXLII. (a) undecoginta circiter

(a) Superiore anno decessit Ferdinandus Porrettus Paravinus. Inter Seminarii hujus alumnos descriptus fuit adhuc puer

ter annos natus decessit, eruditionis, & morum laude conspicuus.

VI.

puer, ibique aliquandiu postea magistri munus exercuit. Hinc evocatus, professus est in Schola Patavinæ urbis publica, unde tot exiere illustria in bonis artibus civium nomina. Primam partem Institutionis Grammaticæ a se confectæ bis edidit, post & alteram cum latina Profodia ad meliorem intelligentiam redacta. Utraque cum laude exceptæ, Ephemeridum rei litterariz scriptores de duabus ejus Orationibus commemorant, quarum una Josephi Bottari Episcopi Polensis, altera Ferdinandi de Obizzis vulgata in funere. Aliam quoque Orationem protulit Ferdinandus, quam habuerat in honorem S. Francisci Salesii; tum duas latinas Epistolas, & alia quædam poetica, cum B. Gregorii Barbadiçi corpus erutum ex sepulcro, Decreto Almæ Curiz Romanæ, in decentiorem locum translatum est. Multa reliquit inedita, partim soluta numeris, partim nexa. Nec aliis ornamentis caruit. Theologica laurea insignitus, coopertus fuit in Theologorum Collegium, & in eorum cœtum, quos *Recuperatos* vocabant. Vir de suis civibus egregie meritis erat in oculis omnium civium. Sepultus jacet in Templo Virginis Dolentis, vulgo *il Torrèfino*, cum hac inscriptione:

HIC JACET

FERDINANDVS PORRETTI PAT.

SAC. TH. DOCT. COL.

ET CIVIT. PVB. PRÆC.

OB. A. C. M. DCC. XLI. IV. KAL. MART.



V I T A

JACOBI JACOBETTI.

VEnio nunc ad Jacobum Jacobettum, virum eximio ingenio, & eruditione multiplici; Græcæ vero linguæ notitia insignem. Natus is est Patavii anno MDCLXIII., & sexto decimo ætatis in Seminarii alumnorum coetum adscriptus est a B. Gregorio Barbadico tum Patavinorum Episcopo. Vel a pueritia pietatem prætulit Jacobettus, & incensum animum ad studia litterarum. Quantum in his profecerit inter tot earum præsidia, illud indicio est, quod ab eodem B. Gregorio, ingeniorum judice sagacissimo, in præceptorem electus fuerit vix absoluto litterariæ institutionis curriculo.

Itaque humaniores artes profiteri coepit ex ejus jussu, easque docuit plures annos cum in Patavino Seminario, tum in Collegio Tre-

c

stensi

stenſi (a). Hæc autem erat illius vitæ ratio. Cum Græcis Latinisque Scriptoribus, quorum erat copia ſeptus, vivebat aſſidue zotheca incluſus, horum conſuetudine fruebatur a quolibet impedimento remotus. Hos adoleſcens & ſenex, hos coluit plurimum tota vita. Ingens porro exſtitit ex tanta familiaritate cognitio. Nihil fere in iis occurrebat, quod ille non expendiſſet ſolertiſſime. Hinc alii, ſi quid obſcuri inveniſſent in Græcis præcipue Auctoris, ad eum, certum quaſi ad interpretem, convolabant; viri etiam multum docti ac litterati, inter quos Dominicus Lazzarinus, politioris humanitatis Profeſſor in publico Patavino Gymnaſio, & Græcæ linguæ in primis peritus. Atque hic quidem olim in viam ſe dederat, ut eum conſuleret. Offenderat enim locum in Oratione quadam Demotheſthenis valde implicitum. Cum Jacobettus de repente fit illi obſivus. Salutant invicem, uti mos; tum Lazzarinus: „Quam opportunus „mihi occurris, inquit, Jacobette! Te ſci- „licet nunc adibam,; eique ſui itineris cauſam aperit. Cui Jacobettus ſtans, ut dicitur, pede in uno, illico rem expediit. Non prætermittam alterum, qui mihi occurrit, Hiero-
ny.

(a) Vide adnotationem (a) pag. 26.

nymum scilicet Ascanium Justinianum . Hic nonnullas Demosthenis Orationes, quas in Italum sermonem verterat, subjecit Jacobetti iudicio, ut refert Antonius de Comitibus (a) . Primas deferebant omnes in Græcis litteris Jacobetto: in quibus ille, ut scribit Facciolatus, *sine controversia præstabat* (b) .

Earum usum ut expeditum & aliis redderet, Græcam Grammaticam ad meliorem formam redegit, alia recidens, ubi opus erat, & alia adjiciens. Tum emendavit & auxit oratoriam, uti ajunt, Calligraphiam (c), alatis plurimis & selectis dicendi modis ex Aristotele, Xenophonte, Thucydide, aliisque permultis, quos probe noverat, optimæ notæ Auctoribus. Quaque ipsi ratione usurpari debeant, exemplo docet, & varias nominum ac verborum significationes ostendit. Sic etiam ab adulescente parari potest elegantia & copia sermonis hujus, qui eidem familiarissimus .

Quoties enim ipsi lubitum, loquebatur græce; quodque mirum, tam expedita ac profuens

c 2

fluens

(a) L' Abate Giacomelli, che nella perizia della lingua Greca nulla cedeva a' più famosi del XVI. secolo. Opere di Ant. Conti tomt. I. pag. 41.

(b) Fasti Gymn. Pat. tom. II. p. 319.

(c) Edita fuit an. 1692. typis Seminarii Patavini, & dicata a Jacobo, Nicolao Calciachio Cretenus in Patavino Gymnasio humaniorum litterarum Professori.

fluens erat loquendi celeritas, tam expolita concinnitas, ut meditate, non ex tempore videretur loqui, stupentibus Græcis ipsis. Ex hoc præcipue fonte profluxit ad famam, ut animadvertit etiam Cesarottus in Patavino Gymnasio Professor Linguae hujus experientissimus, in Epistola ad Deninam, ubi commemorat de civibus Patavinis litterarum laude præstantibus, quos inter recenset Jacobettum. Sed de celebritate illius paulo post: nunc alia de ejusdem eruditione.

„ Quidquid (inquit Babolinus in Episto-
 „ la ad Illustrissimum ac Reverendissimum Jo:
 „ Minottum Episcopum Patavinum, præmissa
 „ Opusculis Jacobetti) quidquid eruditionis,
 „ quidquid humanitatis Seminarium Patavi-
 „ num in alumnos vere industrios, & propi-
 „ tandæ latinitatis avidissimos diffudit, ille
 „ hausit a primis unguiculis „.

Livium præ ceteris Latinis Scriptoribus in deliciis habuit, solitus ipsum assidue legere diu noctuque. Hunc scribendo exprimere studuit intenta cura; quem præterea illustrandum suscepit cum Ferratio, ut facilius & alii possent ad eum accedere.

Plurimum quoque Jacobus valuit insectibendorum lapidum scientia (a). Quæ quidem
 laus

(a) Constat id ex gravi & accurata censura, qua non unam ex Latinis inscriptionibus notat. Censura non est edita, sed tantum scripta.

laus non exigua, nec omnibus iis communis, quibus commune est latine scire & scribere.

Verum diutius latere non poterat vir splendidis muneribus jam maturus. Georgius itaque Cardinalis Cornelius, qui in B. Gregorii Barbadici locum suffectus fuerat, ad studiorum Seminarii regimen Jacobettum eiecit (a). Talem vero ille se præbuit in amplo munere, ut & litterarum bonum promoveret, & honorificum sapientissimi Cardinalis de se iudicium probaverit.

Per hæc tempora Romam perrexit una cum Vaira, qui electus fuerat in Episcopum

c 3

Adrien-

(a) Immaturâ enim morte præreptus fuerat Petrus Antonius Coppo, qui studiis iisdem præerat. Hic Patavii natus Seminarium ingressus est an. 1685. Sux institutionis cursu confecto, ibidem docuit Sacras litteras, & veteres Orientis linguas. Poetica etiam in arte valuit & oratoria. Multiplici laude florens non pauca reliquit monumenta, pleraque inedita, quæ in Seminarii Bibliotheca servantur, partim ad graviores, partim ad politiores litteras pertinentia. Tam multa ac dissimilia studiis admodum vigente ætate complexus, magnam sui expectationem commoverat. Salomonium audire præstat, qui eum nobis exhibet, paucis quidem, sed solidis lineamentis expressum (*Ap-pend. Inscript. Pat. pag. 168.*).

„ Petrum (inquit) Antonium Coppo hujus Seminarii alumnus, illustri ac celeri ingenio virum, oratoris facultatis, Poëtos, linguarum Latinæ, Græcæ, Hebrææ, Chaldææ, Arabicæ, Syriacæ, Sacrarumque Scripturarum ac Theologiæ peritissimum; a quo multa, & cum magna spe expectabamus; sed, pro dolor! tot virtutum gemmas mors imature amputavit

„ An. MDCCV. die sexta Maji, ætatis suæ XXXI „.

Adriensem. Mox adiit Summum Maximumque Pontificem Clementem XI., sibi ad eundem aditum aperiente Legato Veneto Laurenzio Theupolo. Benigne exceptus & interrogatus a doctissimo Pontifice Jacobettus de intima Seminarii Patavini forma, de ratione studiorum, præcipue de linguis, de Typographia, ita respondit, ut aliquam ipsi injecerit admirationem sui. Ultra dimidium horæ Pontifex cum detinuit, tum dimisit donatum largiter *Indulgentiis*, quas tantum is postulaverat & sibi, & aliis. Tum perlustrare urbem cœpit studio videndi quæque pulcherrima. Antiquitatis præcipue monumenta & exquirebat accuratissime, & avidissime contemplabatur Jacobus. Errabat passim solus, cogitabundus, in sese abditus. „ Ibi (sic ille de se) ibi peregrinantes nihil fere fuit in operibus manu factis, nulla tabula, nullum simulacrum, „ nulla supellex, quam non inviseremus, „ (a). Mox hæc addit: „ Publicas, ac privatas domos, custodita & incustodita loca peragrabamus. Per plana, per colles, saxeta, dumos, pervia, impervia venantium more conquirebamus. „. Nullum præ amore harum rerum sentiebat incommodum. Quin
„ ipsa

(a) Opusculor. pag. 30.

„ ipsa semel marmora , fragmina ipsa ac
 „ rudera, illius quondam florentissimæ urbis
 „ reliquæ „ (a), magna cum voluptate cum
 detinebant.

Locorum illorum maxime, ut opinor ,
 commovebatur adspectu. Eorum enim ipsi ve-
 niebat in mentem, quæ in Historicis antea le-
 gerat. Audire quodammodo videbatur sibi &
 aspicere claros viros, quos ibi quondam vi-
 xisse acceperat. Acrius aliquanto & attentius
 de his locorum admonitu cogitabat. *Magna
 enim vis admonitionis inest in locis* (b).

Nec ea tantum invisit, quæ patent omni-
 bus, & oculis sunt exposita. Ei ad interiora
 quælibet , ut supra vidimus , patuit aditus,
 Veneti præcipue Legati studio, & auctoritate,
 qui noverat ipsum a Cardinali Cornelio a-
 vunculo suo magni fieri. De illius beneficen-
 tia & humanitate sic in sua quadam Epistola
 Jacobettus: „ Ejus, inquit, benignitate fruor
 „ incredibili: sæpe cum illo remotis arbitris,
 „ mensæ etiam splendidissimæ adhibitus, con-
 „ quisitus, si qua dies prætereat, qua non
 „ adsim (c).

c 4

In.

(a) Opusculor. p. 30.

(b) Cic. l. V. de Finibus c. I.

(c) Opusculor. pag. 170.

Interim Roma Patavium rediit, ubi, Seminarii cura dimissa, tranquillam vitam agebat, honesto in otio. Accidit non multo post, ut ætatis missionem obtinuerit Canonicus Carlottus vir optimus, & in publico Patavino Gymnasio Ethices Professor. Ad hanc tradendam vocatus est a Litterariis Triumviris Jacobettus an. MDCCXVIII. XV. Cal. Septemb. Recusat hic honorem tantum sibi ultro oblatum (a), qui a plerisque expetitur votis omnibus, & omnibus etiam officiis quæritur. Non quod laboriosum munus effugeret, cum inter labores extinctus sit; sed quod eidem sustinendo, uti decet, tunc imparem se putaret. Fortasse quod deditus aliis studiis fuisset semper antea.

Detrectanti occurrunt doctissimi, eidemque amicissimi viri duo hujus ipsius publici Patavini Gymnasii Professores, Parmesanus a Curtivo de Sanctis, & Joannes Gratianus, quorum utrique perspecta erat Jacobetti solertia, & plane cognita. Honesta qualibet ratione instans uterque nititur dimovere hominem de sententia. His auctoribus tandem cessit, & Magistratus optime de se sentientis judicio acquievit.

Post

(a) Hoc narrat Sebastianus Franzonus in Epistola ad Amicum de vita & studiis Jacobi Jacobetti.

Post biennium cœpit aperire adyta gravissimæ disciplinæ. Utque erat Græcæ linguæ scientissimus, Aristotelem dedit summa fide & elegantiâ expositum. Ex ipso enim, tanquam ex fonte, purius hauriebat vel abdita quælibet ejus sensa, & exhibebat suis Auditoribus eadem integra, defæcata, sincera: unde Aristoteli novus splendor, illi novæ laudis accessio.

Hinc, licet Cathedram ex instituto conscenderet hora pomeridiana, quæ molesta esse solet, fieri tamen frequens ad eum concursus, non tantum juvenum, sed virorum quoque præstantium, quos ille sibi devinxerat cum opinione doctrinæ, tum facilitate & humanitate. Aderat enim omnibus ad se aduentibus non modo publice, sed etiam domi privatim ex consuetudine; omnibus præsto erat, notis, ignotis, civibus, exteris, *consilio, voce, scripto* (a). Nec unquam protulit, quæ aliis rogatus scripserat, vel dictaverat; nec eorum nomina, ne imminueret illorum famam.

Tot ille distentus curis, ubi desiderata est ejus opera, non defuit Seminario: cui præfectus a Cardinali Joanne Francisco Barbadiço, qui Cardinali Cornelio proxime in Episcopo-

(a) Idem Franzonus loc. cit.

scopatum successerat, strenue (ut scribit Babolinus) gravissima praesidis exquebatur officia (*).

Pernumienſi Canoniatu auctus eſt, ut oſtendit ſepulchralis inſcriptio: ſed a quo, vel quo anno, mihi non conſtat.

Multa latine & græce ſcripſit, cum ligata numeris, tum ſoluta. Leſtiora continentur volumine, quod ita inſcribitur: *Opuscula politioris litteraturæ*. Venetiis illud excuſum eſt anno poſt ejus mortem, ſcilicet MDCCXXXVIII., & Archiepiſcopo Joanni Minotto-Ottobono Epicoſcopo Patavino a Babolino dicatum.

Anno vero MDCLXII., quo Patavii Gregorii Barbadici recens Beatorum Faſtis adſcripti ſolemnia celebrabantur, in Italum ſermonem verſa prodiit Oratio, quam latine Jacobettus ſcripſerat in ejus funere.

Ephemerides litterariæ Venetiis editæ an. MDCCXXXVIII. de alio ejusdem libro mentionem faciunt, cujus hic titulus: *Elementi di Rettorica*.

Alia præterea non pauca ejus ſcripta, Græca, Latina, & Itala, quæ nunquam edita, ſervantur in Seminario, una cum tabula, quæ eundem exprimit.

Quæ typis prodita, arriſere plurimum littera-

(*) In Epistoſola præmiſſa Opusculis, de qua ſupra.

teratis viris. Lipsienses Eruditi, quorum censuram subiere Opuscula politioris litteraturæ an. MDCCXLI., in Jacobetti laudes effusi *Doctorem celeberrimum* illum prædicant, *virum facundissimum*, *Latine & Græcæ linguae perquam gnarum*: *eruditionem ejus eximiam* dicunt, ejusque *Orationes præ se ferre testantur acutam, & brevem elegantiam, ac propemodum aliquam formam Atticam* (a).

Pappadopolus in sua Patavini Gymnasii historia eundem vocat *Oratorem clarissimum*, tum hæc addit: *Musas Atticas & Ausonias publica utilitati servire cogit, hisque mitigat Ethices supereiliosius ingenium* (b).

Jacobæum Facciolatus appellat *virum acri quadam ingenii vi* (c).

Franzonus in Epistola *De vita & studiis Jacobi Jacobetti*, ejusdem Opusculis præmissa ita scribit: *Jam stilus ejus pressus fuit, & con-eisus, plenus acuminis, plenus succi, & quem paucis contigit imitari* (d).

Illud vero prorsus eximium elogium est, quod Jacobetto jampridem texuit Joannes Antonius Vulpus in hoc eodem Patavino Gymna-

(a) Acta Erudit. an. 1741. pag. 476. 477.

(b) Lib. II. c. XLIII. pag. 182.

(c) Fast. Gymn. Pat. tom. II. pag. 319.

(d) Pag. 16.

mnasio Professor celeberrimus. Is itaque in Præfatione in libros Severini Boethii de *Consolatione Philosophiæ*, quos eidem dicat, multus est in ejus eruditione extollenda. Fere neminem fuisse affirmat ex studiosis adolescentibus ejus temporis, qui non profecerit eo magistro. Neminem exuisse barbariem, & coluisse amœniora studia, cui ille ad id hortator non fuerit, adjutor, auctor: dignus propterea, ut addit, cui (si tempora paterentur) excitandum curarent homines insigne monumentum in celeberrimo aliquo loco urbis hujus eruditissimæ, ut olim Delphi Leontino Gorgiæ (a).

Alios præterea multos ex doctis habuit Jacobettus addictos sibi ac deditos, ut ex ejus epistolis clare patet. Præ ceteris Vincentium Vicarium, Poetam Vicetinum, virum ornatissimum. Fuit hic admirator maximus Jacobetti. Hanc in eum admirationem jam tum imbiberat, cum eundem Patavii audiret. Mutuis uterque epistolis post solebat sese profequi. Jacobettum viventem honesto quovis officio Vicarius coluit, mortuum suaviter deflevit ecloga, quam cum aliis eclogis, & aliis Latinis versibus postea edidit. Habebat etiam in

(a) In libris Catminum, & Opusculor. Patavii editis apud Jos. Cominum, anno 1725. pag. 247.

in suo cubiculo parietibus appensam tabulam referentem Jacobetti imaginem. Ibidem hanc voluit, quoad vixit, uti narrat qui de vita ac studiis illustris hujus poetæ breviter & eleganter scripsit (a). Tanta doctrinæ Jacobetti laus fuit! Non minor vitæ.

Erat in hoc viro comitate condita gravitas: nec senectus mores mutavit (b). Quare omnibus carus fuit; omnes optabant illi evenire prospera. Invidiæ inimicus alienam industriam fovit, illud sæpe repetens, *neminem alterius qui suæ consideret, virtuti invidere* (c). Sua sorte contentus tranquille vixit. Cultus simplicitas, victus frugalitas, vocis auctoritas eum commendabant.

Suis laudibus non admodum delectabatur. *Frontem contraxi* (ita respondit amico, qui sibi scripserat), *nec degustavi in illo uno, ubi large effuseque de me* (d). Humili loco natus nunquam fastidiit suæ obscuritatem familiæ; quin ultro eam præ se ferebat, & commemorabat vel ignotis. In eo non artificium, non simulatio, non fucus; vir erat omnino pro-

(a) In Epistola, quam præmisit Vicarii versibus Patavii editis anno 1750., typis Seminarii.

(b) Cic. de Senect. c. III.

(c) Id. Philipp. X. c. 1.

(d) Opusculor. pag. 221.

probi & antiqui moris, hanc præcipue ob causam adeo carus B. Gregorio Barbado. Eum ille benigne admittebat ac pæne familiariter vel ægrotus, libenter cum eo loquebatur de ipsius discipulis, de ratione scholasticæ institutionis, de aliis ad Seminarium spectantibus (a). Hunc aliquando itineris socium voluit & rusticationis; & eodem usus est anagnoste (b). De quo identidem Jacobettus in suis Epistolis. Idem rite postea in judicio de Gregorii sanctitate religiose testimonium dixit; quod admodum sane locuples. Is enim optime Cardinalem norat, & ejus Religionem, studiosus, quam qui maxime, & ipse Religionis.

Nihil ferre poterat, quod eandem læderet vel levissime. *Divina*, (sic ille nescio cui jocanti minus opportune) *divina, & quæ divinis adherent, nunquam tangito, nisi sancte* (c). Amicis omnia condonabat præter vitia; immo eos admonebat, veræ hoc & ingenuæ amicitiae officium putans. *Id nisi monerem*, eidem ait, *nō te diligerem* (d).

Græcas litteras promovendi, & alios juven-

(a) Opusculor. pag. 273.

(b) Ibid. pag. 198.

(c) Ibid. pag. 222.

(d) Ibidem.

vandi studio nunquam laboribus pepercit. Quare viribus corporis languere cœpit; vigebat tamen animo, virebatque integris sensibus. Domi posthac se continuit, quem solebant multi invisere, partim civilis tantum officii, partim etiam discendi gratia. Mortem oppetiit iv. Idus Majas anno MDCCXXXVII., ætatis 74. sui desiderium relinquens omnibus, præcipue egenis in quos eximie munificus. Sepultus jacet in Cathedrali Æde Patavina non procul ab Ara Virginis Deiparæ cum hoc titulo, cujus auctor Sebastianus Franzonus:

HIC

HIC IACET
 IACOBVS IACOBETTI PATAVINVS
 CANONIC. PERNVN.
 IN PATRIO GYMNASIO PVBL.
 ETHICES PROFESSOR
 LATINÆ LINGVÆ MAIESTATE
 GRÆCÆ ERVDITIONE
 VTRISQVE STRENVE PROPAGATIS
 EXIMIVS
 VITÆ INNOCENTIA ANIMI CANDORE
 COMITATE LIBERALITATE
 IN EGENOS SINGVLARI.
 OBIIT
 BONORVM VBIQVE OMNIVM
 MÆRORE INGENTI
 ANNO SALVTIS M. DCC. XXXVII.
 QVARTO IDVS MAII
 ÆTATIS LXXIII.
 ANN. COLLEG. CANONICORVM,

Sed cum Templi aream novissime straverint
 marmoreo lapide, sublatuſ est tituluſ.

pridie scilicet Nonas Januarias natus est Tauriliæ, rure non inamœno, colles inter Euganeos sito. Liberali ejus indole captus Beatus Gregorius Barbadicus ea tempestate Episcopus Patavinus, eundem ad Trestense (a) Collegium misit primis litteris erudiendum.

Duodecimum tunc ille agebat ætatis annum, quo completo, ab eodem Beato Viro in Seminarium translatus est, ubi se assidue postea, tanquam in ampliore palæstra, exercuit. Utque erat eximio ingenio & industria, facile ad se magistrorum studia convertit. Rhetoricæ ludo egressus rursus tractare cœpit litteras politiores, ad quas potissimum videbatur a natura factus, & earum cultum cum gravioribus disciplinis conjunxit. Philosophos biennio audivit, triennio vero ad Theologica incubuit; publicum etiam de iisdem certamen iniit, dein centumvirale Theologorum judicium subiit, eorumque suffragiis probatus in eorum coetum adscriptus est; tum se recepit in Patriam.

Hinc eodem anno MDCCIV. a Cardinali Cornelio, qui in Episcopatum successerat Barbadico, revocatur in Seminarium, ut Theologiæ

(a) Vide Opusculum *De singulari B. Gregorii Barbadii studio & amore in Seminarium Patavinum*, cap. XIV., edit. ejusdem Seminarii typis an. 1798.

giæ Professori subsidio sit. Quate is fungi cœpit Repetitoris officio. Mox Philosophiam profiteri jussus, Seminarii alumnos instituendos suscepit ea disciplina, qua vix percursa, ejusdem Cardinalis auctoritate transfertur ad Academiam (a), quæ ad ea usque tempora non alium, quam Studiorum Præfectum magistrum noverat; idemque præterea publice jubetur studiis proludere novo exemplo. Hoc enim Cardinalis levavit onere Jacobum Jacobettum, qui iisdem prætat, licet is esset vir multarum magnarumque rerum, Græcæ præsertim linguæ notitia excellens. Hic non multo post Ethicam tradidit in publico Patavino Gymnasio.

Sic Facciolatus ex alia in aliam provinciam tractus celeriter ad eam pervenit, quæ plurimum solertiæ postulat & laboris. Promovenda enim sunt Studiorum Præfecto tot artium atque scientiarum genera, tot excitanda ingenia, tot adhibenda præsidia. Hoc ille alacriter suscepit, rei magnitudine non deterritus. Ac primum quidem eruditæ linguarum, quæ magnis rebus atque doctrinis quasi solum parant, studium & exercitationem promovit; quod nisi

d 2

fu-

(a) Hoc est, certum eorum adolescentium, qui ingenio ad ea studia, quæ ab Humanitate sibi nomen vindicant, apto sepe ceteros excellunt.

suscipitur mature, suscipitur nunquam postea. Sunt enim sua cuilibet ætati studia, ejus omnino propria, nec in aliam cadunt. In addiscendis linguis occupari juvenes nolunt grandiores facti. Dedignantur hæc ad graviora progressi, nec ad eadem se revocari patiuntur, quemadmodum homines ad crepundia.

Ut hoc perficeret Facciolatus, expurgandum & amplificandum curavit Calepini Lexicon (a), quod editum post sæpissime. Id aggressus est adhibita Forcellini industria, viri admodum intelligentis & navi, quem ipse a juventute instruxerat, & huic studiorum generi assuefecerat. At cum vidisset illud emendari prorsus non posse, statuit novum conde-
re, quod latinas voces omnes, variosque earum usus complecteretur. Quod optime Facciolatus excogitavit, unus idem præstitit Forcellinus, ordinem ac modum tenens ab eo præscriptum. Quem præterea ille adiutorem habuit in aliis, in contexenda præsertim Italia Orthographia (b).

Pluribus in locis refecit Facciolatus Nizolii Apparatum, Grammaticam etiam Græcam, & Græcum pariter Schrevelii Lexicon
retra-

(a) Anno 1708. autum hoc ipsum fuerat a Jacobo Sartori Philosophiæ & Matheseos in Seminario Patavino Lectore.

(b) Vid. Epist. Forcellini præmissam ipsius Lexico.

retractavit, & auctius reddidit. Edidit Latinas Turfellini Particulas castigatas, auctas, & ad Seminarii usum accommodatas, & alia id genus egit nunquam cessans (a). Præcipue vero pueros ad multam ætatem versari volebat in unius Ciceronis scriptis (b), unde & ipse valde profecerat; cujus propterea Vitam litterariam breviter scripsit. Bis insuper quaque hebdomada instituebat eos ad Græca, qui scientiis quidem addicti erant, non tamen Academicæ; quam aliquandiu, etsi Præfectus Studiorum, rexit. Idem domesticæ Bibliothecæ custos, quæ ejus in primis opera adeo postea crevit, ut opus fuerit constituere qui eidem uni se totum daret.

Anno interim undecimo supra millesimum septingentesimum periclitari fortunam statuit, privatos Seminarii parietes latebrasque pertæsus, ac suam illam ad Grammaticam Orationem vulgavit. Res hæc omnino feliciter. Sic enim movit studia hominum, ut ea statim prodierit rursus Lipsiæ, & in Germania per eruditissimum Valchium (quæ profecto laus non exigua) & in aliis etiam quibusdam ex urbibus transalpinis.

d 3

Hoc

(a) Vid. Epist. xxvi. Facciolati, & quam idem Nizolio præmisit.

(b) Vid. Epist. ejusd. lvi.

Hoc prospero quasi omine crevit animus. Singulæ Orationes quotannis ab eodem vix habitæ, in lucem missæ; quæ postea in unum quasi corpus collectæ, in Italia simul, & extra Italiam fuerunt sæpius editæ.

Earum passim perhonorifica mentio fit in Actis Eruditorum Lipsiensium (a), quibus modo singulæ, modo plures oblatæ. Singularum ipsi synopsis exhibent, partesque transcribunt; tum Auctorem *eruditissimum & clarissimum* virum prædicant (b), dictionis vero elegantiam miram (c).

Nec minus splendide de iisdem & honorifice liber qui inscribitur: *Il Giornale dei Letterati d' Italia* (d). De Oratione autem ipsius *ad Humanitatem* multo quam de aliis magnificentius. Ait enim non potuisse Oratorem in re utiliore versari; in ea pertractanda usum esse artificio summo, & elegantia, quæ prorsus sua (e).

Ne-

(a) An. 1714. pag. 563., an. 1715. pag. 379., an. 1722. pag. 509.

(b) An. 1715. pag. 279.

(c) An. 1725. pag. 284.

(d) Tom. xvi. artic. viii. pag. 387., tom. xxiv. art. xiii. pag. 410.

(e) Tom. xx. artic. xvi. pag. 448. En ejus ipsissima verba: *L'argomento non può esser più utile, e l'Autore l'ha maneggiato con tutta l'arte, e scritto con tutta la pulitezza, e da par suo,*

Neque enim (ut animadvertit in sua quadam Epistola Vir eruditus (a)) indolem solum Latinæ linguæ perfecte noverat Faciolatus, sed totam etiam eruditionem, & Romanam antiquitatem tenebat; ut videretur non consuetudine tantum & jure Romano frui, sed civis plane Romanus. Certe ex recentioris notæ Scriptoribus dicendi laude superiorem habuit neminem, vix quemquam parrem.

Vix enimvero quemquam invenies, cui, æque ac illi, familiaris, & (ut ita dicam) domestica fuerit Latina lingua, quæ est fundamentum elocutionis. Hæc illi naturalis, ac prope ingenta, sponte fluens, illaborata, facilis, expedita ad sua quælibet cogitata cum dignitate exprimenda. Planum dicendi genus & æquabile; non quæsitus numerus, sed ex se cadens; opportuna non exaggerata eruditio; sine ostentatione doctrina, sine scurrilitate lepos, ubique denique ingenuus ille antiquitatis color.

Atque hic quidem eminet in ejus præcipue Epistolis. His mirifice delectati sunt litteratissimi viri, quibuscum exercuit ille diutis-

d 4

simè

(a) Vid. Epist. insert. tom. I. *Del Giornale dei Letterati*, edit. Pisis an. 1771. pag. 183.

sime eruditæ vitæ commercium. Quis latinitatis candor! quam pura, ac simplex dictio! quam exprimens! quam venusta! ut omnia brevi præcidit! ut ad naturam accedit in omnibus, ipsa etiam structura & collocatione verborum! Ita Tullio similis, ut sit etiam illius dissimilis. Ita ejus naturam induit, ut non amittat suam. Paucis. Dicam de his Epistolis, quod olim Brutus apud eundem Ciceronem de Cæsaris Commentariis: *Homines a scribendo deterruit* (a).

Scripsit etiam Epistolas Philologicas, & alia quædam Latina Opuscula a litteratis viris cum plausu excepta. Tum plurimas Præfationes, quæ eximiam produnt Auctoris manum. Nonnulla præterea de tota Vita Cardinalis Cornelii Episcopi Patavini Annalium more exaravit, præter Orationem, quam habuit in ejus funere. Vitam quoque edidit Philippi a Turre Episcopi Adriensis. Hanc (b) Lipsienses Academici cum compendio vitæ Cardinalis Cornelii (c) retulerunt in Acta. Quæ quidem bene loquendi laus magni habenda. Ut enim perfecta esset, „multis ille litteris, & iis „ quidem reconditis & exquisitis, summoque „ stu-

(a) De Clar. Orator. cap. xxv.

(b) Ann. 1717. mens. August. pag. 381.

(c) Ann. 1722. mens. August. pag. 512.

„ studio & diligentia fuerat consecutus (a) „
Unde „ plena illa litteratæ senectutis ora-
tio „ (b).

Suæ autem eruditionis specimen illustre exhibuit interpretatus celeberrimum Diptychum Quirinianum. In hoc enim exponendo Facciolatus ac Lamius secum feliciter consentientes præ aliis omnibus arrisere doctissimo Cardinali Quirino (c): licet hoc idem interpretandum suscepissent plurimi in tota Europa eruditissimi.

Emendare etiam cœperat commentarium, quod Pancirolus scripserat in Tertulliani Apologeticum contra Gentes. Sed non potuit ulterius progredi, coactus ipsum heredi, a quo id obtinuerat, restituere (d): unde illud postea emit Thomas Hobart Anglus. (e).

Adnotationes præterea vulgavit a se conscriptas in Tullii Orationes duas, scilicet pro Quintio, & Sexto Roscio Amerino, quibus breviter expedit difficilia, & clare Oratoris mentem exponit. Has mutuatus est Olivetus,
iif-

(a) Cic. de Claris Orat. cap. LXXII.

(b) Ibid. cap. LXXVI.

(c) Ut patet ex ejus Epist. ad Gorium pag. xi.

(d) Vid. Epist. xvi. & xvii. Facciol. Quæ vero ille emendaverat, servantur adhuc inedita in Seminarii Bibliotheca.

(e) Vid. Maphejū *Osservazioni Letterarie* tom. vi. pag. 349. & 435.

iiſdem adſcripto nomine Facciolati, quem virum vocat *inter Grammaticos excellentem* (a). Mox hæc adjungit: *Si cunctas, inquit, interpretatus eſſet illius Orationes, mihi magni muneris immunitatem dediffet* (b).

Ubi vero agitur de Litteratis Italiæ, & hic commendatur labor, & auctor laboris plurimum (c).

Idem illustravit adnotationibus Ciceronis de Officiis libros, & alia ejusdem cum iis conjuncta; oratorias quoque illius Partitiones, & Philoſophica (d); tum ejus Epistolam ad Quintum fratrem *de ratione regendæ Provinciæ*, tum Quinti Ciceronis ad Marcum fratrem *de petitione Conſulatus*, & hanc inſuper in Italam linguam vertit.

Circumfertur etiam Itala verſio librorum Ciceronis *de Officiis*, Facciolati nepotis nomen præportans (e). Hæc vulgo Jacobo Facciolato ejus patruo aliqua ſaltem ex parte tribuitur. Neque enim hic Latinam tantum, Italam quoque linguam eum laude excoluit; ut plane conſtat legenti librum, quem ſic inſcripſit:

(a) Poſt explanat. argumenti Orat. pro Quintio.

(b) Ibidem.

(c) Tom. xv. artic. xviii. pag. 457.

(d) Prodiſerunt hæc typis Semin. Patavini an. 1753.

(e) Edit. Venet. 1750. ex typogr. Albrit.

psit: *Il Giovane Cittadino istruito nella scienza civile, e nelle leggi dell' amicizia*. Quantum hic placuerit, variae ejus indicant editiones. Semel enim, iterum, ac tertio excusus est in Italia: semel quidem Neapoli, bis Patavii Seminarii typis; ac tandem Cracoviae prodit gentis ejus in linguam versus. Hunc Provisori & Assessoribus Coloniensibus, civibus plane cultis dicavit Facciolatus, ut illis gratum se ostenderet, a quibus illius civitatis jure donatus fuerat perhonorifice.

Interim anno sæculi hujus vigesimo tertio, XII. Cal. Majas a Seminario accersitur ad Logicam profitendam in publico Patavinæ Civitatis Gymnasio (a). Quod cum omnibus semper antea, tum illi in primis eximiae laudi. Etenim neque petens (ut scribit Pappadopolus (b)), neque volens eloquentissimus vir designatus est ad tantum munus a Litterariis Triumviris. Quod ille iniit publice XIII. Cal. Februarias anno sequente sua illa pulcherrima ad Dialecticam Oratione, quam jampridem in lucem misit.

Primum conductus est ducentis florenis, anno post auctum illi extra ordinem ad trecentos

(a) Idem Facciol. *Fast. Gymnas. Patav.* Part. III. pag. 305.

(b) Tom. I. c. 53.

cenos stipendium est, quod tandem crevit ad septingenos. Jus quoque illi concessum est Collegii Medici, cum jam Theologicum a prima juventute teneret.

Itaque in novo obeundo munere non vigiliis pepercit, non laboribus ad studiosæ juventutis utilitatem. Hanc erudiendam curabat publicis in Lyceo, & privatis institutionibus domi ex Magistratus imperio. Duos Posteriorum Analyticorum libros ex Cathedra, reliquas Logicæ partes explicare solitus erat privata in umbra.

Sexdecim annos docendæ Logicæ insumpsit, eamque tradidit non solum voce, sed etiam scriptis, quæ postea vulgavit. In his exponit doctrinam Aristotelis puris verbis, & familiari dialogo, qui modus exercendi juvenes & docendi maxime opportunus est, & vetustissimus. Sic etiam Tullius suas ad Marcum filium Partitiones dedit, minutatim interrogando & respondendo.

Hæc non semel edita, eorum utilitate perspecta; de quibus ita Dandinus in suo Dialogo (a): „Ab hisce Institutionibus, inquit, velim „Præceptores Logicæ non discedere latum
„ un-

(a) Erminii ac Meranii Dialogus, in quo Erminius ad filium suum erudiendam Institutionem parat, auct. Herc. Franc. Dandino. Casenz 1734.

„ unguem, non alio uti ordine, non aliis aut
 „ verbis, aut sententiis. Sunt enim & pru-
 „ dentia, & elegantia, atque eruditione infi-
 „ gnes; & ad eos, qui Logicæ arti dant
 „ operam, oblectandos aptissimæ „.

His Auctor postremo annexuit quasdam
 Acroases a se publice habitas in Lyceo, quas
 etiam separatim in vulgus protulit. Cum has
 legisset Muratorius, plurimum gratulatus esse
 dicitur Facciolato, quod de spinosis rebus &
 implicatis tam clare scripsisset, ac tam con-
 cinne.

Ita suam hanc Jacobus ornabat egregie
 Spartam, quam dimisit sub initium anni
 MDCCXL. cum eadem fuisset Metaphysicæ con-
 sociata. Tunc Senatus Decreto scribere jussus
 est Patavini Gymnasii historiam, quam antea
 scripserat Pappadopolus. Erat hoc sane magnæ
 difficultatis negotium, tum quia plurima deerant
 monumenta, tum quia multa ex iis, quæ
 non deerant, erant tam incerta, confusa, am-
 bigua, ut nullam detegerent ad verum viam.

Hinc ille cœpit undique, quascunque po-
 tuit, memorias legere, ex quibus duceret quæ
 postea scriberet, ne divinando narraret. Suis
 ipse impensis instruxit Tabularium, tum se ad
 exarandam historiam contulit. Non resumen-
 dum & continuandum alterius opus, sed rem
 ex integro reficiendam putavit, eamque expe-
 diit per quosdam veluti Fastos, ab eorum re-

gi-

gimine ductos, qui studentibus præfici solent in annos singulos.

Ac primum quidem edidit sumptu suo duodecim erudita Syntagmata, unde totius historiæ caperet quasi omen. His totam Gymnasii rationem, originem, instituta, leges, & munera explicuit, dein Fastos protulit, ubi in multis pléniora desiderantur, aliquando etiam mitiora; nunquam tamen elegantia, & exprimendi quæque facilitas, & ubertas verborum; ex quo fit, ut coactus eadem vel centies dicere, mirifice dictionem variet, & eadem dicat semper quidem apte, modo vero non plane eodem.

Anno tandem MDCCLV. IX. Cal. Sextilis missionem petens obtinuit, Decreto honorificentissimo, servato stipendio toto, una cum immunitatibus, & Collegiorum honoribus, titulo addito Professoris Emeriti. Non ideo tamen destitit a labore.

Exstant enim & alia plurima ab eodem edita. Animadversiones criticæ in Lexicon Danctii ad usum Delphini; Viatica Theologica X.; Vita Jesu Christi, Mariæ Matris, & S. Antonii Patavini Latina & Itala; *La Sfera, e Geografia in compendio per le Scuole de' Fanciulli*; de Vita & Actis Christi secundum utramque generationem divinam & humanam; & alia, quorum indicem exhibeo post exitum hujus Vitæ.

Ex

Ex his, quæ doctis omnino arriserint, pauca invenies; quorum pleraque scripsit postremis annis, ne otiosus esset, & ut aliquod levamen pareret senectuti. Ceterum qui alia ejusdem opera legerit, Latinas præcipue Epistolas & Orationes, talem eum judicabit, qualis revera est, & qualem ipsum prædicat jamdiu fama, virum scilicet magni nominis litteratum.

Enimvero paucissimi vel in historiis occurrunt, qui in tanta, quanta ille, luce versati sint. Splendidis decoratus muneribus honorifice est habitus a litteratissimis viris; Morgagno in primis, Vallisnerio, Pontedera, Peleno, qui omnes publici Patavini Gymnasii lumina.

Neque hi tantum ei plurimum detulere, sed & alii viri doctissimi, præcipue Philippus a Turre Episcopus Adriensis, Scipio Mapheus, Ludovicus Ant. Muratorius, Joseph Torellius, Comes Camillus de Silvestris, Hieronymus Lagomarsinus; tum Angelus M. Card. Quirinus, Alexander Archiepisc. & Stephanus Card. Borgia.

Immo etiam exteri, præ ceteris Fabricius, Valchius, Gesnerus, Goldbachus, Brencmannus, Bayerus Litteratorum Germaniæ principes. Horum alii ei obtulere & dicarunt sua (*); alii ipsius Orationes edendas denuo cura-

FINIS

(*) Ejusd. Facciol. Epist. xxy., & xxx.

runt in suis regionibus (a), alii eo usi sunt
tanquam suarum controversiarum iudice (b).

Hos ille sui fautores habuit, laudatores,
admiratores, amicos, quos & ipse studiose
diligenterque coluit. Hos sibi devinxerat non
adulationis studio, cui erat omnino infensus,
sed sola commendatione virtutis.

Nemo, qui alicujus nominis esset, Pata-
vium veniebat ex remotis provinciis, quin
Facciolatum præ aliis litteratis viris inviseret.
Quod in tanta eorum frequentia magnum. Ad
eum adibant viri præstantes cum genere, tum
doctrina, & dignitate; Episcopi, Præsules,
Cardinales. Quin ipsi Reges, Summique Pon-
tifices cum ornarunt.

Nimirum tanti nominis fama permotus
Rex Lusitaniæ cum depoposcit a se instituti
Collegii moderatorem. Remanendi veniam ut
sibi daret, rogat Facciolatus causatus ultimam
senectutem. Rex instat, ac eum jubet saltem
scribere, quæ idonea consilio putet. Cui adeo
fuere grata quæ scripsit, ut idem plurimas, ac
pretiosas Sinensium patinas ac vascula, eas
quidem mensæ, hæc vero delicatis potionibus
inservientia dono mitti erudito viro jussit
domum usque.

Omnibus his imponit quasi quandam co-
roni-

(a) Epist. XLIV.

(b) Epist. LXXIII.

ronidem Benedictus XIV. in Epistola ad Facciolum, præmissa Operi *De Servorum Dei Beatificatione, & Sanctorum Canonizatione*, quod rursus edendum Seminarii Patavini typis magnifice idem curaverat Facciolatus. De ipsius virtute, peritia, solertia, præclare Pontifex sapientissimus. Mox hæc addit: *Qua perhonorifica de te sententia ut neminem lateat, maneatque animi nostri memoria, atque eximia tua laudis, publicum monumentum Apostolicis Litteris in forma Brevis testari volumus.* Magna laus est a laudato viro laudari: quanto major ornari amplissime a Pontifice laudatissimo?

Sic Jacobi nomen evasit tota Europa celeberrimum. Immo etiam ultra ejusdem Europæ terminos.

Postremo tempore ætatis suæ Jacobus capitis gravedine laborabat, cum accepit epistolam sibi Ferraria missam a quodam Societatis Jesu Presbytero, qui venerat Angelopoli. Testabatur hic, nihil sibi potius fuisse, ex quo primum nactus esset quietis locum, quam ut ad ipsum virum ornatissimum scriberet. Usurpari enim cum laude aiebat Facciolati nomen etiam in novo mundo. Eum ibi appellari ab omnibus patronum ac *restauratorem* litterarum. Cui festive admodum Facciolatus. Erat enim illi prope natura insita brevis & arguta epistolarum concinnitas.

Fuit idem acuto ingenio atque versatili,

valuit quoque memoria plurimum; utque omnia facile percipiebat, sic retinebat quam diutissime quæ perceperat. Optime differendæ ratione instructus erat, cum eruditus Græcis litteris, & historia. Nota quoque habuit Philosophorum systemata. In poesi non admodum excellebat, plurimum in eloquentia. In familiari sermone parum disertus, maxime vero præstans facilitate scribendi etiam difficilia & obscura. Singularem in hoc excellentiam assecutus fuerat, & excellentiæ opinionem.

Hinc ejus Vita cum picta imagine prodiit Augustæ Vindelicorum anno sæculi hujus septimo & quadragesimo, ut videre est in *Decade VI. Pinacotheca Scriptorum nostra atate litteris illustrum*, a Jacobo Bruckero instructæ. Etiam in Seminario Patavino servatur tabula referens illius imaginem ab ipsomet dono accepta, vivide autem expressa a Maria Scanferla Virgine probissima (a).

Quæ breviter hætenus ac simpliciter dixi, commendare nobis debent illius memoriam; at illud maxime, quod tantam ingenii laudem magna cumulavit laude vitæ.

Quæ illius in amicos voluntas! quam benevola! quam ingenua! De his in suis epistolis honorifice. Hos ad se adcentes humaniter

(a) Edita est ejus Vita Patavii cum hoc titulo: *Memorie Storiche intorno la Vita di Maria Domenica Scanferla, Padova 1766. per li Gonzatti.*

ter excipiebat. Mittebat etiam ad eos munuscula, sæpe fructus, quos legerat ex urbano domestico suo prædiolo (a). Hos demereri curabat honesto quovis officio, non adulationis obsequio, quæ eidem etiam in aliis omnino invisa, immo vel levis illius suspicio. *In posterum* (cuidam inquit) *si me amabis, sic facies, ut nihil scribas, nisi ipsum per se jucundum, idest monita, non laudes* (b). Et alterum adhortatur, ut laudatoris personam deponat, seque totum ad monendum conferat. *Excute* (ait) *nostra omnia, argue, castiga* (c).

Pro amicis subibat incommoda, non raro & impensas. Hos dissidentes inter se conciliare studuit (d). Horum propagavit ad posteros nomen. Quæ ab his acceperat beneficia, libenter commemorabat. Nihil curabat diligentius vitare, quam ingrati hominis notam.

Multum tribuebat amicis; plus tamen veritati. Hac nihil antiquius habuit. Ego (sic is de Octavio Ferrario) *memoriam ejus viri vehementer colo, plus tamen veritatem colendam*

c 2

puto

(a) De Horto Jacobi Facciolati vid. Hendecasyllab. 20. tom. x. Oper. Jo. Bapt. Roberti pag. 296.

(b) Epist. lvi.

(c) Epist. xxi.

(d) Epist. lxxxi.

puto (a). Pro eadem tuenda subiit invidiam, acrius quandoque pugnans, non, ut ipse fateatur, *natura acerbioris vitio*, sed rei necessitate compulsus (b). *Nimis longe* (inquit) *lateque sonabat tantorum interpretum fama*, nec nisi clamore ingenti vincenda erat (c).

De se vero, de suis operibus omnino dimisse. Hæc appellat modo litterulas (d), modo nugæ: *Nugæ nostræ non tanti erant* (e). Et Lagomarsino scribens, *Video* (ait) *quam procul absum ab eo fastigio, in quo me nimis benevole collocas* (f). Et alii: *Nolim suspiceris* (inquit) *me tibi tribuere aliquid, qui in hunc Professorum ordinem nescio quo pacto irrepsi* (g). Quod sane in viro tantæ celebritatis atque præstantiæ mirum. Quamquam qui vere litterati sunt, non tument; pusilli in digitos eriguntur.

Ceterum non caruit obrectatoribus, quibus nunquam respondit, licet non semel ab iis acriter laceffit. Erat enim ipsi prudentiæ & sapientiæ plurimum. Temporibus uti nove-
rat,

(a) Epist. XIII.

(b) Ibid.

(c) Ibid.

(d) Epist. XXIII.

(e) Epist. LXX.

(f) Epist. LVI.

(g) Epist. XCIII.

rat, non discordiosus, non præceps, peritus, quam qui maxime, rerum humanarum.

Seminario, cui aliquandiu præfuit (a), additus promovit ejusdem bonum. Hujus Bibliothecam augendam curavit libris plurimis, optimis, rarissimis. Multos etiam e suis in eandem contulit, Thecas præterea antiquo opere, & summo artificio. Nonnullas quoque tabulas dono dedit. Qua valebat auctoritate multos juvit, multos consilio, & opera (b).

c 3

In

(a) Sic ille: (*Fest. Gymnas. Patav.* Part. 111. pag. 73. ad an. 1741.), „ Joannes Minottus Seminarii, quod in ipso „ quoque Pontificis diplomate commendatum illi fuerat, præ- „ cipuum cogitationem suscepit, usus opera nostra, & consilio „ Vicarii sui Antonii Corneani „.

(b) Facciolarum maxime in se propensum expertus est Andreas Bassanus Foro-Julienſis. Hic in Portu-Naonis natus & honeste institutus est, & primis litteris eruditus. Ad ætatis annum pervenerat sextum decimum, cum Patavini Seminarii alumnis adscriptus, Rhetoricæ statim principia aggressus est. Amœnioribus, & gravioribus disciplinis strenue percurſis, Vicetiam se contulit, & in eo Seminario Magistri munus exercuit. Quadriennio circiter post Patavium rediit, ubi hospitio exceptus a Facciolato aliquandiu diversatus est apud ipsum, eoque hortante *Enchiridium* ex opere Benedicti XIV. P. M. *De Sacrificio Missæ* ad Sacerdotum usum conſlavit, & typis edidit Seminarii an. 1747., quod editum rursus non multo post.

Hinc Venetias petens instituendos suscepit nobilissimos juvenes Maninæ Gentis, inter hos Ludovicum, quem postremis hisce temporibus Ducem vidimus. Aliquot annos post Bassanus Concordienſis Canoniatu auctus est, quem dimisit, jussus a Benedicto XIV. humaniores Litteras proſiteri in Seminario & Collegio Montis Falischi. Ibi non solum docuit, sed & studiis præfuit, & de Lingua Græca, qua valebat plurimum,

Latine

In plurimos, eo curante, collata sunt honorifica munera.

Pensionem, ut ajunt, reservari sibi obtinuerat ex Canonicatu Atestino, quo se spoliaverat. Plures habuit in eum successores; inter hos Angelum Blancum, hominem sibi deditissimum, maximeque devinctum, *Quo non devinctior alter* (a). Hunc levavit parte oneris

Latinam Orationem habuit luculentam & eruditam, quam Romæ anno 1753. publici juris fecit; ut etiam alterum *Enchiridium* ex opere ejusdem Benedicti XIV. *De Festis D. N. Jesu Christi, & B. Mariae Virginis, & de Sanctis ad Ecclesiam Bononiensem pertinentibus*, typis Seminarii Patav. anno 1756.: utrumque eidem Benedicto dicavit, illam inscriptione, hoc ad eundem præmissa Epistola.

Exstant nonnulla, quæ ad ipsum pertinent, in libellis, qui dicuntur vulgo *Raccolte*; & quædam etiam inedita, quorum alia soluta numeris, alia adstricta, inter quæ & Græca, apud ipsius hæredes. Sux quoque inchoaverat historiam Patriz; sed non potuit ulterius progredi, necessariis monumentis carens.

Interim evaserat celeberrimus, propagata per typos fama. Illustribus adscriptus Academiis, litteratissimis viris in pretio fuit, Vulpio præsertim, & Facciolato, quem & absens litteris, & præsens omni prorsus officio coluit. Virorum etiam Principum studium in se convertit; præ ceteris Cardinalium Livizani & Boschi. Quin ipse Benedicto XIV. adeo se probavit, ut ab eodem oblatus illi fuerit Episcopatus, cui se subtraxit Andreas non vulgari moderationis exemplo. De eodem mentionem faciunt Ephemerides Litterariz (*Le Nouvelle della Repubblica Letteraria*) ad annum 1747., & Mazzucchellius vol. 2. pag. 522.

Anno hujus sæculi nono & quinquagesimo ex hac vita migravit, moerentibus spectatissimis viris, qui eundem funebri laudatione exornandum curarunt.

(a) Horat. l. 1. Sat. v. vers. 43.

ris ea conditione, ut Atestinos Clericos litteris institueret, quoad id Canonialis officii ratio pateretur.

Quæ porro illius misratio in egenos! Videbatur hæc cum illo egressa ex utero matris. In eisdem, pæne dixerim, prodigus, lacrimis etiam horum prosequabatur ærumnas. Cum aliquando ex vi morbi non satis sibi constaret, ea effutiebatur, quæ certissimum ejus propensæ in indigos voluntatis indicium. Eum sensere beneficium præ aliis omnibus Tauriliæ pauperes, quibus subsidii plurimum testamento legavit.

Ad ejus Religionem quod attinet, fuit ea quidem summa, sed a qualibet ostentatione aliena. Hanc & verbis prodidit & factis. Eximiam illam Sinensem supellectilem, de qua diximus, totam contulit ad majorem divini cultus magnificentiam.

Beatum Gregorium Barbadicum venerabundus colebat, cumque in suis Orationibus vocat divinum virum (a). Quidquid ab eo constitutum, ita se testatur accipere, ut divina debent (b). Ejus imaginem pingi jussit impensis suis. Hac Seminarii in Templo or-

c 4

na-

(a) In funebri laudatione Cardin. Cornelli.

(b) In Orat. ad S. Scripturam.

navit illius altare a se instauratum, ad quod frequenter accedebat ipse oraturus.

Nec satis habuit, quæ Catholicæ Religionis sunt, exercere: eandem promovere studuit impense vel apud eos, qui non colunt Romana Sacra.

In quadam sua Epistola ad Joannem Fabricium, qui dixerat se esse Catholicæ Ecclesiæ membrum, sic eum alloquitur: *Utinam ex animo dicas, tibi que Deus Optimus Maximus in re hac tanti momenti præsto sit. Hac est summa rerum, dulcissime Fabrici; cetera nugæ* (a). Nec uni tantum Fabricio, & aliis similia incitamenta dedit. Hæc ille Henrico Brenemann: *Vide, (inquit) dulcissime Brenemann, ne in tanta litterarum doctrinaque luce id παραβλήτης, quod unum est momenti maximi* (b). Adeo ejus sensa in veritatem prona!

Ætate nondum provecta, utebatur valetudine parum prospera. Erat illi dolor capitis familiaris; afflictabatur identidem etiam febribus, ex nimia, ut fatetur ipse, in litteras contentione (c). Tum remediis opportune adhibitis, tum victus frugalitate convaluit, solitus cibum sumere semel die. Atque ita confirmatus

(a) Epist. xix.

(b) Epist. xxxvii.

(c) Epist. xl.

tus est, ut senectute invidenda frueretur octogenarius. Non multo post in gravedinis morbum incidit. Tres totos annos cum eo luctatus cessit tandem infirmitati naturæ.

Sex postremis diebus, quibus ægrotavit, nunquam auditus conqueri. Divinæ Providentiæ acquievit, integris plane sensibus perstans ad extremum usque. Quo decessit die, tantâ constantia vultus excepit qui se invisebant, *ut non ex vita, sed ex domo in domum videretur migrare* (a). VII. Cal. Septembr. anno MDCCCLXIX. inter vivos agere Patavii desuit, octavo & octogesimo vitæ anno vergente ad exitum. Tertio ab obitu die elatus est, honestante ejus funus Sacro Theologorum Collegio.

Illud celebratum est in Templo Seminario proximo, vulgo *il Torresino*, quod suis ille beneficiis ornat. Inter Missarum solemnia laudatus est ab Aloysio Padovano tunc Seminarii magistro, nunc Atestino Canonico, viro integerrimo, mihiq̃ amicissimo, cui plurimus cum Facciolato usus fuerat & consuetudo.

Ne mortuum quidem illum fortuna deseruit. *Hic enim supremus felicitati ejus cumulus accessit, laudator eloquentissimus* (b). A litteratis
viris

(a) Nepos in vita Attici num. xxii.

(b) Plinius Epistolar. l. ii. Epist. i.

viris excepta Oratio cum plausu. Eam tamen adhuc nobis invidet Oratoris modestia. Corpus ibidem sepulcro conditum, quod ipse sibi, suisque struxerat. Reflorescit vero quotidie magis apud posteros ejus nomen. Sodalitas, ad quam pertinet Templum illud, grati animi ergo, inscriptionem hanc in marmore insculptam eidem vicino in pariete posuit:

JACOBO FACCIOLATO P. P.
 LATINÆ ELOQUENTIÆ
 FACILE SUI ÆVI PRINCIPI
 BENE DE HOC TEMPLO MERENTI
 SODALITAS
 P.
 ANNO MDCCLXXIII.

JACOBI FACCIOLATI OPERA EDITA.

CAlepinus septem Linguarum, cura Jacobi Facciolati emendatus. Patavii typis Seminarii 1718., ibidem editus sæpe postea, plurimis correctionibus, & additamentis.

Ortografia Italiana. Padova nella Stamperia del Seminario 1718., edita sæpius postea cum multis additionibus.

Exercitationes in duas priores Ciceronis Orationes. Patavii typis Semin. 1723., rursus editæ an. 1731. cum Epistola M. Tullii ad Q. Fratrem *De ratione regenda Provincia*, adjecta versione Italica.

Oratio ad Dialecticam publice habita, ac statim edita ibidem 1724.

Acroases VI. de Sophismatis Veterum, ibidem 1726.

Rudimenta Logicæ ad usum privatæ Scholæ. Vennetiis apud Jo: Bapt. Albritium 1728.

Institutiones Logicæ ad usum privatæ Scholæ, ibidem 1729.

Epistolæ Philologicæ, Vita Philippi a Turre, compendium vitæ Cardinalis Cornelii, & alia ad dicendi artem pertinentia, Patav. typis Semin. 1729., post rursus edita iisdem typis.

Epistola Q. Ciceronis ad M. Fratrem *De petitione Consulatus*, cum adnotationibus, & Itala interpretatione, ibid. 1732.

Nizolii Apparatus Linguæ Latinæ, crebris locis resectus & auctus ex formulis elegantioribus Doleti, ibidem 1734.

Il Giovane Cittadino istruito nella Scienza civile. Padova nella Stamperia del Seminario 1740. Eodem anno liber hic editus est Neapoli, post Cracoviæ anno 1752. Polonorum in linguam versus.

Monita Iſocratea Græco-Latina. Patavii typis Seminarii 1742., sæpius ibidem postea edita, & Vennetiis cum Itala versione alius Auctoris.

Cicero

Cicero de Officiis cum novis Commentariis. Venetiis apud Jo: Bapt. Albritium 1747.

Plures Acroasēs separatim antea editæ, dein simul conjunctæ. Venetiis typis Albritii 1750. una cum Logicis Institutionibus tertio editis.

Epistola ad Benedictum XIV. præmissa Operi *De Servorum Dei Beatificatione & Sanctorum Canonizatione*. Patavii typis Semin. 1752.

Syntagmata XII. de Patavino Gymnasio. Patavii ibidem 1752.

Fasti Gymnasii Patavini, insertis duabus Orationibus, ibidem 1757.

Animadversiones Criticæ in Lexicon Danetii ad usum Delphini, iisdem typis an. 1759.

M. Tullii Ciceronis Vita litteraria, ibid. 1760.

La Sfera e Geografia in compendio per le Scuole de' Fanciulli. Padova nella Stamp. del Seminario 1761.

De Vita, & Actis Christi secundum utramque generationem, divinam & humanam, Patavii typis Semin. 1762.

Viatica Theologica X. ibidem 1763. Nonnulla ex his prodierunt separatim ex iisdem typis. Illud vero quod inscribitur *De Messia & Hebraeorum religione*, rursus editum est Lucæ cum Italia interpretatione ibidem contexta.

Epistolæ latinæ CLXXI. ibid. 1765.

Vita Jesu Christi, Mariæ Matris, & S. Antonii Patavini, Latino & Italo sermone exposita, ibidem 1766.

Latinæ Orationes non semel editæ prodierunt anno 1767. numero viginti septem, typis Seminarii Patavini.

Exstant & alia quædam, edita vel inter Litterarias Ephemeridas, vel alibi passim.

QUÆ SUPERSUNT NONDUM EDITA EX EJUDEM OPERIBUS.

Novem Epistolæ latinæ quas evulgare statuerat in nova suarum Epistolarum editione; & alia addenda, & corrigenda in operibus, quæ ediderat.

Præ-

Præfationes, Orationes breves, & alia, quorum pleraque aliorum nomine fuerunt edita.

Differtazione intorno al Patriarcato di Aquileja.

Altra sopra l'origine della Storia.

Breve Relazione del Quesnellismo, e della Bolla *Unigenitus*.

L'aggiunta fatta all'Istoria della Costituzione *Unigenitus* del Laffiteau, tradotta in Italiano, e stampata in Seminario nell'anno 1757., fu da lui estratta dalla suddetta sua Relazione.

Multa alia opuscula tum Latina, tum Itala, partim soluta numeris, partim nexa.

Vita di Jacopo Facciolati, quam vel ipse scripsit, vel saltem approbavit.

Hæc omnia in Seminarii Patavini Bibliotheca servantur.



SEBASTIANI FRANZONI.

Exacta inter domesticos pueritia, anno MDCXCIX. XII. Cal. Novemb. in Seminarium Patavinum exceptus, ad prima Grammaticæ rudimenta incubuit. Jam tum magistris iniecit ille exspectationem sui, eamque auxit semper postea. Aliis præire, loco eminere, præmium referre visus est. Quaque erat abundantia ingenii, celeriter tum politiores tum severiores disci-

disciplinas arripuit, ea præterea felicitate, ut videretur ad omnia factus unanimi præceptorum consensu. Quos inter virum clarissimum Jacobum Jacobettum publici post Patavini Gymnasii Professore fuisse constat ex epistola, quam de ipsius vita ac studiis ad amicum Franzonus scripsit, & cum suis Orationibus jamdiu edidit.

Anno interim sæculi hujus vertente nono, confecto studiorum cursu, nondum tamen sacerdotio initiatus, Seminarii hujus eligitur in magistrum a Cardinali Cornelio tunc Episcopo Patavino. Ac statim cœpit traditos sibi alumnos ad Humanitatem instituere. Gradatim postea ad Rhetoricam evectus est, & Academicam (a), quam qui profitetur, non prorsus latet intra privatos Seminarii parietes, sed aliqua in urbis luce versatur.

Et hanc quidem publicam lucem subiit VIII. Cal. Junias an. MDCCXVI. (b), cum erudi-

(a) Vide adnotationem (a) pag. 51.

(b) Hoc eodem tempore floruit non exiguum Seminarii Patavini decus Andreas Brigentius. Novem annos in eodem al-
tus & educatus, post concreditos sibi alumnos aliquandiu ad
litterarum Humanitatem instituit, maxime vero exercuit in re
poetica, qua excellens ipse inter Academicos Recuperatos cimi-
navit. E Seminario discessit electus ad regimen animarum; quo
abdicato Romam se contulit anno 1713. a Card. Cornelio Ep.
Patav. missus, ut docendi provinciam Burghesia in Domo sus-
ciperet.

Ac

ditorum virorum corona cinctus ejusdem Seminarii in Templo Orationem habuit solertem & gravem in funere Francisci Doleonii Canonici Patavini, Vicarii Generalis Card. illius Cornelii, quem mox nominavimus. Tunc pri-

Ac ne fastidiret Scholarum tædia qui sibi erat institutus generosæ indolis adolescens, opportunum consilium cepit. Nimirum versibus Burghesæ Villæ magnificentiam explicuit, eisdemque spectandam obtulit, ut rei novitate & suavitate illectus, præclara veterum facta, & Poetarum commenta, quæ ad Auctorum intelligentiam, & aurex antiquitatis notitiam pertinent, quasi non sentiens disceret. Quatuor in libros tribuit hoc Poema, in quo carminum dignitas ac splendor argumenti dignitati respondet. Ubique se prodit ingenium facile, elegans, eruditum, solersque judicium.

Satis habebat Auctor ita se nobilissimo juveni consuluisse, quin opus prælo committeret. Cunctantem ipsum, quasque verecundantem vir maxime auctoritatis, ut idem testatur, impulit ad edendum. Editum Romæ prodiiit anno 1716., eidem Card. Cornelio Auctoris Mæcenati dicatum. Quantum illud litteratis viris arriserit, non temere quisque conjiciet ex elogio, quod se offert accedentibus ad Poema.

Sunt & alia insuper ejus carmina typis edita. Non minus præterea valuit in arte oratoria, ut ostendit Oratio ad Arbensensem Episcopum, cum primum Episcopatum iniret. Ea enim ipsi tribuitur, licet non præferat ejus nomen. Enimvero ad legendum allicit eloquentia libere ac sponte fluens, integra, naturalis, sincera.

Quæ illius Orationis, eadem & vitæ laus. Erat ille siquidem candidis plane moribus, & mente ingenua. Prædicabat quæ acceperat beneficia, ab ingrati animi vitio abhorrens. Litteratus ipse nunquam studuit litterati hominis famam quærere, ac se spectabilem reddere, ab omni ostentatione remotus. Splendida in Domo, ac pæne regia; in pulcherrimo totius Italiæ theatro, sibi vixit, minimum sibi tribuens, ac Religioni proflus addictus. Agnæ natus an. 1681., Venetiis obiit anno piaculari, hujus sæculi quinquagesimo.

primum publice ostendit, quantum dicendi arte valeret, quam corroboravit progressu temporis assidua exercitatione ac studio.

Accidit septennio post, ut Jacobus Faciolatus Latinae eloquentiae instaurator e Seminario discederet, Logicam professurus in Patavinae urbis Archigymnasio. Id temporis Sebastianus Academicorum Seminariensium institutioni operam dabat. Quæ quidem provincia cum ad Præfetti studiorum munus quam proxime accedat rerum pertractandarum similitudine, propterea iis iussus fuit eo anno studiis ex instituto proludere.

Quare Orationem habuit an. MDCCXIII., Emin. atque Reverendis. Jo: Francisco Card. Barbadico in Episcopum Patavinum electo, eique adhuc absenti Orationis ejusdem editæ nonnulla obtulit exemplaria, certissimum quasi pignus suæ in illum venerationis & observantiæ. Cui benignissimæ Cardinalis, litteris ad eum missis III. Non. Jun. ejusdem anni, singularis erga illum & Seminarium sui amoris testibus; ipsumque studiis præfecit, quem maxime ad id idoneum perspicue noverat.

Anno itaque MDCCXXV. IV. Idus Martias ejusdem Eminentissimi Cardinalis præsentia ornatus publice ex officio dixit, strenue persecutus usque ad annum nonum ac vigesimum sæculi hujus, quod inchoaverat antea munus. Scorsum singulas Orationes singulis deinceps
f
annis

annis protulit, ac publici juris fecit. Quas postea simul collectas, & uno volumine comprehensas vulgavit typis Joannis Baptistæ Conzatti an. MDCCXXXVI. cum duabus aliis, quarum unam, ut diximus, recitaverat in funere Francisci Doleonii; altera parentaverat Joanni Francisco Card. Barbadico Episcopo Patavino in Æde Cathedrali III. Cal. Februarias an MDCCXXX.

In his, ut apparet, suum ille expressit ingenium, liberum, virile, ingenuum. Stilus aliquando nonnihil ex quorundam sententia turgēt; ut plurimum vero eminet acre exquisitamque judicium. Facundā oratio, crudita, ornata, plena roboris nervorumque.

Lipsiam delatæ Orationes, Academicorum illorum accuratam subiere censuram anno MDCCXLI. Easdem appellant *eximium eruditionis atque facundia monumentum*. Ajunt ipsas insignem elegantioris litteraturæ cognitionem prodere, ac licet in singulis partibus ad aureum illud latinitatis sæculum non accedant, eidem tamen videri proximas; earumque Auctorem clarissimum & eloquentissimum dicunt (a). Hæc generatim de omnibus. Tum singulas expendentes, aliquantulum

(a) Nova Acta Eruditorum, an. 1741, pag. 478.

tulum perstringunt Orationis secundæ argumen-
tum, quod est hujusmodi: „Omnis eloquen-
„tiæ laus, & ingenii admiratio, non in lati-
„ne & plane, sed in ornatè dicendo posita
„est„. *Hæc propositio* (subjiciunt ipsi) *qua-*
lis hic est, dubitamus, an ab omnibus probetur.
Possunt enim omnino ornatissimis verbis maxima
nugæ proponi (a). Sic illi.

Verum (dicam bona tantorum virorum
venia) ea videntur ipsi dividere, quæ sejun-
cta esse non possunt. Quæ enim tandem sunt
hæc verba *ornatissima*, quæ expriment, & con-
tineant nugæ? Hæc ab Horatio (b) appellan-
tur *canoræ nugæ*, non ornatæ. Latissime porro
pertinet *τὸ ornatè*, quod proprium est Orato-
ris. Tullius optime definit ejusdem vim. *Quem*
homines (sic ille interrogat) *stupefacti dicen-*
tem intuentur? Qui distincte, inquit, qui explica-
te, qui abundanter, qui illuminate & rebus &
verbis dicunt, & in ipsa oratione quasi quemdam
numerum versumque conficiunt; id est, quod dico,
ornate (c).

Videamus nunc quid de his alii senserint
eruditi. Vir doctissimus, ubi agitur de

f 2

Lit.

(a) Ibidem.

(b) De Arte Poet. v. 322.

(c) Lib. 111. de Orat. c. xlv.

Litteratis Italiæ (a), Orationis hujus secundæ mentionem faciens scribit, in hoc argumento versatum esse Franzonum scite.

Sagacissimus Muratorius, cui quotannis mittebat singulas Orationes suas Sebastianus, de iisdem magnifice. Non ad assentationem & gratiam, (erat enim alienum id quam maxime ab indole Muratorii) sed ex animo plane ingenuo, ut ex ejus ipsius Epistolis clare constat Franzono missis, & ab heredibus diligenter servatis.

Illud etiam aliquando me audisse memini, Jacobum Stellinum, eximie intelligentiæ Professorem, cum has Orationes legisset, admiratum esse valde Franzoni ingenium, quod res non prorsus uberes explicuisset uberrime. Orationes hæ ubique exceptæ cum approbatione & plausu vel ultra Italiam, in nobilissimis etiam Europæ provinciis, Germania præcipue, & Anglia. Litterariæ quoque Ephemerides in earum laudes effusæ.

Alias præterea Latinas & Italas Orationes scripsit, quarum partim editæ sunt, partim latent expertes adhuc lucis publicæ. Singularem argumenta absoluta hujusmodi narratione subjiciam, & indicabo quæ scripserit idem poetice. Silentio tamen præterire non possum ejus

(a) Giornale dei Letterati d'Italia tom. xxxvii. pag. 483.

ejus Orationem ad Angelum Contarenum D. Marci Procuratorem. Hanc edidit Cl. Caspar Gozzius anno MDCCCLIV., eique Latina præmissa Epistola ad Julium Procuratoris fratrem, sic eum alloquitur: *Franzonus quidem sibi potest polliceri gratam tibi futuram Orationem suam, quippe quæ prodeat e peritissimi Artificis officina; tantæque sententiarum gravitate, verborum elegantia sit ornata, ut aureo Latine lingue seculo scripta esse videatur.* Sed ad intermissam historiam redeo.

Exegerat ille annos duos circiter ac viginti, qua in erudiendis Seminarii alumnis, qua in regendis illorum studiis, cum derepente anno MDCCXXXI. discessit e Seminario, non sine aliqua Seminarii ejusdem jactura. Tum præcipue visum est, quanta ille existimatione frueretur. Videbantur omnes secum quodammodo in illo ornando certare.

Joannes Archiepiscopus Minotto Othobonus Episcopus Patavinus cum designavit ad Archipresbyteratum Thienensem. Cui Franzonus plurimas gratias egit, testatus se ad id divinitus non impelli. Hoc idem & antea responderat, cum designatus fuisset ad regimen Archipresbyteralis Ecclesiæ S. Mariæ de Bregantiis, licet ampli sint ejus redditus, & opimi.

Recusavit etiam publicum scholæ munus Patavii in urbe ab electoribus sibi exhibitum,

illud ab iis precatus, ut Paulum Ceratum olim Seminarium Patavini alumnum eligerent loco sui. Erat hic Franzoni municeps, polioris litteraturæ studiosus, præsertim latinitatibus. Cessit res ex voto.

Idem sæpe expetitus ad splendoras publici hujus Gymnasii Cathedras, nunquam se moveri passus est. Semper modeste sese continuit vir propositi prorsus tenax.

Dicam rem paucis fortasse notam, sed veram. Obierat Jacobettus, qui Ethicam aliquot annos publice cum laude tradiderat in Pub. Patavino Gymnasio. Eques Jo: Maurocenus per Epistolam III. Non. Junias an. MDCCXXXVII. ad illum missam, eidem, pæne dixerim, obtulit tam illustre munus ac nobile. Abnuic semper sui similis Sebastianus.

Tentata fuit aliquando etiam ab exteris illius modestia. Parmensis, Taurinensis, & alia celeberrima Academia desiderio ipsius tenebantur. Maluit ipse privata in umbra, quam in tanta luce versari. Erat ejus animo infixum illud, *prælustria vita* (a). Neque hoc laboris vitandi gratia. Tranquillam vitam traducere studuit, non otiosam.

Atque hanc ob causam, ubi Seminarium reliquit, in eadem urbe Collegium ad juven-

tu-^{tu}

(a) Tristium lib. III. Eleg. IV. v. 5.

rutis institutionem crexit, quod a suo nomine *Franzonium* dixit, eique præfuit annos triginta circiter. Floruit in primis ipsum cum copia juvenum, tum præstantia. Erant enim hi ex nobilissimis maximeque illustribus familiis. Docebantur ibi non solum litteras, sed etiam scientias; easque præterea artes, quæ adollescentes nobiles decent. Publicæ quoque habebantur Academiæ, quas lectissimi ac litteratissimi viri ornabant, aliquando etiam Civitatis Prætores.

Nec una tantum domestica Præfectura cum exercebat, & scholæ quotidianus assiduus labor. Alia insuper, ut antea diximus, aliunde accedebant. Multiplici distinebatur multiplex ejus ingenium cura.

Interim vertebat annus hujus sæculi sexagesimus, cum Collegii curam pertæsus eandem dimittere cogitabat. Ut cum removeret ab hoc consilio, nihil intentatum reliquit Jo: Antonius Brontura vir instituendæ juventutis experientissimus (a), quem sibi in societatem

f 4

labo-

(a) Is Franzonum, ne discederet, levandum curavit scholæ onere. Tradebat enim Rhetoricam Collegii alumni. Hoc munus suscepit Petrus Zonca, vir spectabilis animi dotibus & ingenii, olim Seminarii Patavini & ipse alumnus. Post Franzoni vero discessum Brontura, socio Zonca, diu administravit Collegium, juvenum frequentia vicens, quos philosophicis ipse erudiebat di-

laboris adsciverat Sebastianus. Suasit, oravit, instituit. Magna enim erat hominum de illo opinio. Is se detineri paulisper passus, paulo post ex Collegio recessit in domum, quam Patavii sibi conduxerat, ubi triennium circiter privatus mansit. Ibi nonnullos honesto genere adolescentes privatim instituit. Hos inter quosdam etiam Patricios Venetos.

Vicetiam postea se contulit, ibique usus est simili vitæ instituto. Ac licet ætate valde provectus esset, fruebatur tamen admodum prospera valetudine. Animus expectectus ac promptus, corpus vegetum, neque longa exercitatione ingravescebat, vires athleticæ, integri plane sensus usque ad ultimum vitæ tempus.

Attamen vir clarissimus satius duxit se recipere in patriam, & reliquos sibi annos cum suis transigere. Sic domus, quæ prima infantiae fuerat, eadem esse coepit familiarissima senectuti. Factum id an. MDCLXIV. Non exiguos ille hic redditus percipiebat ex quodam simplici & ecclesiastico, ut ajunt, *Beneficio*, quod in eum contulerat Eminentissimus Card.

Geor-

disciplinis. Dimissa tandem Collegii cura, non propterea literariam adolescentum institutionem dimisit. Hanc utiliter & hodie ibidem privatim promovet, non paucis frequentantibus ejus ludum.

Georgius Cornelius Episcopus Patavinus pridie idus Octobris an. MDCCXIII. Quæ antea fuerat, eadem etiam postremis annis erat ejus exercitatio. Legendo, scribendo, alios in bonis artibus erudiendo vitam traduxit. Erant enim ipsi adhuc, ut olim seni Catoni, latera.

Magnum itaque ex ejus industria cepit institutionis fructum Thienæ, & finitimarum quoque gentium juvenus, unde plurimus ad eum concursus. Plures ex ejus ludo profecti sunt, qui postea illustres. Hos inter eminet, qui vitæ illius monumenta diligenter collecta fideliter ad me misit, Franciscus Horatius Bussolus. Is tanti Magistri exemplo, quam ab eodem amplam dicendi hausit facultatem, Natali postea Laetefio duce auctam & expolitam, in alios ipse publico suorum municipum jussu præclare impendit.

In his detinuit me diutius litterati viri longævitas. Sed ne breves transgrediar terminos commentarii, pauca nunc de moribus.

Erat singularis illius abstinencia, consuetudo jucunda, comis humanitas, urbani joci ac liberales. His utebatur cum suis æqualibus & amicis. Se demittebat etiam ad inferiores. Sermo plurimus de Patavino Seminario. De se, de rebus suis modeste sentiebat, alienus ab omni ostentatione ac furo, ut in oratione, sic etiam in vita. Simulationem quamlibet & ipse averfabatur, nec in aliis pati poterat.

Ava-

Avaritiam autem oderat, quam qui maxime; largus in omnes ac liberalis, in pauperes vero effusus, pro suis facultatibus, ac pæne prodigus, eo usque, ut in eos erogaverit, sæpius omnia, ipse indiguerit. Futuri omnino securus in diem vivebat. Sua sorte contentus semper absuit ab honorum cupiditate. Hos nunquam petiit, oblatos respuit.

Alienæ fautor industriæ dictitare solitus erat, litteratum hominem suam cuique laudem, tribuere, lætari etiam alterius gloria; litteras Rempublicam constituere; hujus membra omnia opus esse, ut simul in unum mutuo quasi quodam concentu cocant.

Illud vero mirum. Fuit ille in dissimili vitæ genere semper idem. Studiorum Præfectus, Moderator Collegii, puerorum præceptor, in urbe, domi, privatus, cunctis vitæ officiis æquabilis. Vere philosophus, plane constans in omnibus vicibus. Minime affici videbatur humanis rebus. Easdem, ut infra se, despiciebat.

Nunquam omnino vacabat, vel ultima senectute. Vespertinæ deambulationis loco pro janua sedebat in publico, vel cum Flacco, vel cum Terentio, aut alio quopiam probæ & antiquæ notæ poeta vel oratore, transeuntibus festive impertiens salutationis officia.

Restat, ut de illius pietate ac Religione commemorem, quæ quidem erat eximia, præci-

cipue in B. Gregorium Barbadicum, quem peculiari amore prosequabatur. In ejus laudes præ gaudio gestiens excurrit in sua quadam Oratione, quam publice habuit an. MDCCXXV., quo, Decreto Alinæ Curiae Romanæ, erutum sepulcro est cadaver Beatissimi Viri, repositumque loco digniore. Felicitatem tantam gratulatus est Joanni Francisco Card. Barbadico Episcopo Patavino, fratris B. Gregorii filio, qui litterarium cœtum ornabat, ut antea vidimus.

De eodem Beato Viro frequenter postea solebat pio animi sensu loqui; vitam ipsi referebat acceptam in summo discrimine. Non longe ab urbe Patavii gravissimus olim morbus necopinantem oppresserat pæne ad interitum. Somnus ab eo recesserat, cum jacenti repente obrepserit. Excutitur post horas plures, & adstantibus subridens ait: „B. Gregorius mihi pristinam incolumitatem restituit“. Rem probavit eventus. Eodem fere momento temporis præter expectationem convaleuit. Qui aderant, facti testes. Quodque animadversione dignum, is ægrotavit nunquam postea, licet jam tum senex esset (a), & annum tertium ac nonagesimum post impleverit.

Hinc

(a) Agebat annum unum & sexagesimum.

Hinc ejus pietas in B. Virum magis in dies accensa. Eidem Barbadica Gens tabulam dono dederat egregie referentem ejusdem B. Gregorii formam. Hanc ille Patavii servabat in sua zotheca cum aliis tabulis exprimentibus illos viros, qui rite fuerant illius sanctitatem jurejurando testati; & abiens secum in Patriam transtulit. Ad hanc crebra utebatur prece: hanc religiose observabat. Ad hanc infirmos agebat & pueros, quos dimittebat crucis signo, ad eandem cum brevi orasset. Hanc tandem exponi quondam publice in Templo jussit lemniscatam, accensis ad ipsam cereis XIV. Cal. Julias, die B. Gregorio sacra.

Habuit plures fratres, in his Cajetanum in Patavino Seminario institutum, magna de se pollicitum vel ex primordiis, ejusdem. propterea Seminarii beneficentiam expertum Cardinalis Cornelii Episcopi Patavini jussu.

Fuit hic maximo praesidio fratri, qui Collegium instituerat, in administratione praecipue rei familiaris. Valebat enim ipse plurimum cum ceteris bonis artibus, tum etiam τῇ οἰκονομίᾳ, qua non admodum (ut plerique litteratorum) valebat Sebastianus, qui Cajetani immatura morte praerepti sepulcrum (a) hoc titulo ornavit:

CA-

(a) Exstat hoc Patavii in Ecclesia Fratrum Discalceatorum.

CAJETANO FRANZONO PRESBYTERO
IN MEDIO ÆTATIS ET DOCENDI CVRSV

PRÆREPTO

SEBASTIANVS FRANZONVS

FRATER MÆSTISSIMVS

COLLEGII NOBILIVM MODERATOR

P.

AN. DOMINI MDCCXXXVIII.

Qui diutissime vixerat, perculsus ἀπολη-
ξια obiit quam celerrime, III. scilicet Cal.
Aprilis an. MDCCCLXXIX., munitus tamen omni-
bus Ecclesiæ præfidiis. Elatus non sine aliqua
pompa funeris, sepultus est in facello SS. Ro-
sarii in monumento familiæ suæ. Inerat illi
non plus ingenii, quam roboris. Erat plenio-
re corporis habitu, gravi aspectu & vocis to-
no, statura mediocri, rufo colore, mente lu-
cida, animo maximo usque ad extremam diem.
Quæ hætenus, & Christianæ & litterariæ Rei-
publicæ Franzoni nomen commendant.

SE-

SEBASTIANI FRANZONI OPERA.

ORationes sex publice habitæ in Seminario Patavino in studiorum ejusdem Seminarii instauratione. Patavii typis Jo: Baptistæ Conzatti 1737. in 8. quibus accedunt duæ aliæ Orationes, una

In funere Jo: Francisci Card. Barbadici Episcopi Patavini; altera

In funere Francisci Doleonii Canonici Patavini, Vicarii Generalis Georgii Card. Cornelii.

Tum Epistola ad Amicum de Vita & studiis Jacobi Jacobetti.

Oratio in funere Reverendissimi P. Magistri Josephi Mariæ Bonagentis Ministri Gen. Tert. Ord. Sancti Francisci, habita Patavii in Templo S. Mariæ Angelorum, an. 1743. Edita.

Oratio ad Hermolaum Barbarum D. Marci Procuratorem electum. An. 1750. Edita.

Oratio ad Angelum Contarenum D. Marci Procuratorem electum. An. 1754. Edita.

Oratio Itala in funere Francisci Lucardæ Rect. Eccl. Monial. S. Silvestri Vicetiæ, habita in ejus Templo, anno 1764. Edita.

Oratio Latina ad Jo: Columbum Eq., ac Magnum Veneræ Reip. Cancellarium, anno 1765. Edita.

Oratio Itala in funere Ægidii Rodulphi Thienensis Archipresbyt. anno 1773. Inedita.

Exstant & aliæ nonnullæ Orationes sacræ, plures Academicæ Exercitationes, Epigrammata multa Latina & Itala, quæ nunquam adhuc prodire.



V I T A

JOSEPHI PASINI.

PAtavii ex honestis parentibus ortum habuit an. MDCLXXXVII. XV. Cal. Novemb. Josephus Pasinus, vir in primis litteratus. Undecim annos natus describitur in alumnos Seminarii hujus, & primis, Grammaticorum præceptionibus eruditur. Is cum valeret memoria plurimum & ingenio, ac sedulo utrumque excoleret, suos præceptores in certissimam optimi exitus spem erexit. Quare unanimes testantur ipsum ad omnia factum, ad Orientales præcipue linguas: harum ille. exercitationem cum gravioribus disciplinis conjunxit.

Amœnioribus litteris expolitus Philosophiam audivit a Jacobo Facciolato (a), viro cele-

(a) Jac. Facciolati Epistolæ Latine, ep. XIV,

celebratissimo: biennium Theologicis sese ad-
dixit, & an. MDCCVIII. Nonis Augusti publi-
cam de iisdem disputationem aggressus felici-
ter admodum eam sustinuit, ab Eminentissimo
propterea Cardinali Cornelio Episcopo Pata-
vino, qui eidem præerat, præmio ornatus.
Tum sui periculum fecit in Sacro Patavino
Theologorum Collegio, & in eorum cœtum
admissus ab eodem Cardinali inter Magistros
Seminarii hujus excipitur.

Brevi evoluto spatio, ab humanioribus
litteris ad recondita Orientalium linguarum
studia transfertur; ut qua in palæstra ipse
jamdiu sese exercuerat, in eadem & alios
docendo exerceat. Quanta Pafinus jam tum
ejusmodi rerum cognitione excelleret, demon-
strabit aperte, quod mox dicam. Litterariæ
Ephemerides (a) Itatorum scriptorum ope-
ra referentes, multa cum laude memorant
librum, quem Josephus per eos dies Semina-
rii Patavini typis ediderat (b). Ajunt ipsum
solida eruditione refertum, Hebraicæ linguæ
necessitatem & excellentiam omnino ostende-
re.

(a) Giorn. dei Letter. d' Italia, an. 1716., tom. xxvi.
pag. 466.

(b) Libri titulus est hujusmodi: *De præcipuis SS. Bibli-
orum linguis & versionibus polemica Dissertatio*; cui acce-
dunt quæstiones aliquot ex ipsarum linguarum interpretatione
ortæ.

re. Quæ continentur in eo quæstiones, Joseph in magna eruditorum corona defendit.

Stabant contra linguæ hujus scientissimi viri duo, hinc P. Bertolius, illic P. Aloysius Benetellus, olim ejusdem linguæ, B. Gregorii Barbadici jussu, in Seminario Professor, eruditus monumentis clarus. Venetiis Patavium fuerat uterque accitus a Cardinali Cornelio ad majorem, ut mos ferebat, disputationis celebritatem. Disserebat uterque Hebraice tanto majore eum plausu, quanto magis id aberat a consuetudine. Quodque animadversione dignum, ipse etiam discipulus propugnator visus est optime in ejusdem linguæ exercitatione versari. Fuit hic Antonius Oprandus, qui postea Archipresbyteri dignitate auctus decessit pluribus abhinc annis.

Pasinus interim Atestinum Canonicatum obtinuit, quem cum alio postea Sacerdotio Cathedralis Ecclesiæ Patavinæ, annuente Episcopo, commutavit. Magno ille in honore est habitus a viris litteratis etiam primi ordinis & subsellii. In Ephemeridum rei litterariæ libris passim de Pasino perhonorifice (a); & Facciolatus in suis Latinis epistolis ad litteratissi-

g

tissi-

(a) Giornale de' Letterati d'Italia tom. xxvi. pag. 466.; tom. xxxiv. art. xii. pag. 456. 458.; tom. xxxv. art. xi. pag. 273.

tissimos viros; quorum aliis mittit ejusdem opera (a), aliis ipsum quasi ducem ad Orientalia studia proponit (b). Hinc exteras quoque regiones Pasini fama pervasit.

Anno itaque MDCCXX. Taurinum accitus honorificentissimo Sardi Regis Decreto, splendidoque stipendio (c), Sacram Scripturam, & linguas ad eam pertinentes professus est in publica illa Regiæ Civitatis Academia. Latine quoque Orationem habuit primo ingressu de necessitate linguarum Orientalium, præcipue Hebraicæ, ad plenam S. Scripturæ intelligentiam, quæ eruditorum virorum judicio proxime ad eam accedit quam ad S. Scripturam idem habuerat Facciolatus cum Seminarii Patavini studiis proluderet (d). Eandem habitam jussu Regis Victorii Amadæi II., per typos ejusdem Seminarii publici juris fecit an. MDCCXXI., eique dicavit una cum Institutione grammatica linguæ sanctæ non semel edita. Per hæc puerorum ingenia ducit ad cognitionem ejusdem linguæ celeri quasi quodam, facilique compendio, omisis Rabbiorum cavil-

(a) Epist. XLV. ad Jo: Fabricium.

(b) Epist. LXVIII. ad Theophil. Sigefrid. Bayerum.

(c) Lire Piemontesi 2300.

(d) Giornale de' Letterati d'Italia tom. XXXIV. art. XII. pag. 458.

villationibus, & iis, quibus præpostere & impie abutuntur hæretici, ut suis S. Scripturæ versionibus faveant (a).

Anno proxime sequente MDCCXXII. decem protulit Dissertationes in Pentateuchum, quibus lectiores quæstiones continentur. In his eleganter exponuntur omnia, & ornantur eruditione pulcherrima. Solidam iisdem & eloquentem præmittit Orationem *De studio inquirendæ veritatis in Sacrorum Bibliorum interpretatione* (b).

Hinc conversus Joseph ad promovenda puerorum studia, quæ retardari plerumque solent, eo quod opportunis subsidiis careant. Quare cœpit instruere Lexicum, quod complectitur Itali Latinique sermonis vocabula ex aureis & optimis Scriptoribus collecta. Tum elegantes utriusque modos commonstrat allato exemplo; unde perspicue apparet utriusque linguæ proprietates, vis & ingenium; & alia præterea adjecit ad studiosæ juventutis utilitatem. Socium hujus laboris habuit Josephum Badium doctissimum Professore in Regio Taurinensi Archigymnasio.

Opus biennio absolutum est. *Saxum*, inquit, *per biennium volvimus infando labore* (c).

g 2

Quod

(a) Giornale de' Letterati d'Italia loc. cit. pag. 457. 458.

(b) Ibid. tom. xxxv. art. xi. pag. 273.

(c) In Præfat. ad idem Lexicum.

Quod admiratione non caret. Scio equidem quæri solere, non quam cito quis scripserit, sed quam bene: ei tamen qui recte scripserit, laudi ipsa etiam scribendi celeritas verti debet, præsertim in hoc studiorum genere, in quo oportet multa colligere, & ordinate componere, interpretari, expendere, definire. Post biennium tamen, uti diximus, opus prodiit, anno scilicet MDCCXXXI, Carolo Emmanueli Sardinæ Regi dicatum, & rursus ibidem post, amplificatum & auctum, tanto consensu & approbatione, ut editum etiam alibi sæpius fuerit.

Dicam nunc de Codicibus Mss. Regii Taurinensis Athenæi Bibliothecæ, cui idem Pafinus præerat. Hos duobus magnis voluminibus comprehensos diligenter recensuit & eruditæ animadversionibus illustravit; unde Bibliothecæ ipsi splendoris ingens, & existimationis accessio. Non per classes distribuit Codices, sed per linguas, ne ordinem inverteret a suis decessoribus constitutum. Hebraici & Græci primo; Latini, Itali, & Gallici altero continentur volumine; quibus inseruit selecta quædam Opuscula, quæ fuerant nondum edita.

Vix dici potest, quam gratum fuerit Regi susceptum ab eo consilium vulgandi hos Codices. Ubi hoc intellexit ille, statim de ratione suscipiendi operis curiosius inquirere; mox percunctari, quando tandem ad exitum per-

perduci posset inceptum. Sic cum excitabat, solitus dicere, agi in hoc de re sua. Pafinus omnia periclitari, cupiens rem optimi Regis ex voto cedere.

Non parum certe reconditæ eruditionis in his occurrit legentibus, & critices. Neque enim Joseph (ut ipse fatetur in Præfatione) cujusque Codicis tantum ætatem tradit, sed etiam ornamenta, picturas, icones, characteris elegantiam, & varietatem, & alia plurima. Singula excussit, & accurate perlegit; vel minima summa fide & diligentia descripsit; supposita a genuinis se crevit; alia inter dubia recensuit, suis Auctoribus alia asseruit; corrupta emendavit, fœdata restituit, redegit in ordinem male nexa. Paucis: in hoc non pepercit operæ, non labori. *Telam, inquit, teximus, & reteximus, quasi instar Penelopes, donec tandem confecimus, facem tamen ubique præferentibus viris antiquitatis studiosis (a).* Ad rem perficiendam fuerunt illi adjutores duo, Antonius Rivautella, & Franciscus Berta, viri doctissimi, & ejusdem Bibliothecæ Regiæ custodes.

Ut autem Joseph pietati suæ satisfaceret, eamque accenderet & in aliis, Historiam novæ Testamenti dedit ad usum hominis Christiani,

(a) In Præfati ad Codices.

ni, quibusdam animadversionibus instructam, quarum aliae historicæ, aliae pertinent ad mores. Hæc, cum primum prodit, non præferebat Auctoris nomen; magnam tamen ab eruditis iniit gratiam. Additum postea nomen. Tum vero litterariæ Ephemerides Venetiis editæ an. MDCCCL. in ejus laudes excurrere, ex eo præcipue, quod quæ præcipiuntur in Evangelio, illustraverit præclarissimis divini Magistri, & Apostolorum exemplis; idque appellare optimum quasi quoddam integerrimæ moralis disciplinæ compendium (a). Neque solum Venetæ, sed etiam aliae Ephemerides referentes acta Litteratorum, nobiliter de Pafino (b).

Enimvero ipsi gloriosum fuit a sapientissimo Rege Taurinum vocari & promoveri ad amplissimam Cathedram: sed multo gloriosius loci dignitatem tueri, & se spectabilem reddere in tanta doctorum virorum luce. Notum illud: *Minuit præsentia famam*; ille contra cum eo venisset, eandem auxit in dies, & ampliozem reddidit.

Tum Rex sibi plaudere, quod cum elegisset, & suum in eligendo judicium experientia comprobasset. At non illi tantum, verum

(a) Novelle della Repub. Letteraria, an. 1751. pag. 233.
(b) Storia Letteraria d'Italia, vol. III, cap. IX. n. 14. pag. 627.

rum & illius successori Carolo Emmanueli fuit acceptissimus Joseph (a). Neque hic suam erga illum humanissimam voluntatem celabat, sed præferebat aperte, aperte eandem significabat, non solum verbis (quorum multi liberalissimi), sed etiam factis. Opes enim in illum contulit & honores, qui sane magnum ad litteras incitamentum. Honos siquidem alit Artes, & hæc vel stant, vel concidunt pro Regis vultu.

Anno itaque MDCCXLV. Nonis Julii, Regii Taurinensis Athenæi Bibliothecæ Præses & Moderator constitutus a Rege, eidem a consiliis fuit, ampliore stipendio auctus (b), & pensione (uti ajunt) valde honorifica (c): cum jam antea anno MDCCXXVII. Præposituram obtinuisset S. Mariæ de Monte Cinisio. Hæc ille assecutus est, cum ingenii laude, tum vitæ. Neque enim unquam tantam iniisset gratiam, ne dicam familiaritatem, ab optimis & probatissimis Regibus, nisi ad eos accessisset commendatione virtutis. Fuerit igitur necesse est Palinus humanarum rerum peritus, providus,

g 4

bonus.

(a) Victorius Amadeus II. Regni curam pertæsus, eodem se abdicavit IV. Non. Septembr. an. 1731, sibi subrogans Carolum Emmanuelem filium. Prid. Cal. Novembr. anno sequente obiit.

(b) Lire Piemont. 1200.

(c) Lire 1300.

bonus ac justus vir, ingenio integer, ac moribus. Sed omittamus, cum facta suppetant, conjecturas.

Quam modeste de suis Operibus, de se Pasinus! præsertim cum sciret & se & sua a Rege & ab aliis permagni fieri. *Quamplurima*, inquit, (loquitur de Lexico a se confecto) *ad operis complementum adhuc desiderari & cognoscimus, & ingenue fatemur* Quod si ad eruditorum manus libri nostri pervenerint, eos æqui bonique faciant, obsecramus. Et mox: Iter, ait idem, ingressi sumus: si vitam Superi dabunt conficiemus, aut conficient alii & viribus ingenii, & doctrina valentiores (a). Si quid sibi aliunde præsidii fuit, id profitetur aperte. *Multum*, inquit, *ad id operis attulerunt nobis adjumenti . . . &c.* & statim nomina Auctorum subjicit. Auctori- bus enim suis ea reddere volumus, ait; quæ ab illis mutuati sumus (b). Jam vero hominis ingenui est, per quos profeceris, profiteri.

Idem minime invidus Litteratorum industria & gloriæ favit. Varias lectiones pertinentes ad Hebraica Sacrorum Bibliorum Mss., quæ servantur in Taurinensi Regia Bibliotheca, cum Kennicotto benignissime communicavit (c).

Pu-

(a) In Præfat. ad Lexic.

(b) Ibidem.

(c) Giornale di Modena, tom. vi, pag. 641, ubi etiam fragmentum ejus epistolæ Latinæ.

Publico bono intentus hortatur omnes ad proferenda, quæcumque habent in latebris, antiquorum Patriæ Scriptorum monumenta (a), iisdem illud inculcans: *Sapientia absconsa, & thesaurus invisus, quæ utilitas in utrisque* (b)? In eo non arrogantia, non simulatio. Religioni in primis addictus eandem promovit studiis suis. Facetus ejus sermo, & urbano sale conditus; facilis & constans memoria, ingenium amplum, multiplex eruditio.

Quæ hætenus de Pasino, partim auditione accepi, partim ex ejus ipsius Operibus. Neque enim hominem unquam vidi. Possem addere fortasse & alia, conjiciendo tamen potius, quam affirmando. At vetitum divinare in Historia. Pasinus itaque admodum ætate procefferat, cum anno MDCCLXX. Non. Julii c vivis ereptus non mediocre sui desiderium reliquit. Elatus est, & in Ecclesia S. Mariæ Angelorum sepultus. In Marmore sic inscriptum:

H. I.

(a) In Præf. ad Codices.

(b) Eccli c. xx, v. 32.



V I T A

M. ANTONII TRIVELLATI.

Marcus Antonius Trivellatus ortum habuit ab honesta stirpe Pernumiae, prope oppidum Montisilicis, in planitie Euganea an. MDCLXXXVIII. prid. Id. Januar. Grammaticæ rudimentis, & primis etiam Rhetorum præceptionibus institutus, in Patavinum Seminarium ingreditur prid. Non. Januar. an. MDCCV. & scholæ addicitur, quæ proxime accedit ad Rhetoricam.

Ad puriores latinitatis & eloquentiæ fontes admisit, latices hinc hausit uberrimos. Ostendit id & aurea illa, quæ sese offert in ejus libris, dicendi copia, & summa quidlibet exprimendi facilitas. Utramque ille affectus fuerat non tam labore & contentione, quam

quam præcipuâ quadam benignitate naturæ .
 Erat siquidem admodum experrecto & facundo
 ingenio, memoria firma ac prompta prope us-
 que ad ultimam senectutem . Fruebatur etiam
 prospera corporis valetudine ad exercendas fa-
 cultates has opportuna . Hinc amœna & severa
 pariter studia aggressus, magna felicitate eo-
 rum cursum septennio absolvit .

Anno itaque MDCCXI. XI. Cal. Septemb.
 Patavii in Sacro Theologorum Collegio publi-
 cum examen subiit, omniumque suffragiis in
 eorum cœtum cooptatus est . Tum Georgius
 Card. Cornelius Episcopus Patav. statim eun-
 dem jussit in Seminario Philosophiam profiteri,
 Unus ille gravissimum juvenili ætate sustinuit
 cum laude ingenti . Sic Episcopi, qui ipsum
 elegerat, exspectationem implevit, nec errasse
 illum in eligendo monstravit .

Interim Michael Verius multiplici crudi-
 tione præcellens, qui Clericos Seminarii in
 Theologicis exercebat, traducitur in publi-
 cum Patavinum Gymnasium a Rei Litterariæ
 Triumviris, & Professor Logicæ constituitur
 an. MDCCXVIII. In ejus locum deposcitur Tri-
 vellatus. Sed ille alio spectabat. Cupiebat ni-
 mirum in Montefilice Canonicatu potiri. Cu-
 pienti obstitit Cardinalis idem Cornelius, ne
 Seminarium spoliaret tanto viro, a quo sibi
 plurimum pollicebatur . Utque libentius ille
 capefferet oblatum munus, eundem stipendio

au-

auxit, quod iis temporibus prorsus ndvum (a) . Quare nobilissimam provinciam suscepit M. Antonius, eamque obivit annis circiter quinquaginta, eo successu, ut se reddiderit plane dignum immortalitatis memoria .

Ad hanc rem illustrandam liceat mihi exhibere aliquam temporis illius imaginem , Erant sane homines etiam tunc solertes . & eruditi; erant Theologi magni nominis; vitiis tamen ejus ætatis, paucis detractis, & ipsi obnoxii. Jactabantur in scholis vocabula minus cognita , & quædam formulæ , quibus nihil suberat nisi strepitus . Occurrebant identidem importunæ definitiones, ac divisiones; neque quæstiones deerant subtiles , aliquando etiam exsuccæ, inanes; captiosa argumenta , productæ disputationes , seu potius rixæ . Trivellatus hæc omnia amovit (& alii etiam postea illius exemplo). Omnia ille ad perspicuitatem, & elegantiam traduxit.

Patet id legentibus ejus libros. Hi enim, licet elementarii (neque enim sibi ille proposuit totam Theologicam scientiam in unum quasi corpus redigere: voluit tantum ejusdem principia tradere suis Discipulis), hi, inquam, licet elementarii, interpretatione non egent,

ac

(a) Stipendia magistris decreta primum fuere a Joanne Minotto Othobono Episcopo Patavino.

ac tuto percurri possunt sine ullis ducibus ac magistris. Qui vero audierunt ipsum in schola exponentem eximiam illam D. Thomæ doctrinam, cum maxime duxere idoneum ad eandem brevibus adnotationibus suo plane in lumine collocandam. Atque hoc quidem aggressus fuerat, sed non perfecit, quod necessario fortasse careret otio.

Magna librorum laus perspicuitas; major, quod conjuncta cum eloquentia ac tanta doctrinæ copia. In his occurrunt gravissima Sacra Scripturæ oracula, Pontificum scita, Conciliorum decreta, Patrum testimonia; Augustini præcipue, cujus festivo ingenio festivus ipse delectabatur mirifice. Poterat ille quidem sententias suas roborare argumentis a ratione petitis; at noverat homines abuti posse ratione (utinam careremus exemplis!); ideoque ea arma expedire maluit in adversarios, quæ ipsis non vincendi solum (quod fieri omnino non poterat) sed etiam diutius instanti spem & facultatem eriperent.

Quamquam ubi ipsos videt auctoritatem omnem audacius spernere, eosdem ratione aggreditur: hanc illis firmissimum quasi murum opponit, ne dogmata diripiantur. Non deerunt fortasse, qui velint ipsum adhuc ulterius progredi, & interiora scrutari. In hoc equidem ab iis dissentio, & Trivellati consilium laudo. Temperavit is siquidem prædentissime ingenio suo,

fuo, ut se accommodaret omnium intelligentiæ. Discipulorum utilitatem in primis, non sui prædicationem spectavit. Laudabilia maluit facere, quam laudari.

Plura edidit, de quibus optime Ephemeridum rei litterariæ Scriptores (a). Notabo singula, ad exitum narratione perducta. Per hæc idem magis innotuit, & in se excitavit aliorum studia. Patavini Antistites sensere de illo perhonorifice, soliti ipsum benigne excipere, & humaniter cum eo versari & colloqui. Magno præterea in honore fuit apud viros doctos, & litteratos. Omnium maxime sibi devinctos habuit Hyacinthum Serry, & Joannem Gratianum, duo publici Patavini Gymnasii præclara ingenia. Eidem dono dedit libros a se confectos celeberrimus & eruditissimus Bertius. Oblatus ipsi præterea fuit, civibus plaudentibus & amicis, aditus ad publicum docendi munus in hujus urbis Archigymnasio. Unus ille rara animi moderatione sibi obstitit, ne ad tantum honoris gradum eveheretur.

Hæc perspicue ostendunt, quanta esset illius doctrinæ & ingenii apud omnes existimatio. Adhuc tamen clarius, quæ mox subjiciam. Non audita ab aliis refero, sed visa & cogni-

(a) Novelle della Repub. Letteraria an. 1740. pag. 364. & an. 1751. pag. 91. Storia letteraria d' Italia vol. III. pag. 56. 57.

gnita . Eo disceptante in publicis certaminibus, incredibilis prope erat omnium audiendi aviditas, licet ipsum toties audissent antea. Qua enim is elegantia scripsit, eadem omnino solitus erat & loqui: ut videretur propterea, (quod sane magnum) meditare dicere, etiam cum ex tempore loqueretur. Eum insuper commendabat eximia quædam pronuntiationis gratia. Quare qui aderant, repente assurgere, silentium omnes invicem sibi indicare, ab ejus ore pendere, suamque postea admirationem oculis, vultu, gestu, crebrisque assensionibus significare. Mirum profecto id ubicumque accidisset, Patavii vero vel maxime, eo quod hujusmodi disceptationes, quæ tunc alibi magnum aliquid visæ fuissent, hic usitæ, & familiares.

Ad ejus celebritatem plurimum contulere etiam ii, qui ex ipsius disciplina profecti sunt. Seminarii alumni ad eum audiendum mane accedebant; pomeridianis horis externi juvenes; utrique antea & politionibus exculti litteris, & severioribus studiis. Horum nemo erat, qui non optime de Trivellato sentiret. Solebant omnes, tam domestici, quam externi, privatim pariter ac publice, quoties se offerret occasio, eundem pleno ore laudare; non solum cum audirent ipsum in schola, sed etiam postea, & ætate & scientia provecti; cum scilicet & melius possent ingenium hominis do-

h

ctri-

Arinamque cognoscere, & de utroque tutius
judicare.

Paucos fuisse arbitror præceptores, quos
tanto discipuli in pretio habuerint, ac tam
impense laudaverint: & paucos etiam, qui di-
scipulos jactare possint vel pares numero, vel
æque nobiles & spectabiles. Si numerum spe-
cto, fere omnes ab illo eruditi sunt, ex qui-
bus Sacrum Theologorum Collegium Patavi-
num jamdiu constabat; idemque coetus fuit ab
eodem postea quasi de integro renovatus. Plu-
rimos præterea alios ab eo institutos invenio,
qui, licet Theologica laurea insigniti, in am-
plissimum illum ordinem minime cooperti sunt.

Exierunt etiam ex ejus ludo viri nobili-
tate ac dignitate supra ceteros eminentes. Hinc
sacri Animarum Pastores, qui Patavinam &
alias Dioeceses mirifice ornarunt: Canonici,
Episcopi, Cardinales. Hinc alii plurimi, qui
multa eruditione præstantes non solum in hac
doctissima civitate tanta cum laude florent,
sed etiam ultra Venetæ ditionis fines dis-
seminati cum privatis in scholis, tum publi-
cis in Academiis, tum ex sacris suggestis,
tum editis etiam in lucem libris & suum, &
magistri nomen auxerunt. Quod si *Patris glo-
ria est filius sapiens* (a), *quanta hujus sunt glo-
ria,*

(a) Prov. c. x. ex interpret. lxx.

ria, qui tantorum filiorum sapientia lata-
tur? (a).

Mihi tamen tanti non esset adhuc hæc eadem gloria, nisi eidem plurima accederet ab ejus moribus commendatio. Jam ille *sermone affabilis, accessu facilis, civibus carus, de quo eadem secreto homines loquebantur, quæ palam (b).* Id autem ab omnibus bene consequi difficillimum. Sunt enim, qui nemini vel probatissimo parcant. Nemo tamen carpsit Trivellatum, nemo ejus præconio abstinuit. Trivellati nomen erat in ore omnium, Trivellatum omnes amore, studio, plausu prosequuntur.

Quod quidem nulli mirum videri debet. Jure enim ab omnibus bene audiebat, qui de omnibus solebat optime loqui. Si quid esset, quod laudare non posset, vel amica interpretatione excusabat, vel silentio præteribat. Voluptatem ex aliorum bonis, dolorem ex calamitatibus percipiebat. Amicis autem ex necessitate aliqua laborantibus præsto erat. Iisdem ultro aliquando sese obtulit vel non petentibus. Hos ille, dum vixit, studiosissime semper coluit vel absentes. Magna erat ejusdem comitas & humanitas; *comitas tamen non sine*

h 2

sc-

(a) S. Maximus *serm.* xx, in *append. Oper. edit. Romæ 1784.*

(b) Seneca de *Clement.* l. 1. *cap.* xiii.

severitate, neque gravitas sine facilitate, ut difficile esset intellectui, utrum cum amici magis venerationem, an amorem (a). Nec exiguam laudem meretur ipsius hilaritas in obeundo magistri munere. Nam quo quisque est solertior & ingeniosior, hoc docet iracundius & laboriosius (b).

De pietate autem illius ac Religione quid plura commemorem? Etsi tot annos domi assidue sese continuit, egrediebatur tamen quotidie, magno sæpe non sine incommodo, ut Mysterium celebraret. Ad Religionem referebat studia, labores, scripta. His illam defendere nitebatur, & ulterius promovere. Religio solida, sed longe aberat a tristitia. Lætus ille vel inter tot senectutis ac solitarie vitæ molestias.

Neque minor frugalitatis laus ac temperantiæ. Magna in omni vita moderatio, magna hominis abstinencia. Hanc prodit illius incuria in custodienda pecunia, animi tranquillitas in ejus jactura, larga in pauperes, cultumque Templorum erogata subsidia, tum denique sacri redditus, quorum aliis ipse ultro sese spoliavit, alios recusavit oblatos, enixe Episco-

(a) Nepos in vita Attici cap. xv.

(b) Cic. pro Q. Roscio Comodo c. xi.

scopum adhortatus, ut eosdem aliis se magis dignis, magisque indigentibus impertiret.

Longum esset singulas ejus dotes, animique virtutes enumerare. Non tacebo tamen de illius modestia, quæ in tam honorato & illustri viro eximia prorsus, ac prope heroica. Ille nunquam propemodum de se loqui. Si quando de ipso, vel de ejus Operibus sermo incideret, ab eodem statim vel mutari & abrumpi, vel non sine contemptu fieri. Sibi is cavere semper ab omnibus, quæ in sui laudem possent redundare; ita tamen, ut id ex negligentia potius, quam ex animi moderatione proficisci videretur. Virtutem unam quærebat, non laudem splendoremque virtutis. Hinc ille nullam, nisi coactus, eruditionem ostendere: non litteratorum hominum consuetudinem affectare, non titulos ac nomen quærere, non aliorum comitatum admittere, adeo ut plerique, quibus magnos viros per ambitionem æstimare mos est, viso aspectoque Trivellato, quærerent famam, pauci interpretarentur (a) .

Hæc vera & germana indoles M. Antonii. Qualem illum describimus, talem longo usu & consuetudine novimus: scilicet tota vita modestum, semper sui similem & constantem, vel inter maxima ambitionis incita-

h 3

men-

(a) Tacitus in vita Julii Agricolæ c. x1. circa finem.

menta ; quod certe non nisi perfectæ cujusdam virtutis esse poterat, ac plane insignis.

Animi præstantiam prodebat species corporis. Erat ille statura procerus, colore inter album & fuscum, cæruleis oculis, lata fronte, pleno dignitatis aspectu.

Restat ut aliquid dicam de illius morte, quod quam brevissime faciam. Aliquot annis postquam liberatus fuerat scholæ onere, Trivellatum febris invasit; utque erat ætate præne consumptus, statim visus est in extremis. Ac licet viribus destitutus esset, integris tamen sensibus utebatur, seque divinis rebus instruxit ad ultimum hoc certamen. VII. Idus Decembris an. MDCCCLXXIII. subiit tranquille mortem, cujus vel ipsum nomen horruerat semper antea. Elatus est perendie. Eidem prodiit in funus Sacrum Theologorum Collegium. Inter solemnia a Præfeto Studiorum Seminarîi Patavini laudatus est, & in sacra ejusdem Seminarîi Æde sepultus.

M. ANTONII TRIVELLATI OPERA .

Differtationes Theologicæ, Patavii 1739. apud Josephum Cominum.

Opuscula Theologica. Ibid. 1740. apud eundem.

Enchiridion de Verbi Dei Incarnatione. Ibid. 1750.

Differtatio de Augustissimo Eucharistiæ Sacramento & Sacrificio. Patavii typis Seminarii 1752.

Differtationes de Sacramentis generatim, de Baptismate, & de Confirmatione. Ibid. 1753.

Exstat Commentatio *De Locis Theologicis* M. Hæc in Seminarii Bibliotheca servatur.





V I T A

ÆGIDII FORCELLINI.

ÆGidius Forcellinus honesto genere natus est Phæneri, Diœcesis hujus Parœcia, prope Alpes Noricas, non longe ab urbe Feltriensi, vii. Cal. Septembris an. MDCLXXXVIII. Non tam cito parentes eum erudiendum curarunt, fortasse prohibiti rerum domesticarum angustiis. Illum enim cooptatum video in nostrorum alumnorum numerum xii. Cal. Novembris an. MDCCIV. , & Superioris tantum Grammaticæ studio addictum, cum jam septimum ætatis annum supra decimum inchoasset. Etsi vero litteraria ipsius institutio serius incepta, ab eodem tamen admodum feliciter absoluta. Juvit enim plurimum cum ingenii quædam maturitas & solertia, tum ingens discendi ardor, nec intermissa contentio. Erat ille

ille liquidem bona ac firma corporis habitudine, neque incommodis, neque morbis obnoxia, & ad sustinendos litterarios labores prorsus idonea.

His adjumentis politiores artes, & graviores facultates facile arripuit, magistris propterea maxime acceptus, celeberrimo præ ceteris Facciolato, de cujus disciplina gloriari solitus erat. Hic ad studiorum Seminarii Patavini regimen jam evectus, Forcellinum, quem probe noverat, ad intima litterarum consilia admisit, ac sibi præclari Operis socium legit. Animadverterat enim Facciolatus in Latinum Lexicum temere irrepsisse multa ab eodem penitus expungenda. Ad id Ægidii opera est usus, hoc illi uni emendandum imposuit. Anno itaque MDCCXV. prid. Id. April. interpolandum suscepit *Veterem Calepinum*, quæ interpolatio quatuor fere annos absumpsit. Verum illud experientia compertum habuit Forcellinus, hoc parum prorsus prodesse. Erat quidem liber expurgatus, auctus, perpolitus; non tamen ut debuit, sed ut potuit: vix quidquam adhuc probabile emitti poterat, nisi de integro recuderetur (a). Tam multa scilicet occurrebant in eo corrigenda, mutanda, addenda. Quare sub finem an. MDCCXVIII. jussu
Geor-

(a) Vide Forcellinum Tom. I sui Lexici pag. xlvij.

Georgii Card. Cornelii Episcopi Patavini, ductu Jacobi Facciolati aggressus est tam vastum Opus Ægidius, ipsum alacriter prosecutus ad annum usque MDCCXXIV. Tunc illud omnino intermittere coactus fuit, & Seminarium, ita ferente temporum conditione, relinquere.

Interim ipse invitatur Cenetam ab ejusdem civitatis Episcopo, eique tradendæ Rhetoricæ facultatis munus, ac totius Seminarii committitur Præfectura. Ibi diutius commoratus nullis laboribus pepercit, ut disciplinam promoveret, & scientiam, quarum altera ab altera distrahi nequit sine maximo alumnorum damno; atque in hoc, utpote qui utriusque rei experientissimus, adeo excelluit, ut illius Seminarii quasi parens habeatur, & sit.

Sed jam septennio propemodum evoluto, ad Patavinum, unde discesserat, Seminarium revocatur, honestissimo stipendio proposito. Intermissum jam pridem Opus resumplit Idibus Aprilis an. MDCCXXXI., strenue progrediens usque ad an. MDCCXLII. Tum Confessarii Clericorum novum pariter & gravissimum onus subiens, novem ferme annos quasi claudus (ut ipse testatur) & subinde insistens processit, cum fere quotidie ab Opere ad alia agenda avocaretur. Jam vero an. MDCCLI. jussu Cardinalis Rezzonici Episcopi Patavini eodem illo munere liberatus, pristinum cursum tenuit; ac tandem, Deo favente, quadriennio circiter post, v. nimirum
Idus

Idus Aprilis anno MDCCCLV. egregium Opus omnino absolvit cum laude summa, nec unquam apud posteros desitura (a).

Qui rem consideraverit, ut par est, is plane intelliget, me nihil ad gratiam confingere, nihil exaggerare. Quanti enim non dicam laboris solum, sed ingenii etiam atque solertiæ fuit id perficere? Consulendi erant & expendendi scilicet tot auctores, conferendi secum tot lapides ac numismata, & cujus fidei, notæ, & auctoritatis essent singula, judicandum. Singula explorare vocabula necesse fuit sive propria, sive translata, non sorsum ab aliis sumpta ac solitaria, sed in contextu & continuatione sermonis, eorumque usum ac vim docere, varias & implicatas significationes exponere, diffidentes expedire, multiplices harum gradus notare, distinguere, definire, & opportunis exemplis omnia illustrare; quæ sane præstari nequeunt sine ingenti Latini sermonis intelligentia, sine eximio Antiquitatis & Artis Criticæ studio, sine multis denique, magnisque
lit-

(a) Hoc *Lexicon totius Latinitatis* Typis Seminarli Patavini editum fuit an. MDCCCLXXI., & eruditissima Præfatione ornatum a Cajetano Cognolato tunc in eodem Seminario Studiorum Præfesto. De hoc Opere ita Clementinus Vannetius, in quadam Epistola ad Alexandrum Georgium: *Novum Forcellini Dictionis judicio omnium excellit*. Vide etiam *Ephemeridas Florentinas* an. 1774, num. XLVIII., & *Mediolanenses* an. 1774. num. XXV.

litteris. Facile, si vellem, disertus essem in tam illustri argumento. At mihi tempero: neque enim Oratio textitur, sed historia. Unum addam de hoc negotio, quod ingenue in quadam Epistola (a) ad Forcellini laudem testatur ipsemet Facciolatus. *Vix, inquit, ego in plerasque voces quippiam contuli præter consilium, in multas autem ne consilium quidem. Et alibi (b): Princeps hujus Operis conditor atque adeo unus Forcellinus est.*

Aliquid idem præterea contulit ad Græcum Lexicum, & ad Italam etiam Orthographiam augendam & adornandam, non sine magna ipsius Facciolati prædicatione. Paucis. Studia perpetuo fovit Forcellinus: in hæc juveniles annos, in hæc seniles insumpsit. *Adolescens* (sic ille Clericis Seminarii (c)) *Adolescens manum admovi, senex, dum perficerem, factus sum, ut videris.*

Sed hæc hætenus: ad alia nunc, si placet. Has itaque ingenii & industriæ laudes illustriores Ægidius reddidit suis virtutibus, in
pri-

(a) Huic Epistolæ titulus: *Animadversiones Criticæ in magnum Petri Danesii Dictionarium*. Edita est hæc Epistola anno 1759.

(b) In Epistola ad Josephum Lastam, præmissa Lexico Forcellini.

(c) In Epistola, quæ legitur post Præfationem præmissam eidem Lexico.

primis vero modestia, quæ profecto in eo singularis. Plurimum facere mos illi erat, & minimum de se loqui. Si qua ejusdem Operis mentio fieret, solebat laudem omnem, quoad poterat, Facciolato ascribere, ac profiteri suam, qualicumque esset, esse scientiam verborum. Omnia in recessu habebat, nihil ostentabat in fronte. Neque solum ingenii dotes, sed virtutes quoque occultabat; mira tamen dexteritate, ne quis animadverteret: quod nimirum probus esse cuperet, non videri. Hinc rogantibus, cur adeo mature qualibet tempestate de lecto surgeret, respondebat, quod senes parum admodum somno indigeant; & admirantibus cur ipse vel summa ætate fere nunquam interdiu quiesceret, reponebat illud Scholæ Salernitanæ: *Somnum fuge meridianum*. Quare omnibus carus erat, juvenibus præcipue, ad quos se demittere, quibuscum familiariter non dedignabatur versari. Quod sane mirum in homine ætate provecto, & natura ipsa ad gravitatem composito.

Quamquam illud virtutis est, naturam suam versare & flectere, ac sese aliorum ingeniiis accommodare. Atque hoc in illo eminebat. Quid illa ipsius æquabilitas in omni vita, & idem semper vultus, eademque frons? Occupabatur assidue Ægidius in re molestissima, nec ideo conqueri. Occurrebant sæpe interpellatores: non tamen ille propterea turbari,
immo,

immo, perinde ac si vacuus esset, omnes benigne excipere, tam domesticos, quam externos, audire omnes, omnibus præsto esse. Pueros vero, imitatus D. Philippum Nerium, ad se etiam invitare & allicere, amantissime detinere, monere, instruere; & ut libenter rursus accederent, munusculis etiam, quibus maxime ducitur illa ætas, eosdem a se dimittere.

Ad leviora descendam, vivide tamen intimam ejus indolem exprimentia. Delicatae portiones, ab aliis etiam oblatae, ab eodem sibi penitus interdictæ: tentari poterat, non vinci illius abstinencia. Nihil idem in mensa querulus, ad quam jejunos ut plurimum accedebat. Optima omnia, omnia exquisita. Unum tantum molestum ipsi audiendi studioso, si nimirum lectio interPELLARETUR. Hoc unum dissimulare non poterat, vultu ipso silentium omnibus, & voce repente indicens. Libenter etiam audiebat ad recreandum animum Ephemeridas, locorum in quibus ea, quæ referebantur, fierent, peritissimus. Cupiebat enim semper aliquid novi addiscere vel tempore oblectationis honestæ: valde scilicet ab iis abhorrens, qui levia tantum & inutilia sectantur, & (ut proverbio dicitur) qui discum audire malunt, quam philosophum. Recens a prandio fabrilis tractabat, vel pulsabat musicum instrumentum, ne omnino otiosus esset in otio, cui maxime infensus erat, solitas propterea
ali-

aliquid semper agere, orare, legere, scribere, commentari.

Moveor profecto, quoties illius mihi venit in mentem (venit autem sæpissime), tantæque virtutis. Fere semper inclusus domi, raro egredi Forcellinus; quotidie vero ad Sacrum celebrandum; atque hoc pie religioseque peracto, illico rursus domum. Non amœnæ deambulationes eum avocabant, non sociales temporis fallendi gratia conventus, non spectacula, non convivia. Ad domestica quælibet idem officia promptus, ceteris præire exemplo, sua quæque munera diligentissime obire, nihil defugere, immo sese laboribus ultro offerre.

Bis quoque anno ex instituto Seminarii Patavini jubentur alumni secedere per dies aliquot in seipsos, & animum exercere meditatione æternorum. Ne externum quæreretur, ad id se ducem persæpe exhibuit etiam postremis annis Ægidius Seminarii Moderatori, sola mercede laboris, molestiæque proposita. In quo plurimum proficiebat, alloquens juvenes plana quidem & naturali ratione, sed animos utiliter alliciente: juvenes, inquam, alloquens sibi cognitos, & eximæ virtutis penitus conscios, quæ ex ipsa corporis specie emicans capiebat vel ignotos, injiciens ipsis venerationem sui.

Idem siquidem benignus in omnes, in se severus; indulgens omnibus quoad poterat, nunquam sibi; privatim facilis, publice gravis;

vis; Religione solida, non fucata; sermone simplici, ingenio aperto, moribus plane antiquis. Nihil novi pati poterat, Seminarii legibus omnino addictus, vel minimarum servantissimus. Quem cum viderem, videbar mihi intueri solidis lineamentis expressam quandam imaginem pristinae disciplinae, a B. Gregorio Barbadico in hoc Seminarium investae; quem propterea profecutus sum multis lacrymis abeuntem.

Abiit, (liceat brevis ista digressio in laudem hominis, cui me vel maxime obstrictum fateor) abiit, qui me puerum excepit, qui me primis imbuit Religionis Catholicae rudimentis, ac patienter postea pertulit plures annos. Utinam ex ejus disciplina profecerim! Erit mihi certe, dum vivam, jucunda ipsius recordatio. Abiit, inquam, ille eodem quo antea stipendio, non reversurus, in Patriam Cal. Maj. an. MDCCCLV.: neque solum nobis, sed etiam omnibus qui eundem nossent, virisque doctissimis inexplabile sui desiderium reliquit: prae ceteris Antonino Valsecchio, & Jo: Baptistae Morgagno, quorum laudibus personat tota Europa. Ab utroque magno in honore habitus Forcellinus, ab utroque consultus, utrique maxime earus. Consultus etiam ab aliis multis, & a clarissimis Joanne Poleno, & Julio Pontedera, quos cum Morgagno saepe solitus & ipse Aegidius consulere. Ac Morgagnus

gnus quidem hunc mox discessurum amplexus, non potuit sibi a lacrymis temperare. Abiit tamen, ac sese interim in erudiendis populis, in Confessionibus excipiendis perpetuo exercuit. Cum tandem, triennio propemodum evoluto, letali morbo corripitur. Jam jam moriturus maximas illi ex animo gratias egit, qui primus sibi attulit nuntium mortis, cujus ipse, ut audiui, certa præsentione non caruit. Lætus aspexit imminens, terribilium quod omnium maximum. Itaque prid. Non. April. an. MDCCLXVIII. inter labores exstinctus est, æternos, ut speramus, pro iisdem præmio apud Superos potiturus. Piacularia inter Sacra laudatus fuit ab Antonio Corà, olim ejusdem Seminarii Patavini alumno.



V I T A

ANTONII SANDINI.

ANtonii Sandini Vitam licet accurate jamdiu explicuerit Josephus Rinaldus, eandem ramen paucis exponere & ipse aggredior, ne prætermittere videar, qui omnium maxime memoria dignus. Non illam aliis a me conscriptis intersero, ne, ut ita dicam, multicolor res evadat, ac propemodum sui dissimilis.

Antonius Sandinus honestis parentibus natus est Idibus Juniis an. MDCXCII. modico Agri Vicetini pago, cui nomen Novæ, ad ripam Medoaci, ibique liberaliter educatus. Jam tum videbatur boni exitus spem præ se ferre. Quare in Patavinum Seminarium exceptus est cum onere solvendi partem tantummodo annui convictus pretii. Quam quidem gratiam Seminarium idem abunde retulit.

Annus

Annum quintumdecimum jam compleverat, cum in hunc locum ingressus aliis exemplo esse cœpit, & admirationi. Ferebatur ille natura ipsa ad omnem pietatis & Artium bonarum cultum. Ejus aucta propensio est ex domestica disciplina. Tum vero ad optimi cujusque imitationem exarsit. Studiis impense deditus, diu noctuque in iisdem se exercuit, quanta maxima potuit contentione.

Qui suo diffidunt ingenio, vites interdunt; non admodum vero (ut plurimum) ingeniosi. Sandinus & ingeniosos antecedeat diligentia, & diligentes ingenio; hoc in dies acuebat industria. Politioribus itaque litteris institutus, ad severiores accessit. Philosophiæ ac Juris scientiæ se dedit, cum utraque jungens Ecclesiasticæ Historiæ studium, quod potissimum ducebatur. In hac obscunda provincia peritissimum ducem habuit avunculum suum Vincentium Fugam nominis fama illustrem (a). Hoc præeunte adeo progressus est,

i 2

(a) Vincentius Fuga Francisci filius ortum habuit Novis, & an. 1688, cooptatus est in alumnos Patavini Seminarii, duodeviginti annos natus. Confecto scholarum cursu, in præceptorem electus ibi aliquandiu Ecclesiasticam Historiam docuit. Anno hujus sæculi quintodecimo libellum edidit, cui titulus: *Notitiæ Orbis Sacri, & Profani; ab ejus exordiis ad præsentia usque tempora compendium*. Exstat præterea in hac Bibliotheca ms. Lexicon Geographicum ab eo non omnino absolutum, quod ita inscribitur: *Notitia Geographica Antiqui, Medii, & Novi Ævi, litterarum ordine digesta*. A Seminario

est, ut eidem ipsum jam tum designaverit
successorem Georgius Cornelius Episcopus Pa-
tavinus, ingeniorum, & humanarum, quam
qui maxime, rerum prudens.

Interim, absoluto studiorum cursu, ter-
tio & vigesimo ætatis anno duplex tentamen
subiit Antonius, Historiæ quidem Ecclesiasti-
cæ in Seminario, in Sacro autem Collegio
Jurisprudentiæ, & cum ei vertisset utrumque
prosperè, in magistrorum cœtum describitur,
ac primis Grammaticæ rudimentis tradendis ex
Seminarii instituto addicitur. Non multo post
destinatam sibi palæstram adiit, in qua vesti-
gia reliquit alte ad immortalitatem impressa.

Viget adhuc, & efflorescit quotidie ma-
gis ejusdem nomen. Circumferuntur passim
&

discessit, ut in Cathedrali Ecclesia hujus urbis Sacerdotium
(Custodiam vocant) in se collatum iniret. Mortem nactus
octogenarius, ibidem sepultus est cum hac inscriptione :

D. O. M.

VINCENTIO FUGA

HISTOR. ET GEOGRAPH.

CATHEDRAL. CUSTODI. BENEMERITO

S.

P. C.

VIXIT. ANN. LXXX. OBIIT. III. NON. JAN.

A. D. C1822.

Renovata tandem Ecclesiæ area, sublata inscriptio.

& usurpantur magna cum laude ejus Opera, quibus ipsi consilium fuit totam Ecclesiæ Historiam ad communem Scholarum usum redigere. Ac primum quidem an. MDCCXXVI. XII. Dissertationes ex eadem Ecclesiastica Historia excerptas propugnandas suscepit in magno lectissimorum virorum cœtu. Res cessit omnino feliciter, eique ad alia prosperum præbuit quasi omen. Non curis Antonius perpercit, non laboribus, ut multo ante conceptum Opus ac meditaturn perficeret. Anno itaque MDCCXXXI. Historiam protulit Apostolicam; Historiam vero Familiæ Sacræ anno MDCCXXXIV., ac tandem quinquennio post, Vitas Pontificum Romanorum ex antiquis monumentis descriptas (a).

Non mentiar, si dicam hæc vix edita ubique plurimum placuisse, ubique nacta esse plurimos laudatores. Certe horum omnium parari statim debuit editio altera, ut eadem petentibus satisfaceret. Neque vero ille quidquam de pristina contentione remisit, favoris publici confidentia. Dissertationes quamquam accurate scriptas, retractare cœpit diligentius. Sic nova cura recognitas, quasque resectas,

i 3

&

(a) Scripsit & alia: ex his partim edita post ejus mortem, partim adhuc inedita exstant in Bibliothecâ Seminarii Patavini.

& cumulas infuper aliis octo, rursus in lucem misit anno MDCCXLII. , & alia pariter deinceps, quæ prius ediderat, aucta plenius & illustrata: Historiam scilicet Apostolicam anno MDCCXLIV. , anno autem sequenti Historiam Familiæ Sacræ, Vitas demum Pontificum Romanorum triennio post.

Hinc aucta ejus fama, & gloria cumulator reddita. Eum suspexit non una Italia, sed etiam aliæ provinciæ, præcipue autem Germania. Herbipoli edita fuisse comperio Sandini Opera anno MDCCXXXVI. , Augustæ vero Vindelicorum anno MDCCXLVIII. , &, quod longe majus, prætulisse hunc titulum: *Basis Historiæ Ecclesiasticæ ad usum Cleri Augustani*. Joannes enim Bernardus Episcopus Chrysopolitanus, Herbipolitani Suffraganeus, & Serenissimus Lantgravius Hassiæ Darmstat, Episcopus & Princeps Augustanus, putarunt optime posse se suis prospicere; iisdem exhibitis Sandini libris.

Tam aperta existimationis indicia litteratorum virorum erga hominem sibi ignotum, ab eo non quæsitæ, non eblandita, non officio civili extorta, virtutem & laudem hominis plane ostendunt. Hanc præ oculis habuit eximie sapientiæ Pontifex Benedictus XIV., qui de Sandino præclare, solitus præterea quædam ex ejus libris excerpere, quæ mox transfertet in suos; non mediocri postea dolore affe-

affectus ex ejus morte. Clare perspicitur ex hoc uno, quantus Sandinus fuerit, qui talem tantumque Pontificem tantopere potuit afficere; & in quo ille eminebat, in eo ipso eodem magnopere se probare. Quamquam satis est consulere ejusdem libros; statim discimus quanta fuerit viri laus. Quam diligenter omnia persequitur! Si quid assertit ab aliis auctoribus, hoc suis ipse oculis vidit in eorum Operibus. Quidquid affirmat, ea non temere ab aliis accepta refert, sed hausit, ubi potuit, ex ipsis fontibus, indagare solitus conquisitione intentissima, quæcumque haberi possent monumenta. Quantum præterea pondus in verbis atque sententiis! Quam nihil non consideratum exibat ex ore!

Atque hoc quidem elucet in illo præcipue libro, qui inscribitur: *Vita Pontificum Romanorum*. Fuerunt enim quidam ex his patrum probi; fuerunt etiam, qui obnoxii vitiis non paucis. De his non tacuit Antonius, sed ita dixit, ut videatur invitus de illis dicere, quod sequius sit, historię tantum veritate coactus, usus etiam propterea non semel aliorum verbis. Dixit, inquam, parce & circumspice, ne quid illorum dignitas venerationis amitteret, præsertim apud juvenes nondum acri judicio, & intelligentia pollentes: scripsit enim horum in primis gratia. In hoc, quidquid nonnulli dicturi essent, maluit

2a se quidvis potius, quam prudentiam desiderari. Cavuit etiam, ne videretur quodammodo eorum memoriam lædere, quos debemus honore & amore prosequi tanquam patres.

Veniamus ad extima. Ipsa dicendi ratio (uti in aliis quoque ejus libris) quam naturalis, & ad docendum idonea! Nullum verbum temere adscitum, nullum redundans. Concludit paucis multa, quin tamen eadem inobscurat, & obsit intelligentiæ lectorum. Ubique subtili quadam & pressa oratione limatus, historico plane numero & modo. Qui plura desiderant, in subjectis adnotationibus habent quo confugiant. Ibi ille præcipuos auctores indicat, & fontes, & verba non raro usurpat desumpta ex antiquis Patribus, & Scriptoribus probatissimis, utpote quibus inest plus auctoritatis & ponderis.

Hinc ejus Opera, præ ceteris Vitæ Pontificum Romanorum, a multis quæsitæ, variis in locis edita, sæpe ac sæpius lecta, in deliciis habita, quasi exemplar proposita; quod quidam ingenuus dictionis color ac nitor, & multiplex eruditio cum insigni prudentia jungitur. Tantam sibi ille existimationem pepererat! Cui tamen non defuere censores.

Arma primum in eum expediit Jacobus Hyacinthus Serry, Primarius Theologus Patavinus, cujus *Criticas Exercitationes de Christo,*
ejus-

ejusque Virgine Matre Sandinus prior impugnaverat studio veritatis. Ea enim prima Historiæ est lex, *ne quid falsi dicere audeat; deinde, ne quid veri non audeat* (a). Theologus itaque, ceteroquin celeberrimus, cum se videret laceffitum, vulgavit an. MDCCXXXV. *Animadversiones Anticriticas* in Historiam Familiæ Sacræ: quibus non modeste minus, quam erudite respondit Antonius in editione altera ejusdem Historiæ. Nova hæc oblata ipsi est occasio prodendi sui. At ubi prodire responsa, Theologus finem vivendi fecerat.

Renovarunt postea bellum Lipsienses. Horum accusationes habentur in Supplementis ad Nova Acta Eruditorum an. MDCCXXXVII. Lipsiæ editis tom. II. sect. 9. & 12. Singulas paucis quidem, sed prorsus Antonius diluit, integram in referendis & explicandis suis verbis requirens in accusatoribus fidem. Quæ his respondit, tanquam mantissam Historicis Disputationibus subjicit.

Tandem Christophorus Guilelmus Franciscus walchius Jenæ Professor scripsit contra Disputationem illius vigesimam de Constitutione Ludovici Pii ad S. Paschalem I. Quæque scripserat publici juris fecit per typos Lipsiæ an. MDCCXLIX. Tum librum misit cum epistola ad Sandinum,
eun-

(a) Cic. de Orat. I, II. c. XV.

eundem benignissime ad respondendum alliciens, se paratissimum fore affirmans quælibet retractare, si errorem nosset. Cui non potuit respondere Sandinus repentina morte præruptus, de qua dicam, cum prius de ejus moribus pauca dixerō.

Fuit itaque acceptus omnibus, quamdiu vixit, candidæ vitæ laude & ingenuæ. Minime pecuniæ avidus & honoris, loquendi parvus, audiendi studiosus, unde aliquid posset discere, consideratus in omnibus & prudens, maxime vero diligens in implendis singulis partibus officii sui.

Seminarii Bibliothecæ Præfectus eandem auxit utilissimis libris, iis præsertim, qui ad Ecclesiasticam Historiam pertinent. In ea perstabat propemodum totos dies, cujuslibet incommodi quasi oblitus. Non deambulandi voluptas, non spectaculorum novitas poterat hinc avellere hominem in studiis abditum. Excipiebat humaniter, quicumque accederet discendi cupidus, eumque, ubi opus esset, juvabat opera, consilio, libris. Arcebat autem quidquid interpellare se posset. Erat enim in illo comitati conjuncta gravitas. Ne particulam quidem temporis sinebat inutiliter sibi surripī.

Veteres Latinos auctores studuit scribendo exprimere; nihil tamen sibi in hoc arrogabat, neque in aliis: immo severos exquirebat criticos, horum judicio certus emendare quæque
vel

vel tollere. Opto, inquit, redargui me, & cupio refelli (a).

Nihil ferre poterat, quod verteret in laudem sui. Si quid hujusmodi audiret, suffundebatur pudore, nec patiebatur eum, quisquis esset, ulterius progredi, statim ejusdem verba intercipient. Verum, quin ipse animadverteret, augebat laudem ipso contemptu laudis. Enimvero evasit laudatissimus, non ob eximiam tantum Ecclesiasticæ Historiæ scientiam, sed ob insignem præsertim hanc de se sentiendi modestiam, quam præferebat cultu corporis, scripto, sermone, vultu; a notis propterea & ignotis, a suis & exteris magni factus. Audivi egomet jam diu narrari, quosdam, qui Patavium venerant ex Polonia, de eo quæsisse studio videndi ipsum. Eo usque Sandini nomen pervenerat!

Idem electus ad Patriciorum Adolescentium institutionem, iisdem tradidit Ecclesiæ Historiam. Horum unus Romæ emicuit Romana Purpura (b), Venetiis alter fulget Patriarchatus honore (c), integerrimis uterque moribus. Quæ porro ejus animi lenitas, mansuetudo, patientia! Nescio cui ex obtrektoribus, qui

- (a) In Epist. ad Lectorem, præmissa Hist. Familix Sacræ.
- (b) Carolus Cardinalis Rezzonicus, Pontificis nepos.
- (c) Fridericus Maria Giovannellius.

qui exceperat eum acerbius, *Possum*, ait, *re-*
mordere, si velim; . . . sed magis volo esse disci-
pulus Ejus, qui cum malediceretur, non male-
dixit (a). Sententia sane digna Christiano
viro, cujus vitæ regula & lex Religio!

Religio erat prima Sandini cura. Reli-
gionis amore, scripsit Disputationes, Historias,
Vitas Pontificum Romanorum, quibus, adnota-
tione subjecta, inseruit illam B. Gregorii Bar-
badici (b), ut illi se præberet gratum, &
alios ejus amore incenderet. Ob Religionem
exercitam, vitam duxit labore assiduo, cui et-
iam forsitan tribuenda ejus mors præpropere.
• Hanc ille subiit anno MDCCLI., VII. Cal. Mart:
ætatis nono & quinquagesimo nondum exple-
to. Ab ingruente morbo superfuit paucas ho-
ras; sed ad ultimum hoc certamen se compa-
raverat tota vita. *Finis vitæ ejus nobis luctuo-*
sus, amicis tristis, extraneis etiam ignotisque
non sine cura fuit (c). Hunc enim tunc ad
eos propagarunt Ephemerides litterariæ (d),
sed viri nomen ulterius semper ejus Opera
propagabunt.

AN-

(a) In eadem Epistola præmissa Hist. Familiæ Sacre.

(b) Vide Benedicti XIII. Vitam adnotatione 6.

(c) Tacitus in Vita Julii Agricolæ c. XLIII.

(d) Novelle della Repubblica Letteraria an. 1751.
pag. 72.

ANTONII SANDINI OPERA.

Dissertationes XII. ex Ecclesiastica Historia de-
promptæ. Patavii typ. Seminarii 1726. in 12.

Historia Apostolica ex antiquis monumentis colle-
cta. Ibid. 1731. in 8°.

Historia Familiæ Sacræ ex antiquis monumentis
collecta. Ibid. 1734. in 8°.

Vitæ Pontificum Romanorum ex antiquis monu-
mentis collectæ. Ibid. 1739. in 8°.

Disputationes historicæ ad Vitas Pontificum Rom.
Ferrariæ (*Patavii Typis Semin.*) 1742. in 8°.

Hæc Sandini Opera Herbipoli & Augustæ Vinde-
licorum fuerunt edita: sæpe autem Patavii typis Se-
minarii ab Auctore retractata & aucta.



V I T A

ANTONII ZANOLINI.

Calendis Maji, anno tertio & nonagesimo sæculi superioris editus est Patavii Antonius Zanolinus, litteratis quidem omnibus, sed amatoribus linguarum veterum præcipue carus. Parentes habuit Joannem Zanolinum, & Annam de Carrariis, honesto genere utrumque natum. Annum quartum ac decimum is impleverat, cum hujus Seminarii alumnis ascriptus est, iv. scilicet Calendas Decembr. an. MDCCVII. Institutus antea grammaticis præceptionibus, statim cœpit ad Humanitatem politoribus litteris informari.

Plurimum memoria valuit; quæque puer legerat vel audierat, senex meminerat. Étac peracti ingenio, flagranti studio, discendi aviditate inexhausta. His accedebat ingens corporis

poris firmitas, ac prope herculea, exantlandis quibuslibet vel improbis par laboribus. Hac tanta liberalitate naturæ gaudens Antonius ceteris antistare solebat, præmia referre, mirum in modum progredi. Illud peculiare: quidquid discendum sibi proponeret, sive linguas, sive amœniores litteras, sive scientias, in eo adeo excellebat, ut natus potissimum videretur ad illud; quem tamen ad omnia factum non sine admiratione testantur ipsius magistri.

Singularis tamen huic homini semper fuit ad Orientalium linguarum studium propensio. His addicitur, cum versaretur adhuc in Rhetorico ludo, si non temporibus illis novo, certe admodum raro exemplo.

Interim & Philosophos audit, & Juris prudentiam excoluit, nec omisit, quod ad elegantem eruditionem pertineret. Unum ac viginti annos natus, absoluto studiorum cursu, Juris utriusque laurea donatur, nec abire e Seminario permittitur. Ubi hætenus auditor fuerat, præceptoris exercere cœpit officium, & ea primum tradere, quæ ex consuetudine loci hujus a magistris junioribus tradî solent.

Cum jam anno MDCCXX. Taurinum vocatur a Sardo Rege perhonorifice Josephus Passinus Orientalium linguarum in Seminario Professor. Ad eas tradendas statim eligitur Zanolinus, quantum amorem, ut antea diximus, a primis annis imbiberat. Vix credibile, quæ
&

& quanta fuerit illius contentio. In hujusmodi studio assiduus erat & indefessus, nulla plerumque ratione habita vel importuni temporis, vel incommodi. Ad pluteum sedere solebat plures horas, aliquando vel recens a prandio (quod valde noxium), nisi cum illinc scholæ munus, vel alia res avocasset. Admittebat prorsus neminem zotheca inclusus, ut se oblectare pro lubito sine interpellatoribus posset. Totam etiam quandoque noctem, quin animadverteret, vel hiemis tempore insumpsit in hæc studia, frigoris, somni, cibi, potusque oblitus. Hinc tot pulcherrima monumenta, quibus optime & studiosæ præsertim juventuti consultum, & dignitati linguarum. In his & multiplex, & exquisita eruditio. Quo anno singula prodierint, dicam post exitum hujus Vitæ, ne rem impediam. Quo in pretio fuerint, dicam nunc.

Lipsienses Eruditi, quorum judicio exhibita fuerunt quædam Opera Zanolini an. MDCCXLV., certatim effunduntur in ejus laudes. Eum nunquam nominant, quin ipsum prædicent virum doctissimum, politicissimum, clarissimum, celeberrimum. Si quando ab ejus opinione recedunt, fatentur ipsi, quæ dicunt, se *uberiori ejusdem meditationi relinquere, & eidem, ejusque laudatissimo instituto se totos favere* (a).

Lo-

(a) Nova Acta Erndit. 20. 1745. pag. 261.

I loquuntur ibi de Grammatica Institutione Linguæ Syriacæ ab eo confecta. Hanc, & Lexicum Syriacum cum annexa Disputatione de *Lingua Syriaca, Versionibus Syriacis & Maronitis* efferunt magnis laudibus. Verum quæ in ea continentur, summam ipsi exhibent, permoti, ut ajunt, *dignitate argumenti*. Tandem fatentur ingenue, *ita comparata esse omnia, ut plane persuadeant lectoribus, librum sua commendatione non indigere, sed propriis, quibus exsplendescit, virtutibus gratiam omnium, ac singulorum haud difficulter initurum (a).*

Ex his intelligi potest, quid de reliquis Antonii Operibus sentiendum sit. Omnia enim ex eadem officina. Quare de illo homines passim loqui, omnes prædicare magnifice, de rebus his præ ceteris cum consulere, & ejus responsa excipere quasi oracula. Referam, quod ab eximio ejus temporis viro accepi.

Patavii non leve furtum patrum fuerat. Nomen deferunt nescio cujus ex Judaica gente, qui consors erat & socius criminis. Sed res difficillime cognosci poterat. Ne qui enim eam scirent, is obscuritatis latebram adhibuerat. Erant nimirum omnia notis Rabbinicis valde implicita. Urbanus Prætor ad se vocari jubet Zanolinum; rogat, num valeat scrip-

k

ptu-

(a) Nova Acta Erudit. an. 1745. pag. 264.

pturam legere & interpretari. Eandem statim legit, & certam ejus interpretationem ostendit.

Neque solum hujusmodi scientia excelluit Antonius, sed etiam, & quidem plurimum, dicendi laude. Uno quasi tenore fluunt omnia quæ scribit, apta, numerosa, concinna. Ubi-que succus ille & sanguis incorruptus veræ & ingenuæ latinitatis apparet, ubique naturalis, non fucatus nitor. Hunc sibi adsciverat Zanolinus assiduo optimorum Scriptorum usu & consuetudine. Solitus enim erat, licet tot aliis curis implicitus, quotannis studiosius legere Latinorum auctorum principes, totosque percurrere. Jam vero, ut est in proverbio, qui ambulant in sole, necesse est colorari.

Ad Pocsin propensus, carmina feliciter exarabat cum Latina, tum aliis linguis. Prostant eadem in libellis, qui dicuntur vulgo *Raccolte*. Leguntur præterea nonnulli Latini versus admodum faciles & concinni, ab eodem præmissi Disputationi *De Eucharistia Sacramento cum Christianorum Orientalium ritibus in eo conficiendo & administrando*.

Vidi etiam non exiguum volumen Epistolarum, quas ille latine scripserat. Utrum adhuc exstet, & apud quos, ignoro. Nondum certe; quod sciam, publicam lucem subiit.

Rinaldi Orationes posthumas opportuno rerum indice instruxit, & pulcherrima iisdem præmissa Epistola ornavit. Riccii vero Lugienfis

gientis Opera locupletavit animadversionibus, synopsis, argumentis, ac gemino indice copiosissimo, ad maiorem eorum intelligentiam, & studiosorum utilitatem. Plurima quoque contulit in editionem Hesiodi, Orphei, & Procli, anno MDCCXLVII. Seminarii Patavini typis confectam (a). Callebat enim optime Græcam linguam, & ubi ferebat occasio, loquebatur græce. Sed omnia dicendo persequi difficillimum. Fuit enim ille, quamvis ingenio præstans, laborum patientissimus, quales plerumque non solent esse ingeniosi.

Atque hic tantus vir, cujus ingenium perspicax, scientia eximia, humanarum rerum, ut plurimum, videbatur ignarus. Loquitabatur cum pueris publice, cum infima de plebe hominibus. Homo simplex, & plane antiquus. Plurimus vero sermo de rebus, quæ deponi in aure qualibet tuto possunt. Quæ quidem eo absurdiora videbantur, quo magis ab ejus externa specie abhorrebant.

Erat ille siquidem statura eminens, forma majestatis plena, &, ut ita dicam, imperatoria; nescio quid antiquitatis vestitu redolens; oculis, ore, vultu ad dignitatem compositus, ut ipso aspectu cuivis injiceret observantiam sui, & nominis celebritatem æquaret.

k 2

In

(a) Novelle della Repub. Letteraria an. 1747. pag. 211.

In familiari sermone facundiæ parum, in ver-
tendis Sacris Scripturis vivida verba, & omni-
nò exprimentia.

Sua conditione contentus vixit. Ab illu-
stribus Academiis magni factus, sapientibus
viris notus, inter paucissimos insigni doctrina
excellens, eximiis monumentis apud externos
etiam clarus, semper modestissime se continuit.
Non ampliores honores petiit, non splendidas
Cathedras, non ampla stipendia. Tenuissima
spe proposita, diurnis nocturnisque laboribus
frangebatur Religionis gratia. Hujus amore in-
tradendis Orientalium populorum linguis vitam
consumpsit, harum studium aliis inculcat (a),
Pontifices earundem fautores laudat, tum B. Gre-
gorium Card. Barbadicum, qui iisdem & ipse
auctus, Seminarium auxit Patavinum (b).

Pietas solida vel a puero, jam tum præ-
mio affecta. Religio sine fuco, sine artificio
mores, non simulatio, non latebræ: apertus
animus & plane ingenuus. In discendo do-
cendoque, exercitatio patientiæ pertinax. Do-
cuerat annos quinque & quadraginta circiter,
cum repente III. Cal. Martias an. MDCCLIX.
morbo corripitur, quem apoplexin vocant.

Sta-

(a) In Epist. ad Lector., præmissa Lexico Syriaco.

(b) In Epistola ad Benedictum XIV. Pontificem Maximum,
præmissa eidem Lexico.

Statim visus est a morte non longe abesse .
Quare instrui cœpit ad subeundum hoc ultim-
um Christiano more discrimen . Morbus in
dies remisit , ita ut e lecto surgere Antonius ,
& ambulare potuerit . Dimissione obtenta , dis-
cessit e Seminario , stipendio aucto , Domum
se recepit , ut reliquum vitæ tempus transigeret
inter suos . Cum diutius eum afflictasset morbi
vis , tres circiter annos post ingravescens , xiv.
Cal. Martias oppressit hominem & exstinxit .

Sic vir doctissimus , per se cognitus , sine
ulla commendatione majorum , multis variis-
que perfunctus laboribus acquievit anno ætatis
nono & sexagesimo nondum expleto . Corpus
ejus elatum est , & in Ecclesia Parochiali S. Ni-
colai hujus urbis sepultum . Non parum damni
fecere ejus interitu Orientales linguæ ; quarum
notitia nescio an in his regionibus tunc ille
habuerit parem neminem . Magnum certe Se-
minatio lumen ademptum est . Multam apud
omnes inibit gratiam , qui illius jacturam &
nomen reparabit .

ANTONII ZANOLINI OPERA.

Quæstiones e Sacra Scriptura ex Linguarum Orientalium interpretatione ortæ, an. 1725. in 8.

Dissertationes ad S. Scripturam spectantes, Joanni Francisco Cardinali Barbadico dicatæ, an. 1729. in 12.

Lexicon Hebraicum ad usum Seminarii, Clementi XII. dicatum, an. 1732. in 4.

Grammatica Linguae Syriacæ Institutio ad usum Seminarii, Antonio Marino Priolo Episcopo Vicetino dicata, an. 1742. in 8.

Lexicon Syriacum, cui accedit Disputatio de Lingua Syriaca, Versionibus Syriacis, & de Maronitis, quibus præcipue nunc Lingua Syriaca in usu est, ad usum Seminarii, Benedicto XIV. dicatum, an. 1742. in 4.

Lexicon Chaldaico-Rabbinicum cum Rabbinorum abbreviaturis. Accedit Disputatio de Targumin, sive Paraphrasibus Chaldaicis, Thalmude, Cabbala, Commentariis Rabbinorum, & Lingua Chaldaica &c. ad usum Seminarii, dicatum Carolo Cardinali Rezzonico Episcopo Patavino, an. 1747. tom. 2. in 4.

Ratio Institutioque addiscendæ Linguae Chaldaicæ, Rabbinicæ, Thalmudicæ &c., Benedicto XIV. dicata, an. 1750. in 4.

Disputatio de Eucharistiæ Sacramento cum Christianorum Orientalium ritibus in eo conficiendo & administrando, dicata Alphonso Zaborra Ordinis S. Salvatoris Procuratori Generali, an. 1755. in 8.

Hæc omnia Seminarii Patavini typis excusa.

Disputationes ad S. Scripturam spectantes de Festis & Sectis Judæorum, cum ejusdem Auctoris adnotationibus, Abbati Antonio Arrighio in Gymnasio Patavino Juris Cæsarei Professori Primario dicatæ. Venetiis, an. 1753. in 4.



V I T A

JOSEPHI RINALDI.

XVII. Calendas Decemb. an. MDCXCVII.
natus est Patavii Josephus Rinaldus, parenti-
bus Sebastiano Rinaldo, cive Bergomensis, &
Angela Placentina, sorore Jacobi Placentini,
in Patavino Gymnasio Theoreticæ Medicinæ
Primarii Professoris. Nondum decennis XII.
Cal. Novemb. an. MDCCVII. in Patavinum Se-
minarium ingreditur, imbuendus primis Gram-
maticæ rudimentis. His ille diligentissime sese
addixit, qua ætate alii plerumque ludis, &
otio indulgent.

Huic intentæ curæ accedebat facilis &
constans memoria, læta indoles, & experre-
cta, perspicuum ingenium, & quædam men-
tis maturitas ætatem prævertens. Hinc jam
tum magistri coeperant quasi omen felicitis il-

lius progressus, ad quem & ipsi plurimum contulerunt. In primis enim Rhetoricæ exercitationibus præceptore usus est Josepho Pasino; ducem vero habuit ad Theologica M. Antonium Trivellatum. Utriusque nomen jam pridem fama vulgavit, & Seminarium grata recordatione prosequitur (a). Horum exemplo, & præmiis, quæ sua non semel industria retulit, excitatus, humaniorum graviorumque disciplinarum cursum cum laude absolvit.

Duos circiter ac viginti annos natus publicum de re Theologica certamen iniit, quia ad subsidium quisquam hæreret ejusdem lateri; & in Sacro Theologorum Collegio, ut mos est, examen subiit, in quorum cœtum cooptatus, ab Eminentissimo Cardinali Georgio Cornelio Episcopo Patavino jussus est in Seminario fungi magistri munere. Utque erat elegantis ingenio, & ad litteras plane factus, studiis amœnioribus destinatur. Cœpit itaque ad Humanitatem Clericos instituere, tum eosdem plenius excolere Rhetoricis exercitationibus; post, ut ad majus theatrum, translatus est ad Academiam (b). Accidit per hos dies, ut Sebastianus Franzonus (c) a Seminario discederet, ubi rei litterariæ curandæ præerat. Sufficitur

Jo-

- (a) Vide utriusque Vitam pag. 95. & pag. 108.
- (b) Vide pag. 51.
- (c) Vide ejus Vitam pag. 85.

Joseph in ejus locum, non in domesticorum oculis tantum, sed in totius etiam litteratissimæ urbis aspectu positum. Quamdiu vixit, hunc ille tenuit, & ita tenuit, ut & optime suorum decessorum tueretur nomen, & redderet se spectabilem non modo æqualibus, sed & senioribus, iis etiam, quos præceptores habuerat. Discipuli pariter ac magistri secum quodammodo in eo observando certabant. Tanta illi auctoritas! Hanc obtinuerat cum peculiari quadam existimatione eloquentiæ, tum æquabili vitæ constantia, & gravitate; quam comitati miscens, & facilitate temperans, summis, infimis, mediis acceptus erat.

A nobis ille jampridem abiit, sed in Orationibus formam sui reliquit expressam coloribus plane suis. Quæ verborum elegantia! Quæ suavitas numerorum! Ubique nitidus & concinnus. Argumentorum vero delectus, sententiarum sanitas & utilitas, pietatem hominis produnt, ac Religionem, cujus præsertim gratia se scripsisse fatetur ipse in Epistola ad Eminentiss. Carolum Cardin. Rezzonicum. Episcopum Paravinum, cui suas Orationes dicar. Qui eidem successit proxime in Præfecturam, Laurentius Lorenzonus, duobus hisce versiculis ipsum pinxit:

*Quem legis eloquio suavem, cultumque, piumpque,
Talis erat facie, moribus, ingenio.*

Ep

Et ad Orationes quod attinet: quindecim editas ab ipso invenio an. MDCCXLVI. typis Seminarii Patavini. Harum tredecim publice recitaverat in annua solemnī studiorum Seminarii ejusdem instauratione. Ex duabus reliquis unam habuerat III. Nonas Januar. an. MDCCXXXI. in Sacro Theologorum Collegio Patavino, ut eorum nomine Joanni Archiepiscopo Minotto-Othobono Patavinæ Episcopalis Cathedræ honorem gratularetur: alteram in ejus funere pridie Idus Decemb. an. MDCCXLII. in Æde Cathedrali Patavina. Utramque antea separatim ediderat; ac primam quidem dicaverat ipsi Joanni Archiepiscopo, hanc ejus fratribus. Has omnes iisdem postea typis editas rursus video an. MDCCLVII. cum aliis octo præterea posthumis publice in Seminario habitis a Josepho, cum studiis ex instituto proluderet, & pari omnino laude conscriptis. Hanc alteram editionem, quæ omnes continet, promovit ejus avunculus Jacobus Placentinus, de quo hujus historiæ initio, multæ celebritatis Professor. His præmittitur ab Antonio Zanolino viro clarissimo, & in Seminario Patavino jamdiu linguarum Orientalium magistro (a) Latina Epistola elegantissime scripta ad eundem Professore.

Quo porro litteratis viris in pretio fuerint

(a) Vide ejus vitam pag. 142.

runt Rinaldi Orationes, colligimus ex auctoris ipsius Epistola ad Lectorem, iisdem præmissa. Ait enim ille, tot a sapientibus viris admotos fuisse sibi stimulos ad eas edendas, *ut ne liberum quidem fuerit, sine pervicacia nota, diutius reluctari*. Fuerint, opinor, isti, qui toties dicentem ipsum audierant, & lectissima corona ornaverant, Publici scilicet Professores, & Academici (uti agebant) *Recuperati*, quos inter etiam Joseph recensebatur, & alii eruditi viri. At isti cives: quid exteri?

Litterariæ Ephemerides Florentinæ ad an. MDCCXLVI. de Orationibus his commemorant, earumque nitorem, elegantiam, concinnitatem gratulantur auctori.

Eidem pergenti Romam an. MDCCCL., Faventiæ, ut audiui, occurrit vir litteratus. Hic, utpote qui ejus Orationes legerat, erat absentis maximus admirator, sed ipsum minime de facie norat. Ejus itaque adventu Paravio cognito, cum statim adit, rogat, nossetne Rinaldum, num is valeret, num alia scriberet, in ejus laudes effusus. Joseph de se, de rebus suis solitus nunquam loqui, paucis admodum sese expedit. Mirari alter, ac propemodum subirasce, quod tam frigide responderet; cum jam admonitus ab itineris ejus socio, non sine admiratione intellexit, quicum scilicet loqueretur, esse illum ipsum, quem tantopere commendabat.

Is

Is interim Romam venit, post Neapolim: utrobique, immo etiam in tota Hetruria ab eximiis viris exceptus est honorifice: quod sane mirum, præsertim Romæ, ubi, etiam quæ magna sunt, assiduo usu prope vilescunt. Suas hic Orationes Benedicto XIV. exhibuit, de quibus cum laude Pontifex. Enimvero

Principibus placuisse viris non ultima laus est (a);

at tanto Pontifici insignis prorsus.

Quam vero splendide de iisdem senserint Eruditi Lipsienses, quorum iudicium subire an. MDCCXLVIII., patet ex publicis Academiæ illius monumentis (b). Singularum primum exhibent argumenta, mox concludunt, ita omnes lucubratas esse, ut neque puritas desit, neque ingenium vividius, neque alacritas atque ornatu (c). Neque Oratorem tantum earum auctorem vocant, sed etiam *Philologum & Philosophum* (d). Præter editas Orationes exstat Epistola pulcherrima, qua ille Lexicon Hebraicum ab Antonio Zanolino ad usum Seminarii Pa-

(a) Horat. l. 1. Epist. xvii. 35.

(b) Nova Acta Eruditorum, an. 1748. pag. 615.

(c) Ibid. pag. 618.

(d) Ibid. pag. 615.

Patavini confectum Clementi XII. dicavit an.
MDCXXXII.

Idem jussus ab Eminentiss. Carolo Card. Rezzonico tunc Episcopo Patavino, Antonii Sandini, de Historia Ecclesiastica egregie meriti, sibi que amicissimi, Vitam scripsit. Naturalis ipse scribendi modus fidem legenti facit, & clare ostendit, virum optimum a laudato viro laudari. Ex his omnibus magna estimationis accessio. Orationes non semel usæ, in illustres ille ascriptus Academias, a Patavinis Episcopis magni factus, sacris redditibus ab iisdem auctus, Cardinalium etiam Epistolis honestatus, suis & exteris notus.

Sed de his hæcenus: nunc de moribus, qui sane integri, liberales, honesti. Fuit enim perpetua vitæ illius cum oratione consensio. Tam domi, quam in sociali congressu, politus Joseph & cultus; non multa tamen in familiari sermone facundia. *Omni diligentia mundiciam, non affluentiam affectabat* (a): ut videretur semper præ oculis habere illud, *Ne quid nimis*. Nihil ideo fucati in verbis, in vestibus, in capillis. Talis (liceat mihi ita loqui ad rem exprimendam, ut erat) talis omnino ornatus, qualem in dicendo postulat Quintilianus, *virilis*

(a) Nepos in Vita Attici cap. xiii.

lis scilicet, & *sanctus* (a). Decori amantiſſimus, & in eo ſervando diligens quam qui maxime. Dicam, quod animadverterint fortasſe & alii. Quæ vel communia, & parva, neſcio quid dignitatis videbantur ſumere ab ejus moribus.

Bibliothecam inſtruxerat multis, iisſque optimæ notæ libris, non ad oſtentionem, ac pompam, ſed ad ſuum, & aliorum uſum. Elegans in omnibus, non magnificus; ſplendidus non ſumptuoſus. Aliis, quoad poterat, induſgens, ſui cenſor ſeverus, amicorum autem ſtudioſus. Petentibus aderat, non petentibus etiam ultro occurrebat, ubi ejus opera indiguiſſent. Sibi parcus, largus in alios, præcipue in egenos, in eos præ ceteris, quos palam mendicare, & victum quærere prohibet verecundia.

Vel ignotis eum commendabat naturalis quidam ingenuus pudor, ex ipſo ejus vultu emicans, oculis, ac fronte. Erat ille acerrimus ſenſuum cuſtos, adeo ut aliquando videretur reſingere etiam domeſticorum aſpectum. Magnifice de aliis prædicans, demiſſe omnino de ſe ſentiebat. Quare ſibi diffidens, ſua quibusdam amicis legere conſueverat, paratus eorum judicio eadem vel emendare vel tollere.

Hoc

(a) Inſtitut. lib. viii. cap. iii. num. 1.

Hoc quale sit, facilius judicabit, quicumque animadverterit indolem humanæ mentis, quæ impatiens superioris; unde illud:

Qui velit ingenio cedere, nullus erit.

Hac ille sentiendi de se modestia sibi omnium animos conciliaverat, arteque devinxerat. Nemo illi obrectabat invidus, nemo infensus. Illi ipsi, qui laudis æmuli, ejus erant laudatores: ad id non parum contulit etiam suavissima morum indoles, plurimum in eo laudanda. Erat enim natura aliquantulum irritabili.

Præfetti Studiorum munus recte sustinuit plures annos. Ne quid prætermitteret, labori nunquam pepercit, ad omnia promptus. Scholas frequenter idem invisere, illudque in primis cavere, ne quid novi; tum omnia ex officio inquirere; ea tamen prudentia, ut non modo nihil offenderit, nunquam incurrerit, sed etiam omnibus esset carissimus. Brevi: rem litterariam promovit studio, vigilantia, consilio.

Ejus pietatem, ac Religionem non multis persequar. Communis erat de illius probitate consensus. Erant enim in omnium oculis quæ sapienter scripserat, agebatque præclare. Ut aliis dignitate præstitit, sic exemplo præluxit. Ad exitum vergente hieme an. MDCLV. Jo-

se-

sephum letalis morbus oppressit: unde munitus est præfidiis ad incundam æternitatis viam necessariis. Mox cessit e vita, iv. scilicet Non. Mart., octavum & quinquagesimum annum agens. Complorata ejus mors non a domesticis tantum, sed etiam a civibus, immo ab omnibus, qui eundem noverant. De hac Ephemerides litterariæ, non sine debito laudis præconio (a). Qui vivens nunquam passus fuerat se laudari, mortuus prohibere non potuit, quominus laudaretur. Id ejus affinibus, & amicis non levi tunc solatio fuit; præcipue vero magna virtutis ejus opinio, & recordatio vitæ anteaactæ.

Erit fortasse qui velit extimam quoque formam illius agnoscere. Fuit statura brevi, sed decora, lata fronte & explicita, naso aquilino (quod esse volunt acris ingenii indicium), colore inter album & rubrum, jucundo & grato aspectu. Satis id vel leviter indicasse, quod imitari neque licet, neque refert. Doctrina vero & virtus, præcipua illius ornamenta, imitationem efflagitant.

(a) *Novelle della Repubblica Letteraria*, an. 1755. pag. 112.

JOSEPHI RINALDI OPERA.

Orationes XIII. pro solemni Studiorum Seminarii Patavini instauratione; quibus additæ aliæ Orationes duæ, una gratulatoria ad Joannem Archiepisc. Minor-to-Othobonum Episc. Patav.; altera in ejus funere, typis ejusdem Semin. an. 1746. in 8.

Eædem Orationes additis VIII. posthumis, ibidem 1757. in 8.

Vita Antonii Sandini. Exstat hæc initio *Familia Sacre* ejusdem Sandini.



V I T A

CLEMENTIS SIBILIATI.

AD meridiem Patavii occurrit vicus
 haud ignobilis Bubulenta, septem circiter mil-
 lia passuum eadem ab urbe distans. Ibi ortus
 Clemens an. MDCCXIX. IV. Idus Februarias ex
 honesta familia, parentibus Jo: Baptista Si-
 biliato, & Diana Alfonsi. Hi susceptum filium
 instituendum curarunt cum bonis moribus, tum
 etiam litteris. Erant enim probi, & satis for-
 tunæ bonis instructi.

Septimum annum Clemens supra deci-
 mum jam compleverat, cum ab exterioribus
 Seminarii Patavini scholis in Seminarium ipsum
 translatus est, erudiendus Rhetorica disciplina.
 Biennium in hanc insumpsit, ad Philosophiam
 mox incubuit, tum ad Theologiam, & utrius-
 que gravissimas præceptiones cum amceniorum
 lit-

litterarum studio conjunxit. His ille plurimum delectabatur, præcipue vero poësi, cui erat in primis deditus: hanc excoluit tota vita.

Litterariæ institutionis cursu confecto, eligitur in magistrum, & ex consuetudine Seminarii ad tradendam Grammaticam destinatur, tum gradatim promovetur ulterius, suoque munere egregie functus, Rhetoricæ provinciæ addicitur, in qua traditos sibi alumnos exercuit non sine magno ipsorum progressu.

Hac porro utebatur docendi methodo. Ubi auctorum interpretationem susceperet, ad pleniorē intelligentiam aperiebat illorum mentem, & ordinem rei ipsius: si quid offenderet, quod non obvium, non statim id explicabat ipse, sed explicandum & evolvendum suis auditoribus proponebat: Interrogabat singulos, quid sentirent, ut ita assuescerent periclitari suas vires. Nitebantur illi certatim assequi auctoris mentem, & introspicere. Pulcrum putabant videri ceteris acutiores.

Cum vero scribendum aliquid iis proponeret, edicebat ipsis, ut expoliendæ & tornandæ orationi instarent, nec quidquid temere & inconsulte effutirent. Ut fecunditatem in illis alere, ita garrulitatem coercere studuit impense. Quare aliquando iis præscribebat certum periodorum numerum, vel argumentum a se propositum cum iis & ipse texebat. Si cui ex discipulis prospere quid vertisset, id,

audientibus omnibus, recitabat, iisque proponebat quasi exemplum: unde honesta illa inter eos ac nobilis æmulatio. Eidem autem maxime cordi erat optimorum Scriptorum lectio atque imitatio. Ad hanc quotidie eos exercebat, ut plurimum ea proponens, quæ nova ipsis acciderent, & curiositatem incenderent.

His omnibus & adolescentes utilius progredi, & ejus nomen in dies clarere. Ad cum adibant viri illustres cum dignitate ac genere, tum doctrina, eique docenti intererant. Vidi egomet, cum ejus disciplina instituerer, adesse præ aliis ipsum Petrum Grimum Venetorum Ducem, & in civili Republica versatum splendide, & in litteraria honorifice; cujus mors defleta postea a Clemente, poetico quodam Cantico.

Magna erat illius virtutis opinio, præsertim in re poetica, cujus specimen toties dederat. Nullus prope erat ex iis libellis, qui dicuntur vulgo *Raccolte*, in quo desiderarentur carmina Sibiliati, Latina aut Itala; multo tamen magis præstitit Italis, quam Latinis, & ea crebrius scripsit, faceto & gravi stilo, dissimili præterea structura ac dimensione. Quidquid auderet, fere semper prospere, & obsecundante natura. Id ille assequutus fuerat experrecto ingenio ac vivido, facilis ac firmæ memoriæ vi, assiduo usu ac studio, & accurata opti-

optimorum Scriptorum imitatione. Florente ætate delectabatur Clemens, illo præcipue poetæ genere, quod *Bernesco* dicitur. Venuustum sane carminis genus: quod cum ad sermonis familiaritatem accedat, imitabile quidem facile videtur audienti, *sed nihil est experienti minus* (a).

Speret idem, multum sudet, frustra que labores Ausus idem (b).

Hoc usus feliciter admodum Sibiliatus; immo in hoc in primis excelluit. Opportunissimi eisdem videbantur fluere sua sponte numeri: ut in epico quoque carmine, sive heroico, in quo sex primi versus alterni sibi invicem numerosa coagmentatione respondent, ultimi vero duo similiter desinunt, & cadunt; quod poetarum ingenia torquet, & redigit sæpe ad incitas. Aptè admodum usus est etiam poeticis aliis modis, in his brevi illo Epigrammate, quod appellatur *Sonetto*, quod omnes canunt: verum graculi longe plurimi, pauci cycni. Ceterum postremis annis, ne quid dissimulem, cum vellet doctius scribere, minus naturaliter scripsit; eo etiam forsitan, quod ex ætate exaruiſſet paullulum ejus vena. Sed hoc

1 3

obef-

(a) Cic. in Orat. c. xxiii.

(b) Hor. de Art. Poet. v. 241.

obesse non debet illius memoriae, quam tot alia commendant optime expressa.

Per hæc cœpit litteratissimorum virorum existimatione & consuetudine frui, Antonii de Comitibus præ ceteris, & Algarotti. Atque hic cum *Georgica* Virgilii legeret, duo illi expedienda proposuit; quod admiratione non caret. Neque enim deerant, quos consuleret, magni nominis litterati viri. Hunc tamen adhuc juvenem litteratissimus ipse consuluit, cujus in judicando solertiam, & eruditionem eximiam perspectam prorsus habebat. Rem in aperto posuit duabus Italis Epistolis Clemens, quas ille quidem delitescere voluit quoad vixit, alii vero post ejus mortem an. MDCCXCV, cum Operibus Algarotti vulgarunt. Verum de existimatione, qua idem fruebatur, post: nunc de variis illius muneribus.

Itaque ex Rhetorico ludo in Bibliothecam traducitur, eique præficitur. Repentina enim morte præreptus fuerat Antonius Sandinus, cujus nomen ad seram posteritatem extendent accuratissima, eademque pulcherrima relicta ab eo monumenta. Roma reversus est id temporis a gravissima legatione Carolus Cardinalis Rezzonicus Episcopus Patavinus. Eidem versibus gratulatus est reditum Sibiliatus, plaudentibus viris litteratis (a).

Per

(a) Novelle della Repubblica Letteraria, an. 1752. pag. 37.

Per eadem hæc tempora Benedictus XIV. Pontifex rebus gestis & scriptis Maximus, sua Opera omnigena prope eruditione referta, ac Romæ cusa, dono misit Seminario Patavino. Ei omnium nomine, ut par erat, gratias egit præclara Epistola Clemens, quæ ejusdem Seminarii typis tunc edita. Orationem quoque habuit in ejus funere, in Cathedrali Ecclesia hujus urbis, jussus ab eodem Carolò Cardinali Rezzonico, qui mox successit in regimen Benedicto. Hæc Romam delata, & Cardinalibus in Comitibus tradita, excepta fuit non tam approbatione, quam plausu, ut idem scripsit Cardinalis Rezzonicus ad Sanctem Veronesium (a), qui cum in tota Diœcesi vitaria procuratione juvabat. Historiam quoque Ecclesiasticam alumnis tradidit Seminarii. Sic multis magnificæ litteris ad majora se comparavit.

Interim vertebat annus hujus sæculi sexagesimus, cum Jo: Antonius Vulpius Græcæ

l 4

tunc

(a) En ejus verba: *Prima di tutto mi credo in dovere di render V. S. Illustr. intesa dell' accogliimento che ha avuto l' Orazione del Maestro Sibiliato, mentre so sarà di sua particolare consolazione. Le dirò dunque che ne feci la distribuzione di due Copie a tutto il Sacro Collegio, di che ne ricevei non le dirò i ringraziamenti per il dono, ma universali gli applausi che sono stati fatti all' Autore, non meno per la saviezza con la quale fu esposto il contenuto, che per la politezza della lingua Latina: altri lodano il bell' ordine, altri lo stile terso, e tutti ne formarono dell' Oratore un illustre vantaggio concetto.*

cum & Latinæ Eloquentiæ Professor in publico Patavino Gymnasio, famæ celebritate clarissimus, missionem obtinuit ingenti non sine honore. Tum vero competitorum studia excitari. Aderant insignes litteris viri duo, Natalis Lastesius, & Caspar Gozius, monumentis uterque clarus, uterque cum dignitate sustinendo tanto muneri plane par. Utrique antepositur Clemens. Sic cœpit non solum in hujus literatissimæ Civitatis, sed etiam in totius Italiæ luce versari.

Tum patuit, quæ & quanta illi cognitio esset Artis poeticæ & oratoriæ, quam ampla eruditio. Ad hanc pertinent, quæ scripsit de Comœdia, quæ reliquit addenda Lexico Forcellini; ejus animadversiones criticæ in Græcos Latinosque Scriptores, variæ demum observationes in libros ab auctoribus ipsi exhibitos, tanquam optimo harum rerum æstimatori ac judici.

Tot vero Latinæ Acroases ab eodem publice habitæ, præsertim anno ineunte, perspicua sunt eloquentiæ ipsius argumenta. In his quærit, quid potissimum conferat ad dicendi vim tum acquirendam, tum etiam amplificandam; ad quæ maxime vitia eadem hæc ætate propensa sit, sive profana tractet, sive sacra: quas animi & ingenii dotes necessario præ se ferre debeat Orator, ut bonus sit; & hujus generis alia. Omnia vero hæc eleganter at-

atque concinne; immo & quæ fundebat ex tempore, ea exponebat latinitate, quæ sola (ut animadvertit Joseph Fossatus in Elogio, quod accuratissime & elegantissime texuit Sibiliato, unde hæc accepimus) quæ sola, inquam, posset omnino refellere, quæ de eadem latinitate scripserat Alembertius.

Negabat is (ita ferme Clemens in Commentario de Vita ac studiis Josephi Torelli (a)) negabat is *quempiam posse tam sero natum non improprie, incallide, invenuste Romulidum uti lingua. Qui quidem . . . , tanquam alter Hermagoras a Tullio notatus, non quid ars, sed quid ipse potuit, exposuit*. Hactenus Clemens; qui cum studiis proluderet an. MDCCCLXVII. Oratione non minus concinna, quam solida, dissolvit ad unum omnia, quæ contra attulerat scriptor Gallus. Plures litterati viri, in primis Ferrius Professor Publicus Ferrariæ in urbe, Clementem excitarunt ad Acroasim hanc evulgandam, *ut non modo, (ajebat ille (b)) Italianam pervagaretur, sed in Galliam quoque penetrans ad ipsius Alembertii manus accederet*. Hanc etiam delitescere Clemens voluit. Diutius cunctari solitus, multa inchoavit, pauca perfecit. Sed fatis de illius eloquentia.

Quod

(a) Commentarium editum fuit Oxoniæ ex typographeo Cle-
rendoniano an. 1792.

(b) Epist. pro usu lingue latine, Faventiæ 1771.

Quod autem pertinet ad Poësin, non solum carmina feliciter, ut antea diximus, exarabat, sed funditus etiam noverat intimam vim poeticæ Artis, naturam, indolem, artificium. Id cum ex aliis aperte constat, tum ex ejus ingeniosa & erudita Dissertatione (a), quam præmio ornari sapienter jussit Regia Scientiarum & Artium Academia Mantuana. Exstat de illa judicium valde honorificum inter Ephemeridas litterarias Pisis editas an. MDCCCLXXI. (b). Eam legit Josephus II. Romanorum Imperator, & suspexit eruditissimi Professoris ingenium; cui postea, Patavio transiens, non obscura præbuit suæ hujus admirationis indicia. Illud præterea eidem significavit, sibi fuisse gratissimum, quod audierat, cum scilicet cèlebrasse carminibus natalem diem Teresiæ matris, Imperatricis Augustæ.

Plerumque extemporalis erat ejus oratio ex Cathedra; quod vitio tribui non debet homini affluenti multiplici rerum copia. Ad hanc
la-

(a) Argumentum propositum erat hujusmodi: *Se la Poesia influisca sul bene della Società; e come possa essere oggetto della Politica.*

(b) *Questa Dissertazione è da capo a fondo un sottile, ragionato, elegante tessuto di prove, di erudizione, e di pensieri, cespugli alla novità, ed alla gravità del programma va del pari la fecondità, e squisitezza dell' oratorio e filosofico ingegno dello Scrittore di già rinomato per altre sue produzioni. Giornale de' Letterati tomo III. Pisa 1771. pag. 309.*

latius explicandam alius illi insuper amplissimus quasi campus patuit.

Patavinæ urbi jamdiu florenti Artium bonarum cultu, unum adhuc deerat ad plenius litteraturæ decus & incrementum. Non deerant sane scientissimi Professores. Sed horum singuli singulas disciplinas colunt, suo muneri quisque intentus. Litteraria Societas deerat, quæ, ut in pluribus Europæ partibus, communi bono confuleret communi cura, idque promoveret mutuis opibus & inventis. Hoc norunt, qui in tota ditione Veneta studiis præerant. Quare erigendam curarunt novam Scientiarum, Litterarum, & Artium Academiam (a). In hanc inter alios ascribitur Sibiliatus. Tum vero suas ille intendere validius vires, quippe qui probe nosset, non utilia tantum ab Academicis peti, sed etiam nova (b). Minime tamen territus, ubi primum patuit publice Academia, primus omnium maxima in hominum frequentia legit. Magna enim exstiterat ex ipsa rei novitate curiositas, Magna etiam erat hominis expectatio, quem primum legerant Academici ad rem difficilem ac novam.

Is

(a) Erecta fuit ex Decreto Senatus, die 18. Martii an. 1779.

(b) L' Università esige meno dell' Accademia; poichè in quella s' insegnano agli alunni le cose non nuove, e queste si hanno a lasciar fuori della soglia dell' Accademia quando vi ci ha da entrare. Ita Clemens in quadam Epist. ad Xaverium Bettinellum x. Cal. Mart. an. 1791.

Is itaque refellendam suscepit præposteram nescio quam philosophandi rationem, non jam pridem in litteras vitio intrusam, bonis Scriptoribus plane ignotam, quam quidam male interpretantes appellant *spiritum philosophicum*. Esse hunc ostendit litteris prorsus noxium, nec unquam posse cum iis coalescere, cum ab iisdem intimo naturæ ingenio discordet. Idque evidenter & erudite. Nondum tamen ille contentus, Opus postea refecit atque vulgavit. Edita Dissertatio venit in manus Cl. Meriani, ex Regia Berolinensi Academia. Hic in eodem argumento versatus fuerat; candide tamen professus est, se a Clemente vinci. Eum sibi præripuisse dicit, quæ ipse cogitaverat, neque scripserat; sibi tamen in eo placere, quod inciderit in ejus sensa (a). Ingenua confessio, & Sibiliato perhonorifica!

Inter Dissertationes editas a Regia Academia Patavina sunt etiam aliquot a Sibiliato confectæ; occurrunt insuper nonnullæ Italicæ illius Epistolæ in collectione quadam Epistolarum, duobus voluminibus comprehensa, Venetiis edita an. MDCCXCV., & MDCCXCVI., & aliæ in Operibus Xaverii Mattei; tum Latina Epistola ad Lavagnolum, celebrem Virgilii locum illustrans. Pluries dixit de extemporali elo-

(a) Vide ejus Elogium a Josepho Fossato editum, pag. 22.

eloquentia, ad quam statuerat, si vixisset, quosdam juvenes domi instituere. Quæ dixerat, volebat in lucem mittere. Irritum planè consilium fuit. Etenim natura insatiabilis, semper aliquid perfectius desiderabat. Cogitabat etiam multa reficere ex iis, quæ scripserat, quod eadem sibi minime satisfacerent (a).

Habuit insuper pingendi non mediocre studium vel ab ætate ineunte. Diligebat etiam impense musicam, & musicum instrumentum pulsabat, non aliquo magistro, sed natura sola institutus. Vallotti insignis in Arte musica amicitiam coluit, & amore prosequabatur qui excellenter Artium bonarum cultu. Hinc magno ab aliis habebatur & ipse in pretio. Si quid alicujus momenti accideret, de quo dicendum esset, ad eum confugiebant.

Eloquentissimo Marco Foscareno Venetorum Duci funera parabantur solemnia. Statim Sibiliati vox expetita, ut immortalem virum pro dignitate laudaret. Cessit ille oneri pariter & honori. Ut inserviret tamen laudi amplissimi Mæcenatis, cui se maxime obstrictum noverat, Opusculum edidit pulcherrimum de Eloquentia Marci Foscareni, nepotibus illius dica-

(a) Plurima edidit tum ligata numeris, tum soluta; & alia quidem separatim, alia Operibus aliorum nexa, Latina & Italica. Quæ vero inedita, exstant apud heredes. Utinam aliquando non pereant.

carum. Postremo instructis magnifice a Republica Veneta parentalibus Angelo Emo rei nauticæ instauratori, deposcitur Orator Clemens, ad majus ornamentum & decus funeris. Sed ille splendido oblato muneri se subtraxit; forsitan quod ætate nimium progressus esset. Decessit enim non multo post.

Ut ut tamen res sit, certe magna erat ejus præstantiæ opinio apud viros etiam literatos. Nimius essem, si vellem singulos nominare. Neque enim fuit ab iis tantummodo magni factus, quos socios habuit cum in Academia, tum in publico Patavino Gymnasio, præcipue a Cl. Cesarotto in eruditissima Epistola ad Deninam (a); sed a remotis etiam, & exteris. In his occurrunt Bettinellus, Sallander, Torellus, ab adolescentia eidem singulari amicitia junctus. Occurrunt Mattei, Andres, Albergatus, Pacciaudus, Fabronius, omnes litterarum gloria præstantes. His adde Algarottum & Antonium de Comitibus, de quibus antea. Hi Sibiliati fautores fuere, præceteris Fabronius, cujus hoc locuples testimonium in Vita Joannis Antonii Vulpii. *Adde- mus (inquit) fortunatissimum nos putare Gymnasium Patavinum, quod hac nostra ætate (non lubet antiquiores nominare) tres habuit humaniorum*

rum

(a) Pag. 65. j & 119.

rum litterarum magistros, Lazzarinum, Vulpium, & qui huic successit, Sibiliatum, de cujus amicitia, dum vivam, gloriabor; qui pares omnibus magnis viris, quos exteræ nationes nimium arroganter interdum jactant, & multis etiam superiores existimari possunt (a). Hæc Fabronius. Præterea cum Roberto, Pompejo, Frugono, Ferrio, Caspare Gozio, cumque aliis litteratissimis viris, immo cum Maphejo, Apostolo Zenò, Metafasio, tota Europa celeberrimis, mutuum Clementi fuit Epistolarum commercium, quibus continetur eximia & multiplex eruditio. Eadem apud Patricios Venetos fruebatur fama. Idem laudatus ab Ephemeridum rei litterariæ scriptoribus, ornatus ab Academicis, Principibus viris cognitus, Episcopis, Cardinalibus, Summis Pontificibus. Adeo claruit Clementis nomen! eo pluris habendum, quod ipsum commendabant boni mores, de quibus breviter nunc.

Fuit itaque animo liberali & ingenuo, non simulato, non tecto; societatis amicus, læta indole, aperto non modo sermone, sed etiam vultu; in deligendis amicis sagax, in colendis diligens, in excipiendis omnibus ad se adeuntibus plane humanus. Frequentabant autem non pauci ejus domum, non tantum

(a) Vitz Ital. doctrina excell., tomo XIII. pag. 284., 285.

juvenes discendi cupidi, sed etiam viri. Utrisque quoties ejus opera indiguissent, præsto erat consilio pariter & scripto. Pleraque ex iis, quæ scripserat, latere maluit (ut antea diximus), quam typis edere, non solum, quod hominum judicia extimesceret, sed etiam quod sentiret de se demisse; nec literatis viris ipsum ad id hortantibus cessit. Multa vero edidit, suum nomen anagrammate involvens. Suis obrectatoribus non respondit, licet laceffitus.

Pecunia abundabat, ei tamen minime additus erat. Hac multorum largiter sublevavit inopiam. Beneficum vero in primis se præbuit cuidam familiæ, quæ Patavium se receperat a Gallia extorris. Eidem statim temporibus, quamdiu vixit, numerare solitus erat certam nummorum vim, ut pro vitæ suæ conditione posset honeste degere. Plurimum quoque subsidii contulit in pios usus.

Nec unquam cessabat, quamvis quotidie surgeret bene mane. Domestico inclusus cubiculo, etiam postremis annis sese oblectabat assidua lectione, scriptione, commentatione. Nihil temporis patiebatur inutiliter sibi elabi, quam maxime infensus otio. Adeo autem nonnunquam erat in rerum cogitatione defixus, ut loquentes minime audiret.

Ad Religionem quod attinet, vehementer afficiebatur ille ejus studio, quin immo sen-

sensu de eadem identidem loqui solitus. Ab iis abhorrebat, qui in hoc non bene audirent. Pati non poterat juventutem ad eos accedere, eamque ab ipsis avocare tentabat cura ingenti, ne eorum consuetudine, integra depravarentur ingenia. Aliquot præterea libros in Italiam linguam vertit ex Gallica, studio Religionis, in quam propensum se ostendit & suis carminibus. Ob eandem causam sacras etiam scripsisse dicitur Orationes, quæ cultis in locis multa cum laude exceptæ. Erat illi (ut agebat ipse) vel ampla eruditio, nihili, si a probitate disjuncta; probitas vero in pretio, vel experts litteris. Fuit porro ejus vita cum oratione consentiens.

Seminarium optime florere cupiebat, præsertim moribus, ejusque decus semper in majus provehi. Ipsum non raro adibat, præcipue Bibliothecam, & litterariis exercitationibus, quæ in eo publice haberi solent; intererat, eidem maxime addictus.

Usus fuerat prospera valetudine usque ad ultimum vitæ tempus, cum derepente laborare coepit ex dissolutione membrorum. Dolebat, suo se non posse in posterum fungi munere; Divinæ tamen voluntati prorsus acquiescens, doloris vim temperabat. Aliquot menses cum eo luctatus, ad extremum victus Patavii occubuit xvi. Cal. Mart. an. MDCCXCV. vitæ sexto ac septuagesimo vix completo.

m

Acer-

Acerba pluribus ejus mors, quam deflevit concinnis & elegantibus Epigrammatis Franciscus Pimbiolus de Engelfreddis obstrictus magnopere Sibiliato, cujus imaginem noscere volentibus hic subjicio. Fuit ille *decentior, quam sublimior* (a), capillo nigro, lata & exposita fronte, vividis oculis, modice inflexo naso, tota corporis conformatione decorus. Joannes Baptista fratris filius, heres rei ejus domesticæ & litterariæ, eidem sepulcrum posuit in interiore vestibulo Ecclesiæ Presbyterorum Congregationis Oratorii S. Philippi Nerii, quorum amantissimus Clemens. Sepulcri titulus est hujusmodi:

CLEMENTI . SIBILIATO
PRESBYTERO . PATAVINO
HUMANIORUM . LITTERARUM
IN . PATAV. GYMNASIO . DOCTORI
SCRIPTIS . EDITIS . CLARISS.
VIXIT . ANN. LXXVI.
DECESSIT . XVI. KAL. MAR. AN. CIOIDCCVC.
JO. BAP. FRATRIS . FILIUS
PATRUO . BE. ME. F.

Hæc habui, quæ dicerem de tanto viro, cujus litterariæ institutioni plurimum me debere profiteor.

(a) Tacit. in Agric. cap. XLIV.



ERRATA

CORRIGE

Pag. 35 not.(a) lin. 2 post ea verba del XVI. secolo, adde:
le approvò non solo, ma le ammirò.

Pag. 76 lin. 16 ibid. 1765. typis Seminarii 1765.

81 12 propterea iis propterea is

115 8 bene consequi consequi

129 12 æternos æterno

135 10 Quidquid affirmat Quæque affirmat





